

Evangelio según SAN MATEO

*Jesús rñjoro ñamasiriarã ñna vãme cutimasire queti
(Lc 3.23-38)*

¹ Jesús ñacami “Rotimorũgõrũcũja mũ” yigũ, Dios ñ cõar'i, Abraham ñamasir'i, to yicõari, Uju David ñamasir'i jãnami. Tire mũa masisere bojagũ ñari, ñ ñicua vãmere mũare gotigũagu yaja yũ. Ado bajiro vãme cutimasiñujarã ñna:

² Abraham ñamasir'i macũ ñamasiñuju Isaac.

Isaac macũ ñamasiñuju Jacob.

Jacob macũ ñamasiñuju Judá. To yicõari, gãjerã ñ bederã quẽne ñamasiñujarã.

³ Judá rña Fares, to yicõari, Zara ñamasiñujarã.

Ñna jaco ñamasiñuju Tamar.

Fares macũ ñamasiñuju Esrom.

Esrom macũ ñamasiñuju Aram.

⁴ Aram macũ ñamasiñuju Aminadab.

Aminadab macũ ñamasiñuju Naasón.

Naasón macũ ñamasiñuju Salmón.

⁵ Salmón macũ ñamasiñuju Booz. Ñ jaco ñamasiñuju Rahab.

Booz macũ ñamasiñuju Obed. Ñ jaco ñamasiñuju Rut.

Obed macũ ñamasiñuju Isa'i.

⁶ Isa'i macũ ñamasiñuju Uju David vãme cutigũ.

David macũ ñamasiñuju Salomón.

Ī jaco ñamasiñuju Ur'ias ñamasir'i manajo.

⁷ Salomón macu ñamasiñuju Roboam.

Roboam macu ñamasiñuju Ab'ias.

Ab'ias macu ñamasiñuju Asa.

⁸ Asa macu ñamasiñuju Josafat.

Josafat macu ñamasiñuju Joram.

Joram macu ñamasiñuju Uz'ias.

⁹ Uz'ias macu ñamasiñuju Jotam.

Jotam macu ñamasiñuju Acaz.

Acaz macu ñamasiñuju Ezequ'ias.

¹⁰ Ezequ'ias macu ñamasiñuju Manasés.

Manasés macu ñamasiñuju Amón.

Amón macu ñamasiñuju Jos'ias.

¹¹ Jos'ias macu ñamasiñuju Jecon'ias. To yicōari, ĩ bederā quēne ñamasiñujarā. To bajiro ĩna bajiñariju, Israel sitanare ñejecōari, Babiloniana ĩnare juamasiñujarā, ĩnare rotiajeruarā.

¹² Quēna Jecon'ias macu ñamasiñuju Salatiel.

Salatiel macu ñamasiñuju Zorobabel.

¹³ Zorobabel macu ñamasiñuju Abiud.

Abiud macu ñamasiñuju Eliaquim.

Eliaquim macu ñamasiñuju Azor.

¹⁴ Azor macu ñamasiñuju Sadoc.

Sadoc macu ñamasiñuju Aquim.

Aquim macu ñamasiñuju Eliud.

¹⁵ Eliud macu ñamasiñuju Eleazar.

Eleazar macu ñamasiñuju Matán.

Matán macu ñamasiñuju Jacob.

¹⁶ Jacob macu ñañuju José. Ī ñañuju Mar'ia manaju. So ñañuju “Rotimhorügōrucami”

yigɥ, Dios ĩ cōar'i, Jesús jaco.

¹⁷ Abraham rĭa jānerabatia, David ĩ ñamasiariajune juaãmo cōro, gũbo babari rāca jēnitarirācɥ ñasomasiñujarã. Abraham macɥ ñamasiñuju Isaac. Isaac macɥ ñamasiñuju Jacob. To bajiro mani cōĩaruji vajama, David ĩ ñamasirijaune juaãmo cōro, gũbo babari rāca jēnitarirācɥ ñamasiñujarã ĩna. Tijɥ bero, quēna David macɥ ñamasiñuju Salomón. Salomón macɥ ñamasiñuju Roboam. To bajiro mani cōĩaruji vajama, Babilonia macajɥ Israel sitanare ĩna jua vamasirijaune quēna juaãmo cōro, gũbo babari rāca jēnitarirācɥ ñamasiñujarã ĩna. Jecón'ias macɥ ñañuju Salatiel. Salatiel macɥ ñañuju Zorobabel. To bajiro mani cōĩaruji vajama, “Rotimorũgōrɥcɥmi” yigɥ, Dios ĩ cōar'i ĩ ruyuarirodo juaãmo cōro, gũbo babari rāca jēnitarirācɥ ñamasiñujarã quēna.

Jesús ĩ ruyuare queti
(Lc 2.1-7)

¹⁸ “Rotimorũgōrɥcɥmi” yigɥ, Dios ĩ cōar'i, Jesús ĩ ruyuare ado bajiro bajiyuju: ĩ jaco ñaroco, Mar'ia vāme cutigo ñañuju so. So manajɥ ñarocɥ ñañuju José. ĩ rāca so ñaroto rĭjoro, Esp'iritu Santo sore ejaçōari, sore macɥ yiyuju ĩ. Sore ĩ macɥ yijare, macɥ sãñagō ñañuju so. ¹⁹ José, so manajɥ ñarocɥ quēnagũ ñañuju. To bajiro bajigɥ ñari, masa ĩaro rĭjorojɥa bojoneoro so tãmorotire bojabesuju. To bajiri, masa ĩna ajibeto, “Mũre bojabeaja yɥ”, sore yirɥaboayuju. ²⁰ To bajiro tɥoĭa ĩ cāniatone, ĩ cājiriaroju Diore moabosagɥ ángel, ĩre ruyuañoñuju. Ruyuañoçōari, ado bajiro ĩre gotiyuju:

—Ajiya José, David ñamasir'i jãnami. Mar'iare manajo cutirua güibesa. Esp'iritu Santo sore ñ macu yijare, macu sãñagõ ñaamo so. ²¹ Macu cuorucocomo so. Ñre, Jesús ñre vãme yirucuja ma. Masa rojose ñna yise ñajare, Dios ñ masiriose vaja, vaja yirẽtobosarocu ñarucumi ñ. To bajiro yirocu ñ ñajare, Jesús ñre vãme yirucuja ma —Josére ñre yiyuju ángel.

²² “Ado bajiro bajiruroja” Diore gotirẽtobosamasir'i ñ yimasire ñajare, to bajiro yiyuju ángel. Ado bajiro yimasiñuju:

²³ “Rõmio, ñmua rãca ñabeco, macu sãñagõ ñarucocomo so. To bajiri macu cuorucocomo so. ‘Emanuel’ ñre yiruarãma masa”, yimasiñuju Diore gotirẽtobosarimasu.

(“Mani rãca ñaami Dios” yire ñni ñaja “Emanuel” yirema.)

²⁴⁻²⁵ “Esp'iritu Santo suorine macu sãñaamo” ángel ñ yire ñajare, Mar'iare ñ ya vijua ñmicoasuju José. Macu sãñagõ so ñajare, so rãca ñabetirũgũñuju. So cuoro bero, Jesús ñre vãme yiyuju.

2

Ñocoa ñna bajisere buerimasa Jesúre ñna ñarã ejare queti

¹ Judea sita ñarimaca, Belén vãme cuti macaju ruyuyuju ñ. Ñ ruyuarirodore ti sita ujua, Herodes vãme cutigua ñañuju. Jesús ñ ruyuaru bero, Jerusalén macaju ejayujarã, muiju ñ jiadojua vadiriarã, ñocoa ñna bajisere buerimasa. ² Ti maca ejacõari, sēniñañujarã ñna:

—¿Nore ñnati jud'io masa ujua ñarocu ruyuar'ima? Muiju ñ jiadojua ñocore ñabujacõari, “Tojua

ruyuagami” yirã ñari, ìre rucuburooana vadiaja yua —yiyujarã ìna.

³ To bajiro ìna sēniācudisere ajicōari, toagu ujū, Herodes buto tūoīagūiyuju, “Ījua, ujū yū ñasere yure ēmarucami” yitūoīagū ñari. Ìre bajiro rīne tūoīañujarã ti macana Jerusalén macana quēne.

⁴ To bajiro tūoīagū ñari, paia ujarãre, Dios ĩ rotimasire gotimasiorimasare quēne ìnare jirēoñuju Herodes. Ìna ejaro ĩacōari, ado bajiro ìnare sēniāñuju ĩ:

—“Rotimurogōrucami” yigū, Dios ĩ cōarocuma, ĩnojū, “Ryuuarucami” yiyujari Dios ocare masa ìna ucamasire? —Ìnare yiyuju ĩ.

⁵ To bajiro ĩ yisēniārone, ado bajiro ìre yicūdiyujarã ìna:

—“Judea sita Belén vāme cūti macajū ruyuarucami” yiucamasiñumi sīgū Diore gotirētobosarimasū. Ado bajiro yaja ĩ ucamasire:

⁶ “Judea sita ñarimaca Belén vāme cūti maca, jairimaca me ñaboarine, ñamasuri maca ñarūaroja ti maca. Ti macagu ujū ñamasugū ruyuarucami. Ī ñarucami yū yarã Israel sitana ujū. Ìnare quēnaro ĩtirūnarucami ĩ, yiyuju Dios”, yiucare ñaja —Ìre yigotiyujarã Dios ĩ rotimasire gotimasiorimasa.

⁷ To ìna yisere ajicōari, quēna ñocōa ìna bājisere buerimasare masa ìna ajibeto ìnare jiyuju Herodes. To yicōari, ado bajiro ìnare sēniāñuju ĩ:

—ĪDivato masu ñoco ruyuasūori? —Ìnare yisēniāñuju.

⁸ To yigajano, Belénjū ìnare varotiyuju ĩ:

—Vasa. Sũcare, quẽnaro ãre macama. Ñre ãabũjacõari, yare gotirã vaba. Yũ quẽne ãre rũcũbuõgũ varũ yaja —yiyuju, ãnare yitogũ.

⁹ To bajiro ã yirotisere ajicõari, ã yirore bajirone vasujarã ãna. To ãna vatone, muiju jiadojũa ñoco, ãna ãar'i, ãnare rĩjoro cãti vasuju. To bajiva, tujarũgũñuju, sũca ã ñaro veca. ¹⁰ Ñoco ã tujarũgũsere ãacõari, bũto variquẽna vasujarã ãna, ñocoa ãna bajisere buerimasa. ¹¹ Ñoco ã ñaro ãñeroca ñarivi sãjacõari, ãna ãajama, to ñañuju sũca, ã jaco rãca. Ñre ãacõari, ã rĩjorojũa gũsomuniari tuetuejayujarã ãna, ãre rũcũbuõquẽnariã. To bajiro yigajano, ãna juavarere jãnacõari, oro, quẽnase sãtise to yicõari, mirra vãme cãtisere quẽne ãre ãsiñujarã ãna. ¹² To ãna yiro bero, ãna cãjiriarojũ, “Herodes tũ tudiabesa. ‘To ñagũmi sũca’ yimasibeticõato ã”, ãnare yiyuju Dios. To bajiri tire masicõari, Jerusalẽnju vamenane gaje maaju tudicoasujarã ãna yuja, ãna ya macaju.

Egipto sitaju Jesũre ãna ãmato rudiare queti

¹³ Ñocoa ãna bajisere buerimasa ãna tudiato bero, Josẽ ã cãjiriarojũ ãre ruyuyaju ãngel quẽna. Ruyucõari, ado bajiro ãre yiyuju:

—Yujiya. Sũcare, ã jacore quẽne Egiptojũ ãnare ãmato rudiasa mũ. Tone ñacõama maji. Mũre yũ gotirojũ tudiaba. Herodes, Jesũre sãaru ãre macarũcumi —Josẽre ãre yiyuju ãngel.

¹⁴ To ã yijare, yujicõari, Jesũre, ã jacore quẽne ñamine Egiptojũ ãnare ãmato rudicoasuju. ¹⁵ Tojũ ãna ñatoyene bajirocacoasuju ãjũ Herodes. “Egipto sitaju yũ macũ ã ñaro ãre jicõarũcũja yũ”, ãre gotirẽtobosarimasũ sũorine Dios ã yimasire ñajare, to bajirone bajiyuju.

ƆjɁ Herodes rĩamasare ĩ s̃arotire queti

¹⁶ BajirocabecujɁ, ñocoa ĩna bajisere buerimasa ĩre gotimenane, gaje maajɁ ĩna tudiarere ajicōari, buto jūnisiniñuju Herodes. To bajiri jūnisinigū ñari, Belén ñarāre, ti maca tɁanare rĩamasa jua cūma tɁsanare ɁmɁare, to yicōari, ĩna bero ruyuararāre quēne s̃arotijeocōañuju. Ñocoa ĩna bajisere buerimasa, “Jua cūma tɁsajɁ” ĩna yirere ajigɁ ñari, ĩnare s̃arotiyuju Herodes. ¹⁷ Raquel ñamasirio so rĩare maigō, so otimasiriarore bajiro Belén macana ĩna rĩare mairā, ĩna otirotire tɁoĩacōari, ado bajiro ucamasiñumi Diore gotirētobosarimasɁ Jerem'ias vāme cɁtigɁ:

¹⁸ “Ramá vāme cɁti macago so rĩare so tɁoĩa otise ruyurɁaroja. Oticōa ñarɁocomo so, Raquel vāme cɁtigo, so rĩare otigo. Gājerā, ‘Otibesa’ sore ĩna yiboajaquēne, ajibetirɁocomo, so rĩa ñamasiboariarāre godocɁtigo ñari”, yiuca-masiñumi Jerem'ias.

¹⁹ Egiptoju José ĩ ñaro rijacoasuju Herodes. ĩ rijato bero, José ĩ cājiriarojure s̃igū ángel ĩre ruyuañoñuju quēna. To bajicōari, ado bajiro ĩre yiyuju:

²⁰ —¡Yujiya! Jesúre, ĩ jacore quēne Israel sitajɁ ĩnare ũmato tudiasa. ĩre s̃arɁaboacana rijajedicoajama ĩna —Josere ĩre yiyuju ángel.

²¹ To ĩ yijare, yujicōari, Jesúre, ĩ jacore quēne Israel sitajɁ ĩnare ũmato vasuju José. ²² Maa vacujɁ, ajiyuju José: “Herodes ñaboar'i macɁ, Arquelao vāme cɁtigɁ, ĩ jacure vasoagu Judea sitajɁ ñañuju”, yire quetire ajiyuju. Ti quetire ajicōari, güigɁ ñari, tojɁ varɁabesuju. To bajiro

bajigune, quēna tojm cājiriañuju ĩ. Cājiriacōari, “Tojm yu vajama, quēnabetoja. Galilea sitajua varucuja yu”, yituoiañuju. ^a ²³ Galilea sitajua ejacōari, Nazaret vāme cuti macajua ñagū vasuju. Diore gotirētobosarimasa, “Nazaret macagu ñarucumi ‘Rotimorūgōrucumi’ yigu, Dios ĩ cōarocu”, Jesúre ĩna yuicamasire ñajare, to bajirone bajiyuju.

3

Juan Bautista vāme cutigu, yucá manojua masare ĩ gotimasiore queti

(Mr 1.1-8; Lc 3.1-9, 15-17; Jn 1.19-28)

¹ Tirodori bero, Juan Bautista vāme cutigu, Judea sitajua yucá manojua ejayuju. ² Tojm ejacōari, ado bajiro ĩre ajirā ejarāre gotimasiorūgūñuju ĩ:

—Yoaro mene ejarucumi “Rotimorūgōrucumi” yigu, Dios ĩ cōarocu. To bajiri rojose mua yisere yitujacōari, Dios ĩ bojasejare yi yuya mua —ĩnare yirūgūñuju ĩ.

³ ĩne ñañuju, “Ado bajiro yirucumi” Diore gotirētobosarimasu Isa'ias vāme cutimasir'i ĩ yuicamasir'i. Ado bajiro ĩre yuicamasiñuju Isa'ias: “Yucá manojua sīgū masu ado bajiro goticud-irūgūrucumi: ‘Mani ujua ejarucumi. To bajiri, rojose mua yisere yitujacōari, quēnasejare tuoiaña mua, ĩre yurā’ yirucumi sīgū”, yuicamasiñuju Isa'ias, Juan ĩ bajiro tire goti rĭjoro yigu.

a 2:22 Arquelao vāme cutigu ñaboarine, ĩ jacu vāmere bajiro Herodes vāme cutiyuju. ĩ ñañuju Jesúre sēññabūsaboacu, Pilato tujare Jesúre cōari.

⁴ Camello joane suariaro sãñagũ ñañuju ï. To yicõari, vecu gaserone vëñaricũñuju, ï sãñasere. Ñimia ba, to yicõari, beroa ocore idi, yirügũñuju. ⁵ Ìre ajirã, jãjarã masa ejayujarã. Jerusalén macana, Judea sitana, to yicõari, Jordán vãme cãtiya tuana quëne ejayujarã, ìre ajirã. ⁶ To bajiro ï gotisere ajirã ñari, “Rojose mani yisere Dios manire masirioato” yirã, “Rojose yirã ñaja yua” Diore ñna yigotiro bero, Jordán vãme cãtirisaju oco rãca ñnare bautiza ñañuju Juan.

⁷ To bajiro ï yĩñarone, fariseo masa, to yicõari saduceo masa quëne Juan oco rãca ï bautizasere bojarã ejayujarã. Ìna ejasere ïacõari, ado bajiro ñnare yiyuju Juan:

—Oco rãca muare yu bautizasere bojaboaja mua. Vãtia uju rojose ï yirore bajirone rojose yijairã ñaja mua. To bajiro bajirã ñari, “Rojose yua yise vaja rojose yuare yibetirucumi Dios” yituoïa vadiboaja mua. ¿To bajiro mua bajise suorine rojose mua tãmuorotire masibeatigue mua? ⁸ Rojosere yitujacõari, “Quënarã ñaama” masa muare ñna yĩamasiro tire yirã, quënosejuare yirügũrona ñaja mua. ⁹ Ado bajiro yituoïabesa mua: “Abraham ñamasir'i jãnerabatia ñamasurã mani ñajare, rojose mani yise vaja rojose manire yibetirucumi Dios” yituoïabesa. Adiarì gõtari rãca Abraham jãnerabatiare ï godoveorujama, godoveomasigãmi Dios —ñnare yiyuju Juan. ¹⁰ — Oteriayucuri, rica mani yucurire bajiro bajiaja mua. Rica manijare, quëareacõari, soereariarore bajiro yirucumi Dios. Tire bajirone yiecoruarãja mua quëne, mua tuoïavasoabetijama. ¡Quënose

mua yibetire ñacõari, jeame yatibetimeju muare rearucumi Dios! —ñare yiyuju Juan.

¹¹ Gaje vãme ado bajiro gotiyuju Juan:

—Yu berore yu rëtoro masigũ ejarucumi. Ñamasurã rĩne ãre yibosamasiama, ñamasugũ masu ã ñajare. Rojose ãna yisere yitujacõari, Dios ã bojasejuare yirãre oco rãca bautizarũgũaja yu. To bajiro yu yirũgũse ti quẽnaboajaquẽne, yu bero ejaqu ã moasejuã quẽnamasucõaruaroja. Ñma, Espiritu Santore cõamasirucumi, masare. Ñ suorine “Dios ã bojabetire yaja yuã” yimasicõari, tuõlavasoaruarãma —ñare yiyuju Juan.

¹² Gaje vãme ado bajiro masare gotiyuju Juan:

—Yu bero ejaqujuama, trigo ajere besegure bajiro yirucumi, masare. To bajiri ti gasere yireacõari, soereariarore bajiro yirucumi, jeame yatibetimeju masare cõagũ, to yicõari, quẽnase cõrone juagure bajiro yirucumi, ãre ajitirũnarãre juavacu —ñare yiyuju Juan.

*Oco rãca Juanre Jesús ã bautizarotire queti
(Mr 1.9-11; Lc 3.21-22)*

¹³ Cojorũmu Galilea sitaju ñar'i, Jordán vãme cutirisaju vasuju Jesús. Juan tũju ejacõari, oco rãca ãre bautizarotiyuju. ¹⁴ To bajiro ãre ã yiboajaquẽne, oco rãca ãre bautizarũabesuju Juan:

—Bajibeaja. No yigu mre bautizamasibecuja yu. Mujuã, yu rëtoro masigũ ñari, oco rãca yure bautizarocu ñaja mu —Jesúre ãre yiyuju Juan.

¹⁵ To ã yisere ajicõari, ado bajiro ãre yicũdiyuju Jesús:

—Yure oco rãca m̄ bautizasere bojaami Dios. Ñajediro Dios ï rotirore bajiro c̄diroti ñaja manire —Juanre ïre yiyuju Jesús.

To bajiro ï yijare,

—Bā. To bajirone bojaroja —ïre yic̄dic̄ari, Jesúre oco rãca ïre bautizayuju Juan. ¹⁶ Jesús ï majar̄ḡir̄imarone ùm̄agasero soje j̄nac̄asuju ti. Ti j̄narone, ò vecaj̄ Jesús ï ïam̄orone, bujare bajiḡ rujiadic̄ari, Jesús joere rocajeoyuju Esp'iritu Santo. ¹⁷ Jesús joere ï rocaejaronne, ado bajiro yi ocaruyuyuju ò vecaj̄:

—Ȳ mac̄, ȳ maiḡ masu ñaja m̄. M̄ rãca b̄to variquēnaja ȳ —ïre yi ocaruyuyuju.

4

Dios ï bojabetire v̄tia ̄j̄, Satanás, Jesúre ï yirotīare queti

(Mr 1.12-13; Lc 4.1-13)

¹ Jesús, oco rãca Juanre ï bautizarotiro bero, yuc̄ manoj̄ ïre ùmato vasuju Esp'iritu Santo, “Satanás ï bojarore bajiro rojose Jesúre ïre yirotīato” yiḡ.

² To bajiri toj̄, yuc̄ manoj̄ j̄arã masa c̄oro ñarir̄m̄ari, ñamiri quēne tocãrãca ñamirine babec̄ne ñac̄ar̄ḡũñuju Jesús. To bajiḡ ñari, b̄to ñiorijayuju ï yuja. ³ To ï bajiro ïac̄ari, ado bajiro rojose ïre yirotīaboayuju v̄tia ̄j̄, Satanás:

—Dios mac̄ne m̄ ñajama, adiar̄ ḡtarine pan godoveoya m̄ —ïre yirotīboayuju, Jesúre.

⁴ To bajiro Satanás ïre ï yiboajaquēne,

—Yibeaja ȳ. Dios oca masa ïna ucamasire ado bajiro gotiaja: “Bare r̄ne ñamasuse me ñaja. Dios

ocare mani c̄adisej̄ma ñaja ñamasusema. ‘Bare ti manijare, rijarear̄ar̄aja’ yire ti ñaboajaquēne, Dios rijarere ĩ bojabetijama, rijabetir̄ar̄aja. ‘Caticōa ñato’ yiḡu yimasiḡu ñaami ĩ”, yigotiaja Dios oca masa ñna ucamasire —ĩre yiyuju Jesús.

⁵ To ĩ yiro bero, Jerusalénj̄ma, Dios ĩ beseria maca ñamasuri macaj̄ma Jesúre ĩre ũmato vasuju Satanás. To ejacōari, Diore yir̄uc̄ub̄oriavi joej̄ma ĩre ũmato m̄jasuju. ⁶ To ĩre ũmato m̄jaejacōari, ado bajiro yiyuju Satanás:

—Dios oca masa ñna ucamasire ado bajiro goti-
aja:

“ĩre moabosarimasa ángel mesare m̄re coderotir̄uc̄mi Dios. M̄ma quediajama, ‘Gāta joej̄ma rocajeocōari, ĩ ḡubo jearomi’ yir̄a, m̄re boca ñiar̄ar̄ama ñna”, yigotiaja Dios oca.

To bajiri Dios mac̄ne m̄ma ñajama, adoj̄ne jatiquedi rujiañasaque m̄ma —Jesúre yirotooyuju Satanás.

⁷ To bajiro ĩ yiboajaquēne, Jesúj̄ma, ado bajiro ĩre yiyuju:

—To bajiro m̄ma yisere c̄adibeaja ȳma. “Dios ĩ yiriarore bajiro ȳre boca ñiar̄ar̄ama ángel mesa” yiḡu, ȳma jatiquediñajama, Dios ĩ bojabetire yiḡu yiḡuja ȳma. Gajeye ado bajiro gotiaja Dios oca masa ñna ucamasire: “‘Dios, “Yir̄uc̄aja” yiyumi’ yit̄oñacōari, ‘To bajiro masu yir̄u yiyujari’ yimasir̄ar̄a, m̄ma t̄oñarore bajiro m̄ma yiajejama, quēnabeaja”, yigotiaja Dios oca masa ñna ucamasire —ĩre yiyuju Jesús, Satanáre.

⁸ To bajiro ĩ yiro bero, ḡūtāma ũm̄aric̄u joej̄ma Jesúre ũmato vasuju Satanás quēna. Toj̄ma ũmato

ejacōari, adi macarucuro ñarimacari jediro ñre ñojeocōañuju. ⁹ Ñre ñogajanocōari, ado bajiro ñre yiyuju Satanás:

—Yũ rñjorojũa gũsomuniari tuetucōari, “Yũ ujũ ñamasugũ ñaja mũ” yũre mũ yirũcũbũojama, adi sita ñajedirore mũre ñsirũcũja yũ —Jesũre ñre yiyuju Satanás.

¹⁰ To bajiro ñ yise ñajare, ado bajiro ñre cãdiyuju Jesús:

—Vasa mũ. Ado bajiro gotiaja Dios oca masa ñna ucamasire: “Mani ujũ Dios sũgũrene, ‘Yũ ujũ ñamasugũ ñaja mũ’ ñre yirũcũbũocōari, cãdiroti ñaja”, yigotiaja Dios oca masa ñna ucamasire —Satanãre yiyuju Jesús.

¹¹ To bajiro Jesús ñ yisere ajicōari, vacoasuju Satanás yuja. Ñ vato bero, Jesũre ejarẽmorã ejayujarã ángel mesa.

*Galilea sitajũ Jesús ñ gotimasiosũore queti
(Mr 1.14-15; Lc 4.14-15)*

¹² “Tubiberiavijũ tubibe ecocoajami Juan” yise quetire ajicōari, Galilea sitajũ tudicoasuju Jesús.

¹³ To va, ñ ya maca Nazaret vãme cãti macajũ eja, no cõro mene ñaboa, Capernaum vãme cãti macajũ ñagũ vasuju. Ti maca ñañuju utabũcũra Galilea vãme cãtira tũjũ, Zabulón sita, to yicōari, Neftal'i sita tũ ñarimaca. ¹⁴ Ti macajũ Jesús ñ ñajama, Diore gotirẽtobosarimasũ Isa'ias vãme cãtimasir'i, ado bajiro ñ yiuucamasire ñari, bajiyuju:

¹⁵⁻¹⁶ “Jordán vãme cãtirisa jodejũ Galilea vãme cãtira ñaja. Tira tũre ñaja Zabulón sita, to yicōari Neftal'i sita. Ti sitajũre jud'io masa me ñaama, Diore masimena.

Īnare gotimasiocōari, rojose ĩna tãm̃oborotire ĩnare yirētobosaroc̃ure cōar̃uc̃umi Dios, ĩ bojarore bajiro ‘Quēnaro yirã ñato’ yig̃m̃”, yiuca-masiñumi Isa'ias.

To bajiro ĩ yiuca-siriarore bajirone, ti sitaj̃m̃ ejayuju Jesús.

¹⁷ Ti sitaj̃m̃ ejacōari, Dios ocare, ado bajise masare gotimasiocudis̃oyuju Jesús:

—Diore rotibosaroc̃u, ĩ rotis̃oroti mojoroaca r̃ayaja. Ʋj̃m̃ Dios yarã quēnaro ĩ yirona m̃ua ñar̃ajama, rojose m̃ua yisere yit̃ajacōari, ỹre ajitir̃ññã —masare yigotimasiocudis̃oyuju ĩ.

Vai s̃arimasa babaric̃ãr̃ãc̃u ñar̃ãre Jesús ĩ jire queti (Mr 1.16-20; Lc 5.1-11)

¹⁸ Cojor̃m̃, utab̃uc̃ura Galilea vãme c̃utira t̃aj̃m̃ vacudig̃m̃ vasuju Jesús. To vac̃j̃m̃, ĩañuju, Simón vãme c̃utig̃ure, bero Pedro vãme c̃utiroc̃ure, ĩ bedi Andrére quēne. Vai s̃arimasa ñañujarã ĩna. Bajiyuc̃urire rearoderuu yĩñañujarã ĩna. ¹⁹ ĩna t̃u ejacōari, ado bajiro yiyuju Jesús:

—Ỹu rãca vayá. Yuc̃rema m̃ua vai vejese ũnir̃ene masa ỹre ĩna ajitir̃ññarotire gotimasiobosarimasa ñar̃arãja m̃ua —ĩnare yiyuju Jesús.

²⁰ To ĩ yirir̃imarone, ĩna bajiyuc̃urire c̃ũ, ĩre s̃ayacoasujarã.

²¹ To yĩ var̃utu vac̃ne, gãjerã j̃uarã ñar̃ãre ĩnare jiyuju Jesús. ĩna ñañujarã Santiago, ĩ bedi Juan rãca. ĩna jac̃u Zebedeo rãca c̃ũmuaj̃m̃ ĩna bajiyuc̃urire siaquēno sãñañujarã. ²² To ĩ yisere ajicōar̃aj̃ma, ĩna jac̃ure, to yicōari ĩna c̃ũmuare quēne vaveocoasujarã, Jesúre s̃ayana.

*Masa jājarāre gotimasiocōari, rijaye cūtirāre Jesús
ī catiore queti*

(Lc 6.17-19)

²³ Galilea sitajū gotimasiocudiyuju Jesús. Tocārāca macarirene Dios ocare ĩna buerivirijū sājaejacōari, oca quēnasere masare ĩnare gotimasioñuju. “Ujū Dios yarā quēnaro ĩ yirona m̄na ĩnarajama, rojose m̄na yisere yitajacōari, yure ajitirūn̄na”, ĩnare yigotimasioñuju. To yicōari, rijaye cūtirāre ĩnare catioyuju. ²⁴ To bajiri Jesús rijarāre ĩ catiosere masa ĩna gotibatojare, Siria sitana quēne tire ajicōari, rijaye cūtirāre juaejayujarā, “Jesús ĩnare catiato” yirā. ĩna usurijū vātia sāñarāre quēne juaejayujarā, “Vātiare bureato Jesús” yirā. Rijaquedirāre, to yicōari, micarāre quēne juaejayujarā, Jesúre catiorotirā. ĩna ĩnaro cōrone ĩnare catioyuju.

²⁵ Jesús ĩ vacudiro cōrone, jājarā masa ĩre s̄yajojicōañujarā. Galilea sitana, Decápolis macana, Jerusalén macana, Judea sitana, to yicōari, Jordán vāme cūtirisa gajejacetuana quēne ĩre s̄yarūgūñujarā ĩna.

5

*Buro joejū ĩnacōari, Jesús masare ĩ gotimasiore
queti*

¹⁻³ Jājarā masa ĩna ĩnasere ĩnacōari, burojū majaejayuju. To ĩ bajirone, ĩ buerā ĩ t̄a rējañujarā. ĩna ejaro ĩnacōari, ado bajiro ĩnare gotimasios̄oyuju Jesús:

—“Masimena ĩnari, m̄u ejarēmose b̄uto bojaja ȳna”, Diore ĩre yisēnirūgūrāma, ĩ yarā ĩnarāma.

To bajiri, rojose tãm̃oɔboarine, Dios tuj̃u variquẽnarona ñarãma.

4 Yuc̃arire Dios ã bojabetire yicõari, t̃oĩasutiritiñarã quẽne, variquẽnarona ñarãma, beroj̃u ãna t̃oĩasutiritisere Dios ãnare ã yirẽtobosaroti ti ñajare.

5 “Masimena ñaja ỹuã” yirã, Dios ã ejarẽmosere s̃enirũgũrã ñari, Dios ã goticatore bajirone variquẽnaruarãma, adi macaruc̃uroana ujarã ãna ñarotire Dios ãnare ã yirẽtobosaroti ñajare.

6 Gajeye r̃etoro Dios ã bojasere yir̃uã t̃oĩarã quẽne, variquẽnarona ñarãma, “Ỹu bojasere yivariquẽnato” yig̃u, Dios, ãnare ã ejarẽmose ti ñajare.

7 Gãjerãre ãamaicõari, quẽnaro yirã quẽne, variquẽnaruarãma, Dios quẽne, ãnare ãamaicõari, quẽnaro ã yiroti ti ñajare.

8 Dios ã bojarore bajiro r̃ine quẽnase t̃oĩarã variquẽnarãma ãna quẽne, beroj̃u Diore ãrona ñari.

9 Quẽnaro ñarotire oca quẽnorã quẽne, variquẽnaruarãma, “Ỹu r̃ia ñaama” Dios ã yĩarona ñari.

10 Dios ã rotirore bajirone ãna yise s̃orine gãjerãj̃uã rojose ãnare ãna yiboajaquẽne, variquẽnaruarãma, Uj̃u Dios yarã quẽnaro ã yirã ñari.

11 Ỹure m̃uã ajitir̃unuse s̃orine gãjerã m̃uare ajatud'icõari, “Rojorã ñaama” m̃uare ãna yisocaboajaquẽne, variquẽnaruarãja m̃uã. 12 To bajiro m̃uare ãna yiboajaquẽne, b̃uto variquẽnaña m̃uã, “Beroj̃u Dios tuj̃u ejarã, quẽnase bujaruarãja” yimasirã ñari. M̃uã r̃ijoroana, Diore gotirẽtobosamasiriarãre quẽne, rojose m̃uare ãna yirore bajirone ãnare quẽne rojose yimasiñujarã masa —ãnare yiyuju Jesús.

“Adi macarucurojũre moa ocasere bajiro, to yicõari, busubatosere bajiro bajiroti ñaja mũare”, ã buerãre Jesús ã yigotimasiore queti

(Mr 9.50; Lc 14.34-35)

¹³ Quẽna ado bajiro ã buerãre ãnare gotiyuju Jesús:

—Moa ñaja bare sãre. Mũa barotire vaiũcũ rii catisere cũrãma, moa turãja mũa, “Boarobe” yirã. Moa ti ocaboase ti ocabeticoajama, “Quẽna tudio-cato” yirã, no bajiro yimasimenaja mũa. To bajiri, tire reacõarãja, “Tire masa cũdavũoreacõato” yirã. Moa ocatũjabetire bajiro mũa bajijama, quẽnaja. Yũre mũa ajitirũnũ tũjabetijama, moa ocatũjabetire bajiro bajirã ñarũarãja mũa. To bajiboarine, yũre mũa ajitirũnũ tũjajama, quẽna yũre tudiajitirũnũbetirũarãja. Mũa sũorine quẽnaro yimenama gãjerã. To bajiri mũare bojabetirũcũja — ãnare yiyuju Jesús.

¹⁴ Quẽna ado bajiro ãnare gotiyuju:

—Rẽtiarojũre busubatosere bajiro bajiroti ñaja mũare. To bajiro mũa bajijare, busubatose quẽnaro ti ruyurore bajirone mũare ãarũarãma masa. Jairimaca buro joejũ ñarimaca quẽnaro ti ruyurore bajirone mũare ãajedicõarũarãma.

¹⁵ Sãabusuariare jẽocõari, sotũne tiare mubũamenaja mũa. Tiare jẽocõari, “Ñajediro ti vianare busuato” yirã, vecajũ jeorãja mũa. ¹⁶ Tire bajirone quẽnaro yiya mũa, “ ‘Quẽnaro yirã ñaama, Diore ajitirũnũrã ñari’ yimasiato masa jediro” yirã, to yicõari, “Mani jacũ õ vecagũre quẽnase ãre yirũcũbũoato ãna” yirã — ãnare yiyuju Jesús.

Moisés ñamasir'ire Dios ã roticũmasirere Jesús ã gotimasiore queti

17 Quēna ado bajiro ĩ buerāre ĩnare yiyuju Jesús:

—“Moisés ñamasirire Dios ĩ roticūmasirere, to yicōari, Diore gotirētobosarimasa ĩna gotimasiomasirere reagḡ vayumi Jesús”, yitḡoĭabesa mḡa. Tire reagḡagḡ me vadicaḡa yḡ. “Tire quēnaro riojo ajimasiato” yigḡ, vadicaḡa yḡ. 18 Riojo mḡare gotiaja yḡ. Moisére Dios ĩ roticūmasire, to yicōari, Diore gotirētobosarimasa ĩna gotimasiore ñajediro ñacōarūgūrḡaroja. Adi macarḡcḡro jediroto rĭjoro, cojo vāme godocḡtibetirḡaroja. Ñajediro Dios ĩ gotiriarore bajirone bajirḡaroja. 19 No bojagḡ, Moisére Dios ĩ roticūmasire ñamasuse me ti ñaboajaquēne, tire cḡdibecḡ, “No yibeaja, mani cḡdibetijaquēne” yigotimasiogḡ ñagḡmi quēnabecḡ. Ḳḡ Dios yarā quēnaro ĩ yirā rācagḡ ñamasugḡ me ñarḡcḡmi ĩ ūgḡma. No bojagḡ Moisére Dios roticūmasirere cḡdicōari, “Tire mani cḡdijama, quēnaja” yigotimasiogḡ ñagḡmi quēnagḡ. To bajiri Ḳḡ Dios yarā quēnaro ĩ yirā rācagḡ ñamasugḡ ñarḡcḡmi ĩḡama. 20 Riojo mḡare gotiaja yḡ. Moisére Dios ĩ roticūmasire gotimasiorimasa, fariseo masa quēne, quēnaro ĩna yiboase rētoro quēnaro mḡa yibetijama, Ḳḡ Dios yarā me ñarḡarāja mḡa quēne.

21 Dios ĩ rotimasire gotimasiorimasa sḡorine ado bajise ajirūgḡaja mḡa: “Sĭabesa. ĩ sĭajama, ĩ sĭase vaja ĩre sĭaroti ñaja”, yimasirere ajirūgḡaja mḡa. 22 Yḡma, ado bajiro mḡare gotirēmoaja: Jūnisinire quēne rojose ñaja. No bojagḡ gājire jūnisinigḡ ĩ jūnisinise vaja rojose ĩre yiroti ñaja. No bojagḡre gājire jūnisinicōari, rujajine, “Vaja magḡ ñaja mḡ” ĩre yigḡma, rujajine ĩ yise vaja, “Rojose

tãm̃uorũcũmi”, ãre yirũarãma ɸjarã. No bojagure, gãjire jũnisinicõari, ãre tud'igũrema, ã tud'ise vaja, jeame yatibetimejũ ãre cõacõarũcũmi Dios, mũare yaja yũ.

²³ Tire masirã ñari, gajeyere quẽne tũoĩaña mũa. Diore rũcũbũorã soemũoriajũ vacũne, “Rojose ãre yibũ yũ” mũa yitũoĩabũjajama, Diore rũcũbũorã ãre mũa soemũoĩsirotire soemũobeja maji. ²⁴ Tire cũcõari, rojose mũa yir'i tũjũre vasa, ãre oca quẽnorõana. ãre oca quẽnogajanocõari, Diore soemũoĩsiroana tudivaja yuja, mũare yaja yũ. “Rojose mũa yir'ire oca quẽnocõari rĩne, Diore oca quẽnomasirũarãja”, mũare yigũ yaja.

²⁵ Gajeye ado bajiro bajiaja: Gãjire rojose mũa yijama, oca quẽnorimasũ tũjũ mũa ejaroto rĩjoro, ã rãca oca quẽnoroti ñaja mũa jũarãjũne. Oca quẽnorimasũ tũ ejamenane, mũa oca quẽnobetijama, masare coderimasũre juarotirũcũmi, mũare. ãjũa, mũare tubiberũcũmi. ²⁶ Riojo mũare gotiaja yũ. Rojose mũa yire vaja mũa vaja yibetijama, budimenaja mũa. Tire bajirone bajirũaroja Dios ã vaja sãnirirũmũ ejaroto rĩjorojũa, rojose mũa yir'ire ãre oca quẽnoña. Mũa gãmerã oca quẽnobetijama, Dios ã vaja sãnirirũmũ rojose tãmũotũjabetiriarõjũ mũare cõarũcũmi, tudibudire manõjũ — ãnare yiyuju Jesũs.

“Gãji manajore rũcũbũoya”, Jesũs ãyigotimasiore queti

²⁷ Quẽna gajeye ado bajiro yiyuju Jesũs:

—Dios ã rotimasire gotimasiõrimasa sũorine ado bajisere ajirũgũaja mũa: “Gãji manajo rãca ajerio cõtibesa”, yirere ajirũgũaja. ²⁸ Yũma, ado bajiro mũare gotirẽmoaja: Rõmio, no bojagore

yirua tũoĩare quẽne rojose ñaja. No bojagũ, rõmiore yirua tũoĩagũ, ã tũoĩasene sore ajerio cutigũ yigũmi ã ùgũma, mũare yaja yũ —yiyuju Jesús.

“Bũto mũa maise ti ñaboajaquẽne, ti sũorine Dios ã bojabeti ñaja’ mũa yijama, tire reacõaña”, Jesús ã yigotimasiore queti

²⁹ Quẽna ado bajiro gotimasioñuju Jesús:

—“Yũ cajea riojojacatuaga sũorine ãbojacõari, rojose yibũ yũ” mũa yitũoĩajama, tiare ãmirocacõaña. Coja cajea mũare ti manijama, quẽnabetoja. To bajiboarine, jũajũne caje cuticõari, mũa bajireajama, jeame yatibetimejũ mũa vajama, rõtobũsaro quẽnabetirũaroja. ³⁰ “Yũ ãmo sũorine rojose yibũ yũ” mũa yitũoĩajama, ti ãmore jatarocacõaña. Mũare cojo ãmo ti manijama, quẽnabetoja. To bajiboarine jũãmo rãca mũa bajireajama, jeame yatibetimejũ mũa vajama, rõtobũsaro quẽnabetirũaroja —ã buerãre ãnare yiyuju Jesús.

“Mũa manajoare reabesa”, Jesús ã yigotimasiore queti

(Mt 19.9; Mr 10.11-12; Lc 16.18)

³¹ Quẽna ado bajiro ãnare gotimasioñuju Jesús:

—Gajeye ado bajiro gotiaja Moisere Dios ã roticũmasire: “No bojagũ ã manajore ã rocarũajama, ‘Mũre rocagũ yaja’ yise papera ucacõari, sore ãsiroti ñaja”, yigotiaja Dios ã rotimasire. ³² Yũma, ado bajiro mũare gotiaja: ã manajo gãji rãca so ajeri cutibetiboajaquẽne, sore ã rocajama, bũto rojose sore yigũ yigũmi ã ùgũma. To bajiro ã yise sũorine, gãji rãca so manajũ cutijama, Diojũama, “So manajũ me rãca

ajeri cutiamo”, yiñagūmi. Ɛmare quēne, gāji ĩ rocario rāca ĩ manajo cutijama, “Ī manajo me rāca ajerio cutiami”, yiñagūmi Dios. To bajiri m̄a manajoa gājerā rāca ĩna ajeriarā cutibetijama, ĩnare reabetiroti ñaja —ĩ buerāre yigotimasioñuju Jesús.

“Riojo m̄a gotijama, quēnaja”, Jesús ĩ yigotimasiore queti

³³ Quēna gajeye ado bajise ĩnare gotiyuju Jesús:

—Dios ĩ rotimasire gotimasiorimasa ado bajiro m̄are ĩna gotimasirere ajirūgūaja m̄a: “No bojase m̄a yirotere m̄a yir̄ajama, ‘Yimasucōar̄arāja ȳa. Tire ȳa yibetijama, Dios, rojose ȳare yibogūmi’ yirā, ‘Yir̄arāja’ m̄a yirore bajirone yiba”, yirere ajirūgūaja m̄a. ³⁴⁻³⁶ To bajiri cojojirema m̄a gotirore bajiro yiterā ñari, ado bajiro t̄oĭavasoaboaja m̄a: “ ‘Dios vāme rāca riojo yaja’ mani yijama, rojose manire yibogūmi” yirā ñari, “Dios vāmere gotivasoarā yaja ȳa” yirā, gaje vāmere õ vecayere gotiboaja m̄a. To bajiro yimena quēne, gaje vāme rāca, macar̄uc̄roayere yiboarāja. Tire yiterā, Jerusalén vāme cuti macayere yiboarāja. To bajiro m̄a yibetijama, gaje vāme rāca, m̄a r̄ujoare quēne, to yicōari, m̄a joare quēne yiboarāja m̄a, ñise, botise m̄a joare godoveomasimena ñaboarine. Ti ũnire yibetiroti ñaja. ³⁷ “Yir̄arāja” yirā quēne, “Yir̄arāja” yī, “Yibetir̄arāja” yirā quēne, “Yibetir̄arāja” yicōa t̄ajasa. “Socarā me yaja ȳa” yirā, gajeye m̄a gotirēmojama, vātia ũju ejarēmose rāca gotirēmorā yirāja m̄a —ĩnare yigotiyuju Jesús.

“Rojose m̄are yirãre gãmebeja”, Jesús ï yigotimasiore queti

(Lc 6.29-30)

³⁸ Quëna gajeye ado bajiro ï buerãre ïnare gotiyuju Jesús:

—Dios ï rotimasire gotimasiorimasa ado bajiro m̄are ïna gotimasirere ajirũgũaja m̄a: “M̄a cajeare ï jajama, m̄j̄ua quëne, ï cajeare jaroti ñaja. M̄a gujiare ï jajeajama, m̄j̄ua quëne, ï gujiare jajejaroti ñaja”, yimasirere ajirũgũaja.

³⁹ Ȳj̄uama, ado bajiro m̄are gotiaja: Rojose m̄are yiḡare gãmebesa. Ado bajiroj̄ua yiya: Cojojacat̄ua, m̄a vayujuare ï jajama, gajejacat̄uare quëne ïre jarotiya. ⁴⁰ Gãji, m̄are ocasãr̄u, “Rojose ȳare yibu m̄a. To bajiri, rojose m̄a yise vaja m̄a sudirore ȳare ïsiña. M̄a ïsibetijama, m̄are ocasãr̄uc̄aja ȳa” ï yijama, ïre ïsiña. To yicõari, gajease quë nab̄sariase ïre ïsirëmocõaña. ⁴¹ Sīgũ ï gajeyeũnire m̄are ũmaroticõari, “Adone c̄ucõaña m̄a” m̄are ï yiboajaquëne, m̄a vadiriac̄ucõrone gãme varëmocõarij̄u ïre c̄ubosaya. ⁴² No bojarã m̄are gajeyeũni sënirãre ïsiña. Sīgũ, gajeyeũni magũ ñari, “Ȳare vasoaya” m̄are ï yijama, ïre vasoaya —ï buerãre ïnare yiyuju Jesús.

“Manire ïaterãre quëne, mani ïamaijama, quëñaja”, Jesús ï yigotimasiore queti

(Lc 6.27-28, 32-36)

⁴³ Quëna ado bajiro ïnare yiyuju Jesús:

—Dios ï rotimasire gotimasiorimasa ado bajiro m̄are ïna gotimasirere ajirũgũaja m̄a: “M̄a babarãre quënarõ ïamaiña. To yicõari, m̄are ïaterãre ïateya”, yimasirere ajirũgũaja. ⁴⁴ Ȳj̄uama,

ado bajiro m̄are rotiaja: M̄are ĩaterãre quẽne ĩamaiña. M̄are rojose yirãre quẽne quẽnaro ĩna bajiro tire yirã, Diore ĩnare s̄enibosaya m̄a. ⁴⁵ To bajiro m̄a yijama, “Mani jacu õ vecagu rĩa ñaja yua” yĩorã yirãja m̄a, ĩ bojarore bajiro yirã ñari. Masa jedirore quẽnaro yirũgũgũmi Dios. ĩre c̄adimenare quẽne quẽnaro yirũgũgũmi. ĩ ñagũmi quẽnarãre, ro-jorãre quẽne, “Busuato” yigu, muijure busurotigu, to yicõari, ocore quẽne quedirotigu. ⁴⁶ M̄are ĩamairã rĩne m̄a ĩamaijama, ¿“Quẽnaro yaja m̄a” m̄are yi, vaja yigujari Dios? Yibecumi. Ro-jorã, ujure gãjoa s̄enibosarimasa, ĩnare ĩamairã rĩrene ĩamairũgũama ĩna quẽne. ⁴⁷ M̄a tu ejarãre m̄are bajiro bajirã rĩrene m̄a s̄enijama, ¿“Quẽnaro yaja” m̄are yi, vaja yigujari Dios? Yibecumi. Diore ajimena quẽne, ĩnare ĩamairã rĩrene ĩamairũgũama ĩna quẽne. ⁴⁸ To bajiri m̄ajama, mani jacu õ veca ñagũ quẽnase rĩne ĩ yirore bajiro yirã ñaña m̄a. M̄are rojose yirãre quẽne, m̄are bajiro bajirã mere quẽne ĩamaicõari, quẽnaro yiroti ñaja —ĩnare yiyuju Jesús.

6

“Gãjerã m̄are ĩacõari, ‘“Quẽnaro yirã ñaama” m̄are yĩarũcũbũoato’ yirã me, quẽnaro yiya”, Jesús ĩyigotimasiore

¹ Quẽna ado bajiro ĩ buerãre ĩnare yiyuju Jesús:

—Quẽnaro m̄a yijama, ““Quẽnaro yama ĩna’ yato gãjerã” yirã me, quẽnaro yiya m̄a. Masa ĩna ĩaro rĩjorojua rĩne, “‘Quẽnaro Diore c̄adirã ñaama’ yuare yĩato ĩna” yirã, m̄a yĩoboajama, ñie vaja b̄jamenaja m̄a, õ vecaju mani jacu Dios tujũ

ejarã. ² Sīgũri, “Quẽnarã ñaja yua” yiboarine, ña yirore bajiro yirã me ñarãma ña. Ado bajirojua yirã ñarãma: Maioro bajirãre ejarẽmorã, ñare ña Ìsijama, masa jedirore gotibatorãma. Dios ocare ña buerivijure rẽjarãre quẽne, jãjarã masa ña vati maarijure quẽne ñacõari, ñare gotibatorãma, “‘Quẽnarã ñañuma’ yuare yĩarũcũboato” yirã. To bajiro ña yirore bajiro yibesa ma. Riojo maare gotiaja yu. To bajiro ña yise vaja masa ñare ña rũcũbosene jẽre vaja bujacõama ñama. Ñie gajeye bujarẽmobetiruarãma, Dios tujure. Ñare masa ña rũcũboobojaquẽne, Diojuma, ñare rũcũbobetirucumi. ³ Mũajuma, maioro bajirãre ma ejarẽmojama, “‘Quẽnaro yirã ñaama ña’ yuare yĩato” yirã me, ñare ejarẽmoña. To yicõari, ma baba ñamasugũre quẽne, “To bajiro yibu yua” yigotimenane, ñare ejarẽmoña. ⁴ To bajiro maioro bajirãre quẽnaro ma yijama, masa ñabetore bajiro yirã yiruarãja ma. To bajiro ma yijama, mani jacu, masa ñabetojũ ñamasigũ ñari, quẽnaro ma yise vaja, quẽnaro maare yirucumi —ĩ buerãre ñare yiyuju Jesús.

*Diore mani sẽniritire Jesús ñ gotimasiore queti
(Lc 11.2-4)*

⁵ Quẽna ado bajiro ñare gotimasioñuju Jesús:

—Sīgũri, “Quẽnarã ñaja yua” yiboarine, ña yirore bajiro yirã me ñarãma ña. Ado bajiro yirã ñarãma: Diore ña sẽnijama, Dios ocare ña buerivirijũ rũgõcõari, sẽnirãma. To yicõari, jãjarã masa ña vati maarijure quẽne ñacõari, Diore ñagõrãma. To bajiro yirãma, masa ña ñarũcũbosere bojarã ñari. To bajiro ña yise vaja

masa ñna ñarũcũbuosere jẽre bujacõarãma ñna. Ñie gajeye bujarẽmobetiruarãma, Dios tujare. Ñnare masa ñna ñarũcũbuoboajaquẽne, Diojũama, ñnare ñarũcũbuobetirucumi. To bajiri, mũama, Diore mũa ñagõjama, ñna yirore bajiro Diore ñagõbesa mũa. ⁶ Mũama, Diore mũa sēnijama, gãjerã mũare ñna ñabeto sēniruarã ñnari, mũa ya sõaju tubibesãjacõari, ñre sēniña. To bajiro yicõari, mani jacũ ruyubecũre ñre sēniña. Masa ñna masibeto Diore mũa sēnijama, to bajiro mũa yise vaja, mũare vaja yirucumi mani jacũ, masa ñna ñabetiboajaquẽne mani tuoĩasere masigũ ñnari —ñnare yiyuju Jesús.

⁷ Quẽna ado bajiro ñnare gotimasioñuju Jesús:

—Dios yarã me ñarã, ñna rũcũbuogũre sēnirã, cojoji me sēniajerãma ñna, “Cojoji me tire mani sēnijama, manire ajigumi” yituoĩarã ñnari. ⁸ Ñnare bajiro yibesa mũama. Mũa bojase mũa sēniroto rĩjorojũne jẽre masicõagũmi Dios. ⁹ To bajiri Diore mũa sēnijama, ado bajiro sēniña:

“Yũa jacũ, masa ñajediro, ‘Quẽnarẽtogũ ñaja mũ’ mũre yirũcũbuoato ñna.

¹⁰ Adi macarũcũroana, mũ bojase rĩne yũa yiotire tuoĩa yurũgũaja yũa. Jẽre õ vecaju mũ ñaroju mũ yarã mũ rotirore bajirone yĩnarãma. To bajiri adi macarũcũrojũre quẽne mũ rotirore bajiro rĩne yirere bojaja yũa.

¹¹ Adirũmũ yũa barotire cõaña mũ.

¹² ‘Rojose yũa yisere masirioya’ mũre yisēniaja yũa, yũare rojose yirãre quẽne masiriorã ñnari.

¹³ Rojose yũa yiotire masigũ ñnari, ‘Tire yibeticõato ñna’ yigũ, yũare matabosaya”. To bajiro

Diore m̄ua s̄enijama, quēnaja —ĩnare yiyuju Jesús, ĩ buerãre.

¹⁴ Quēna ado bajiro ĩnare gotimasioñuju Jesús:

—M̄uare rojose yirãre m̄ua masiriojama, mani jac̄u õ vecaḡu rojose m̄ua yisere masirior̄uc̄umi ĩ quēne. ¹⁵ Gãjerãre rojose ĩna yisere m̄ua masiriobetijama, mani jac̄u quēne rojose m̄ua yisere masiriobetir̄uc̄umi —ĩnare yiyuju Jesús, ĩ buerãre.

Diore r̄uc̄ub̄orã, bare bamenane mani s̄eniroti queti

¹⁶ Quēna ado bajiro ĩnare gotimasioñuju Jesús:

—Sĩḡuri, “Quēnarã ñaja ȳua” yiboarine, ĩna yirore bajiro yirã me ñarãma. Bare bamenane Diore ĩna s̄enijama, “ ‘S̄utiritiama’ yĩato ĩna” yirã, s̄utiritirãre bajirã ñaĩorãma ĩna. To bajiro yirãma, “ ‘Ĩna, Diore r̄uc̄ub̄orã, bare bamera bajirãma’ masa ȳuare yĩato” yirã. To bajiro ĩna yirore bajiro yibesa m̄uama. Riojo m̄uare gotiaja ȳu. To bajiro ĩna yise vaja masa ĩnare ĩna r̄uc̄ub̄osene j̄ere vaja b̄ujac̄õama ĩnama. Ñie gajeye b̄ujar̄emobetir̄uarãma, Dios t̄uj̄ere. ĩnare masa ĩna r̄uc̄ub̄ooboajaquēne, Dioj̄uama, ĩnare r̄uc̄ub̄obetir̄uc̄umi. ¹⁷⁻¹⁸ M̄uaj̄uama, Diore r̄uc̄ub̄orã, bare bamenane ĩre m̄ua s̄enijama, s̄utiritirãre bajiro bajibesa. M̄ua yirũḡũore bajiro m̄ua joare quēne quēnaro siroa, riogare quēne quēnaro coe, ȳiya, “Masa ȳuare ĩac̄õari, bare ȳua babetire masibetic̄õato” yirã. To bajiro m̄ua yijama, mani jac̄u gãjerã ĩna ĩamasibetiboajaquēne, ĩamasigũ ñari, m̄uare vaja yir̄uc̄umi —ĩnare yiyuju Jesús.

*Õ vecaj# Dios t#j# quẽnase mani b#jaroti queti
(Lc 12.33-34)*

¹⁹ Quẽna ado bajiro ãnare gotimasioñuju Jesús:

—Adi macar#croj#, “Gajeyeũni jairo juarẽocũ#arãja” yirã me moaña m#a. Gajeyeũni m#a juarẽocũboasere barear#arãma gajeyeũni barimasa. Gajeyema, boar#aroja ti. To yicõari, gajeyerema juarudir#arãma juarudirimasa.

²⁰ Ado bajiroj#ma yirã ñaña m#a: “Õ vecaj# mani jac# t#j# ã bojarore bajiro quẽnaro mani yise vaja, quẽnaro manire yir#cum#i” yit#oĩacõari, quẽnaro yirã ñaña. Õ vecayej#arema, quẽnaro m#are Dios ã yisere barearã manama. Voabetir#aroja tima. To yicõari juarudirimasa quẽne, ejabetir#arãma. Dios manire quẽnaro ã yise jedibetir#aroja. ²¹ M#a vaja tarere m#a quẽnocũ vajama, ti rione t#oĩarejaicõa ñarãja m#a. Tire yimenane, “Quẽnaro y#a yise vaja õ vecaj# vaja tacũrã yaja” yit#oĩacõari, quẽnaro yirũgũña m#a.

²²⁻²³ M#a caje quẽnaro ti ruyujama, “Tine ñaja quẽnamasuse”, yĩamasajaja m#a. To bajiboarine, m#a caje quẽnaro ti ruyubetijama, quẽnabetire ãcõari, m#a masune, “Ti ñaja quẽnamasuse”, yisocar#arãja m#a. Tire bajiro bajiaja m#a t#oĩase quẽne. Dios ã bojarore bajiro quẽnaro m#a t#oĩajama, ñajediro quẽnaro riojo t#oĩamasir#arãja m#a. ã bojabetire m#a t#oĩajama, “Riojo t#oĩarã ñaja” yisocañarã rĩne, b#tob#sa t#oĩamasimena ñacoar#arãja m#a. To bajiri, quẽnabetire ãcõari, “Mani masune, ‘Ti ñaja quẽnamasuse’ yisocarobe” yirã, Dios ã bojarore bajiro quẽnaro t#oĩaña m#a —ã buerãre ãnare yiyuju Jesús.

“Diore mani rãcãbwojama, gãjoare bũto bojatũoĩaña manoja”, Jesús ïyigotimasiore queti (Lc 16.13)

²⁴ Quëna ado bajiro ïnare gotiyuju Jesús:

—Diore yirũcãbwoãma, adi macarũcuroayere bũto bojatũoĩamenama, “Diojua ñaami ñamasugũ” yitũoĩarã ñari.

²⁵ To bajiri, “Dios ñaami ñamasugũ” yitũoĩarã ñari, ïre cãdirãma, adi macarũcurojũre mua bajirotire tũoĩarejaibesa mua. “¿No bajiro bũjacõari, bare ba, idi, sudi sãña, yicatiñarãti yua?”, yitũoĩarejaibesa. Quënamasuse mani usure, to yicõari, mani rujũre manire ïsiñumi Dios. To bajiri mani baroti, mani idiroti, to yicõari sudi mani sãñarotire quëne cõarũgũrũcumi ï. ²⁶ Minia ïna bajisere tũoĩaña mua. ïna otebetiboajaquëne, to yicõari, bare ïna juarẽocũbetiboajaquëne, Dios, ïnare bare cõarũgũami. “Miniare quëne ïamaigũ ñari, manire roque rëtoro maigũmi”, ¿yimasibea ti mua? ²⁷ “Adi macarũcurojũre ñarã yoaro catiruarãja” mua yitũoĩarejaiboase, “Yoarobusa catiato” yiro, mũare ejarẽmomasibeaja ti.

²⁸ Sudi sãñarua tũoĩarejaibesa. Go bucũasere tũoĩañasaque mua: Moabeti, to yicõari, sudi sãñarua tũoĩarejaibeaja ti. ²⁹ To bajiboarine, Ujũ Salomón ñamasir'i gajeyeũni jaigũ ï ñaboajaquëne, quënose ï sudi sãñamasire rëtoro quënose ñaja ti. ³⁰ Gore bũto quënose ñarotirũgũami Dios. Quënose ñaboarine, yoaro mene sĩnicoatoja. Ti sĩniro ïacõari, tire tĩarãma masa, bare roariajaujũre. To bajiri yoaro catise me ti ñaboajaquëne, tire quënorũgũgũami Dios. Go rëtoro manire maigũmi Dios. To bajiri, “Manire

sudi cōarucami”, yimasiroti ñaja. “To bajirone yigumi Dios”, yiajiritirūnubetibusarã ñaja mña. ³¹ To bajiri, “¿No bajiro bujacōari, bare ba, idi, sudi sãña, yicatiñarãti yña?”, yituoïarejaibetiroti ñaja. ³² Dios yarã me ñarãma, tire bũto tuoïarejairãma. Manijũarema, mani jacũ õ vecagũ ñagũmi, “Ti ruyaja, ñare” yimasigũ. ³³ To bajiri, “Ujũ Dios yarã, quẽnaro ï yirã ñaja mani. Ì bojarore bajiro quẽnase rĩne yiruarãja”, yituoïarũgũña mña. To bajiro mña yijama, adi macarucuroaye mña cuobetire bujaruarãja mña. ³⁴ To bajiro ti bajijare, adirãmũ mña bajise rĩne tuoïaroti ñaja. Busiyũ mña bajiro tire tuoïarejai rĩjoro cõtibesa mña. Tocãrãcarũmũrine ricati bajirũgũaja —ĩ buerãre ñare yiyuju Jesús.

7

“Rojose yirã ñaama. Ti sũorine rojose tãmũoruarãma’ yiruarã, ñare ñabesebesa”, Jesús ï yigotimasiore queti
(Lc 6.37-38, 41-42)

¹ Quẽna ado bajiro ñare yiyuju Jesús:

—“Rojose yirã ñaama. To bajiro yirã ñari, rojose tãmũoruarãma”, gãjerãre ñare yĩabesebesa. To bajiro mña yijama, “Rojose yirã ñaama”, mñare yĩaromi Dios. ² To bajiri, gãjerãre rojose ña yise sũorine “Rojose tãmũoruarãja” mña yĩacõïajama, mñare ï beserirũmũjũ, “Rojose yirã ñaama”, mñare yĩacõïarucami Dios. ³⁻⁵ Gajeyerema, ado bajiro yirãre bajiro yaja mña: Gãji bũto rojose ï yibetiboajaquẽne, “Mũ cajeare sũjuroaca sãñaja. Tijũacare ãmirocatu” yirãre bajiro yaja mña. Tire

buto ĩatirũnarã ñaboarine, mua cajeajure jairisũjuro sãñarijaure tijaure, “Ãmirocaya” yimasibeaja mua, “Buto rojorã ñaja yua” yitũoĩamasimena ñari. Mua rãcagu ĩ yisejũare ĩacõari, “Riojo tũoĩabeaja mua. ‘Quẽnasejũare tũoĩavasoaya’ yirã, riojo mũre gotirũarãja” yigotirã ñaboarine, “Adi ñaja quẽnase. Tijua ñaja rojose”, yimasimenaja, ĩ rẽtoro rojose yirã ñari. “Quẽnaro yirã ñaja yua” yitũoĩaboarine, rojorã ñaja mua. “Buto rojorã ñaja yua” mua yitũoĩamasiro beroju, mua rãcagure ejarẽmomasirãja mua, “Quẽnaro riojo ñato ĩ” yirã —ĩ buerãre ĩnare yimasioñuju Jesús.

⁶ Quẽna ado bajiro ĩnare yiyuju Jesús:

—Buto quẽnase ñaja Dios oca. ĩ yere ajiterãre gotimasiobetirũarãja mua. “Bare quẽnase ti ñaboajaquẽne, yaia ĩna batese ti ñajama, manire jũnisinicõari, cũnisurerearũarãma ĩna” yirã, ĩnare ecabeaja mua. To yicõari, mua ye jairo vaja cutise, perla vãme cutisere yesea vatoaju reacũbeaja mua. To bajiro mua yijama, mua reacũsere bojamena ñari, tire cudavũoreacõarũarãma ĩna. To bajirone bajiaja Dios oca quẽnasere ajiterãrene mua gotimasiorũajaquẽne. To bajiri, ĩna ajirũabetire ĩamasicõari, ĩnare gotimasiasibetirũarãja mua —ĩnare yiyuju Jesús.

“Diore mua sẽnijama, mũare cudirũcũmi”, Jesús ĩ yigotimasiore queti

(Lc 11.9-13; 6.31)

⁷ Quẽna ado bajiro ĩnare yiyuju Jesús:

—Diore mua sẽnijama, cõarũcũmi. ĩre sẽnicõari, mua macajama, bujarũarãja mua. Sĩgũ no bojase ĩre ti ruyajama, gãji ya vijũ ejaõari

sājaru, sēniñagūmi. Ī sēniñajare, ĩre sājartocōari, ĩre ejarēmogūmi. To bajirone bajiaja Diore sēnirāre quēne. ĩre mua sēnisere ajicōari, quēnaro muare yiejarēmorucūmi. ⁸ “Dios manire ejarēmorucūmi” yituoĩarā ñari, ĩre ĩna sēnisere ĩnare cōarucūmi. ĩna macajaquēne, bujaruarāma.

⁹ “Bare bojaja yu” mua macu ĩ yisēnijama, ĩgūtane ĩsirātique mua? ĩsimenaja mua. ¹⁰ “Vai bojaja yu” mua macu ĩ yisēnijama, ĩãña bar'i merene ĩsirātique mua? ĩsimenaja mua. ¹¹ Diore bajiro quēnase yirā me ñaboarine, mua rĩare quēnaro yaja mua. “To bajiro yirā ñaja” yimasirā ñari, “Mani jacu õ vecagure mani sēnijama, quēnaro masu manire yirucūmi”, yimasijaja mani —ĩnare yiyuju Jesús.

¹² Quēna ado bajiro ĩnare yiyuju Jesús:

—Gājerā quēnaro muare ĩna yisere bojaja mua. Tire bojarā ñari, quēnaro ĩnare yiya muaña quēne. To bajirone Moisés ñamasir'ire roticūmasiñuju Dios. To yicōari Diore gotirētobosarimasa ĩna ucamasire quēne, to bajirone yaja —ĩ buerāre ĩnare yiyuju Jesús.

“Eyabeti maa ñaja Dios tujū varia maa”, Jesús ĩ yigotimasiore queti

(Lc 13.24)

¹³ Quēna ado bajiro ĩnare yiyuju Jesús:

—Uju Dios yarā quēnaro ĩ yirā mua ñarujama, eyabetisoje, to yicōari, eyabeti maare vanare bajiro josaruarāja mua. Ti josaboajaquēne, ĩ yarā ñaña mua. ĩ yarā mejuama, jājarā ñarāma. Gaje soje eyarisojere sājacōari, to yicōari, eyari maa vanare bajiro josabetiruarāma ĩnama. Ti josabeti-boajaquēne, rojose tāmnotujabetiriaroju varona

ñarāma. ¹⁴ Eyabetisoje, to yicōari, eyabeti maare vanare bajiro josaruarāma, ʘjɯ Dios yarā quēnaro ī yirāma. Ti josaboajaquēne, Dios tɯjɯ ejacōari, ī rāca quēnaro ñacōarūgūruarāma. Jājarā me ñaruarāma ĩnama —ī buerāre ĩnare yiyuju Jesús.

*“Ti rica cūtise sʘorine yucūre ĩamasija mani”,
Jesús ĩyigotimasiore queti*

(Lc 6.43-44)

¹⁵ Quēna ado bajiro ĩnare yiyuju Jesús:

—“ʘjɯ Dios yarā quēnaro ī yirā ñari, ĩre gotirētobosarimasa ñaja yɯa quēne”, yitorimasa ñarāma sīgūri. To bajiro ĩna yitosere quēnaro ajimasiña mɯa. Tire mɯa ajimasibetijama, to bajiro mɯare ĩna yitose ñajare, Dios yere mɯa ajirūgūboasere masiriticoaruarāja. ¹⁶ ĩna gotimasiore sʘorine, “Quēnarā ñaama” yimenane, ĩna bajire cūtisejɯare ĩasɯoya mɯa. Ti rica cūtise sʘorine yucūre ĩamasija mani. ʘye juaroana, vātijota yucūrijɯre macamenaja mani. Quēnase bare higos vāme cūtire juaroana, vidirojɯ ñaricɯ savajotaɯjɯre macamenaja mani. ¹⁷ To bajiri, yucú vāɯɯquēnaricɯma, quēnase rica cūtiroja. Vāɯɯbetijɯama, quēnabetiarine rica cūticōaroja. ¹⁸ To bajiri, yucú vāɯɯricɯ, “Quēnase rica cūtiricɯ ñaja” mani yiboaricɯne, quēnabeti rica cūtibetoja. To yicōari, vāɯɯbeti, “Quēnabeti rica cūtiricɯ ñaja” mani yiboaricɯne, quēnase rica cūtibetoja. ¹⁹ Tocārāca yucūrire, vāɯɯbeticōari, rica quēnabeti yucūrire quēacōari, jeamejɯ soereacōare ñaroja. ²⁰ To bajiri yucú ricare ĩacōari, “Quēnaricɯ ñaja ti. Quēnabeti ñaja adima” mani yimasirore bajirone, “Diore gotirētobosarimasa ñaja yɯa” yirā, ĩna yisere

ĭacōari, “Quēnarā ñaama ĭna. Quēnamena ñaama ānoa”, yimasiruarāja mña —ĭnare yiyuju Jesús.

*“Ėjñ Dios ĭ bojarore bajiro yirā rĭne ñarāma ĭ yarā quēnaro ĭ yirona”, Jesús ĭ yigotimasiore queti
(Lc 13.25-27)*

²¹ Quēna ado bajiro ĭnare yiyuju Jesús:

—Ñajediro, “Yña ĩjñ ñaja mñ” yñre yirā me ñaruarāma yñ jacñ yarā, quēnaro ĭ yironama. Yñ jacñ ĭ bojarore bajiro yirā rĭne ñaruarāma ō vecajñ varonama. ²² Masare Dios ĭ beserirūmñ ti ejaro, jājarā ado bajiro yiboaruarāma: “Yña ĩjñ, yñare mñ rotijare, mñre gotirētosacajñ yña. Yñare mñ rotijare, masa usurijñ sãñarāre vātiare bureacajñ yña. To yicōari, yñare mñ rotijare, jairo ĭaĭañamani yĭlocajñ yña”, yñre yiboaruarāma ĭna, socarāne. ²³ To bajiro ĭna yiboajaquēne, ado bajiro ĭnare yirñcñja yñ: “Tire mñare yirotibeticajñ yñ. Mñare masibeaja. ¡Vasa! Rojose yirā ñaja mña”, ĭnare yirñcñja yñ —ĭnare yiyuju Jesús.

“Quēnaro ĭre ajitirñnrā, to yicōari, ĭre ajiboarine, ĭre cñdimenama, ado bajiro bajirāma”, Jesús ĭ yigotimasiore queti

(Mr 1.22; Lc 6.47-49)

²⁴ Quēna ado bajiro ĭnare yiyuju Jesús:

—Mñare yñ gotimasiosere ajicōari, yñ rotirore bajiro yigñ, quēnaro tñoĭagñ ñagñmi ĭ ũgñma. ĭ ñagñmi gñtajñjñ gojeri coajocōari, botari rñgōcōari, vñ buagñre bajiro bajigñ. ²⁵ Vi ĭ buaro bero, bñto oco quediroya. Bñto mino vatoja. To bajicōari, riaga jaicoatoja. Ti vijñ ti jaiejacoaboajaquēne, juriaquedibetoja ti vi. ²⁶ Yñre ajiboarine, yñ rotirore bajiro yibecñña

ñagũmi sita vajaroju vi buagure bajiro bajigu. ²⁷ Ti vi i buaro bero, buto oco quediroya. Buto mino vatoja. To bajicõari, riaga jaicoatoja. Ti vijure ti jaiejarone, yoaro mene juriaquedicoatoja —i buerãre ñnare yiyuju Jesús.

²⁸⁻²⁹ To bajiro Jesús ñnare i yigotimasioro bero, Dios i rotimasire gotimasiorimasare bajiro me, ujure bajiro bojonebecune quẽnaro i gotimasiojare, ajiñañamani i gotise ti ñajare, no yimasibesujarã ñna.

8

Gase boagure Jesús i catiore queti (Mr 1.40-45; Lc 5.12-16)

¹ Buroju ñnar'i, Jesús i rojaejarone, jãjarã masa ñre sayayujarã. ² To ñna bajirone, sīgũ gase boagu Jesũre vacãnamuacõari, i rĩjoroju gusomuniari tuetuejayuju, ñre rãcubogũ. To yicõari, ado bajiro Jesũre ñre yiyuju:

—Yũ ujũ, yũ cãmire mũ yarũajama, yaya —yiyuju.

³ To bajiro ñre i yisere ajicõari,

—Mũ cãmire yarũcũja yũ —ñre yigũne, ñre moañañuju Jesús.

To bajiro i yirirĩmarone, i cãmĩ ñre yaticoasuju yuja. ⁴ To ñre yigajanocõari, gãjerãre ñre gotirotibesuju Jesús. To bajiro ñre yicõari, ado bajiro ñre yiyuju:

—Yucũacane paire mũ rujure ñoaya. To yigũne, Moisere Dios i roticũmasiriarore bajirone vaibucurã ecariarãre siacõari, paire ñsima, Diore rãcubogũ. To mũ yisere ñacõari, “Caticoasumi”, yiruarãma masa —ñre yiyuju Jesús, gase boaboar'ire.

*Surara ɯjɯre moabosarimasɯre Jesús ĩ catiore
queti*

(Lc 7.1-10)

⁵ Capernaum vāme cɯti macajɯre Jesús ĩ ejaro ĩacōari, ĩ tɯjɯ vayuju surara ɯjɯ. Romano masɯ ñañuju ĩ. Jesús tɯ ejacōari, rɯcɯbɯose rāca ado bajiro ĩre sēniñuju:

⁶ —Yɯ ɯjɯ, yɯre moabosarimasɯ ĩ bajisere aji-maiña. Yɯ ya vijɯ rijajesami. Micacōari, bɯto visiomi —Jesúre ĩre yiyuju surara ɯjɯ.

⁷ —Īre catiogɯ varɯcɯja yɯ —Īre yicɯdiyuju Jesús.

⁸ To ĩ yiboajaquēne, ado bajiro ĩre cɯdiyuju surara ɯjɯ, Jesúre:

—Yɯ ɯjɯ, quēnagū masu ñaja mɯ. Yɯma, ro-jose yɯ yisere tɯoĭa bojonegū ñari, yɯ ya vire mɯre sājaretimasibecɯja yɯ. Tojɯ sājabetiboarine, mɯ ñagōtɯoĭasene catiomasigūja mɯ. ⁹ Gājerā surara ɯjarā beroagɯ ñaja yɯ. To bajiri, yɯ quēne, gājerā surarare rotigɯ ñaja yɯ. Sīgūre, “ĭVasa!” yɯ yijama, vajami. Gājire, “Vayá” yɯ yijama, vadiami. To yicōari, yɯre moabosarimasɯre, “Tire yiya” yɯ yijama, yirūgūami. To bajiri, mɯ roque rotigɯ masu ñari, tojɯ vabetiboarine, mɯ ñagōtɯoĭasene caticoarɯcɯmi —Jesúre yiyuju.

¹⁰ To bajiro ĩ yisere ajiyamanire bajiro ajitɯoĭañuju Jesús. To bajiri ado bajiro ĩnare yiyuju, ĩre sɯyarāre:

—Riojo mɯare gotiaja yɯ. Israel ñamasir'i jānerabatia yɯ yarā ñaboarine, “Masigū, to yicōari, quēnagū ñari, yɯre yirēmorɯcɯmi” yɯre ĩ yitɯoĭarore bajiro tɯoĭagūre, ĩabetirūgūaja yɯ. ¹¹ Quēnaro yɯre ajiya. Īre bajiro bajirā Israel masa me, jājarā

ejaruarāma õ vecaju Dios taju. Muiju i jiadõjua vadiriarã quẽne, i rocasãtojua vadiriarã quẽne ejaruarāma. Tojare, rojorãre Dios i rearo bero, i rãca barujiruarāma ina. Ina rãca ñaruarāma Abraham, Isaac, to yicõari, Jacob ñamasir'i quẽne. ¹² Israel ñamasir'i jānerabatia Diorãca barujirona ñaboariarã, rojose ina yire sũorine rẽtiaroju ñare reacõarucumi. Tojare ñacõari, bũto rojose tãmuorã ñari, guji põguẽ, oti, yiruarāma ina —ñare yiyuju Jesús.

¹³ To yigajano, surara ujũjũare ado bajiro yiyuju:

—Mu ya viju tudiasa. “Ñamasugũ ñari, yare catiobosacõarucumi” yare mu yitũõiarore bajirone bajiruarõja —ĩre yiyuju Jesús.

To i yirirĩmarone, surara ujũre moabosarimasũ, viju rijañaboar'i caticoasuju i yuja.

Pedro ũmañicore Jesús i catiore queti

(Mr 1.29-31; Lc 4.38-39)

¹⁴ Pedro ya viju vasuju Jesús. Ti vi ejaõari, Pedro ũmañicore ñañuju. Cãnijesariaro joeju jesayuju so. So ruju bũto asicõari, bũbũribũjayuju. ¹⁵ Sore ñacõari, so ãmore i moañarone, ruju asicõari, so bũbũribũjaboase tũjacoasuju. To bajiri vũmũrũgũcõari, bare ĩre ecayuju so.

Jãjarã, rijaye cãtirãre Jesús i catiore queti

(Mr 1.32-34; Lc 4.40-41)

¹⁶ Tirũmũ rãiorijũne juajoyujarã, ina usũrijũ vãtia sãñarãre Jesús taju, “Vãtiare ñare bureato” yirã. To ina yiro ñacõari, cojõji ñagõgũne, vãtiare bureayuju Jesús. Jãjarã ñañujarã ina usũrijũ vãtia sãñarã, masa ina juajoriarã. To yicõari, rijaye cãtirãre quẽne catiõuju. ¹⁷ To bajiro bajiyuju,

Isa'ias, Diore gotirētobosarimasu ñamasir'i, “To bajiro bajiruaroja” ï yucomasire ti ñajare. Ado bajiro ucamasinumi Isa'ias: “Mani rijaye cutire catorucumi. To yicōari, josari mani tāmnoñasere yirētobosarucumi” yucomasinumi Isa'ias, Jesús ï catorotire yigu.

*“Yure muna ajisuyarujama, josaruaroja ti”, Jesús ï yigotimasiore queti
(Lc 9.57-62)*

¹⁸ Cojorūm tujarã masa ï tujm ñna ñagānibiaro ñacōari,

—Gajecatujm jēacojaro mani —ï buerāre ñnare yiyuju Jesús. ¹⁹ To ï yise rācane, sīgū, Dios ï rotimasire gotimasiorem, Jesús tuj ejayuju.

—Gotimasiorem, no bojaro muna vato cōrone mare suyaruja yu —Jesúre ñre yiyuju ï.

²⁰ To ï yirone, ado bajiro ñre cadiyuju Jesús:

—Buyairoarema, ñna gojeri ñacajm. Miniare quēne, ñna jiburi ñacajm. To ñna bajiboajaquēne, yu, Dios ï cacuma, cānirijm magūre bajiro bajiaja yu. To bajiri yure muna suyajama, bato mare josaruaroja —ñre yiyuju Jesús, Dios ï rotimasire gotimasiorem.

²¹ To ï yiro bero, gāji Jesús buerimasu ado bajiro ñre yiyuju:

—Ym ujm, yure yuya muna maji. Ym jacu ï bajirocaojare, ñre yujegucm yaja yu. ñre yujecōari bero, mare suyaruja yu —Jesúre ñre yiboayuju.

²² To bajiro ñre ï yiboajaquēne, ado bajiro ñre cadiyuju Jesús:

—Yucane yure suyaya mu. Yure ajitirunumena, rijariaräre bajiro bajirã ñarãma. Ñajua rijariaräre yujeato ña —İre yicadiyuju Jesús.

Mino vatone, oco sabesere Jesús ĩ tujore queti
(Mr 4.35-41; Lc 8.22-25)

²³ Jesús ĩ buerã rãca cūmuaju vasãjajuju, jěacu.

²⁴ Ña jěatone, bato mino vasuju. To bajicōari, bato sabeyuju. Ti saberone, cūmua sagueca yiro, ru-jacoaruyaju. To ti bajiboajaquēne, cānigū yiyuju Jesús. ²⁵ ĩ cāniro ĩacōari, İre yujioyujarã ña:

—Yua ujū, ĩrujareana yaja mani! To bajiri mani rujaborotire yirētoña mu —İre yiyujarã.

²⁶ To bajiro ña yirone,

—¿No yirã bato güiati mua? “Rojose mani tãmuoboajaquēne, manire yirētobosarucumi”, yure yituoïarã me ñaja mua —İnare yiyuju.

To yi, vāmurūgūcōari,

—¿Mino tujaya! İSabese quēne tujaya mua! — yiyuju Jesús.

To ĩ yirone, tujacoasuju mino. Sabese quēne, sabebesuju yuja. ²⁷ Tire ĩacōari, no yimasibesujarã ña.

—¿Ñimū ũgū masū ñati āni? Minore to yicōari, sabesere quēne ĩ tujarotijama, İre ajiaja —gãmerã yiyujarã ña.

Gadara vāme cuti maca tñanare ña usurijū
sāñaräre vātiare Jesús ĩ bureare queti
(Mr 5.1-20; Lc 8.26-39)

²⁸ Etabusura gajejacatūaju Gadara vāme cuti maca tujū ejayujarã. To ña ejarone, masa rijari-aräre ña yujereariavijure juarã ũmua budiyujarã. To bajicōari, Jesús tare ejarūgū ejayujarã. Juarājune

vātia sãñarã ñari, bũto guayujarã. To bajiro ñna bajijare, rētomasiña mañuju. ²⁹ Jesúre ñarãne, ado bajiro yivasãñujarã ñna usurijure sãñarã, vātia:

—¿No yigũ yua tu vadiati Dios macũ? ¡Yuaare gōjanabiobesa! Rojose yua yise vaja, rojose yuaare mũ yirotirãmũ ti ejabetiboajaquẽne, ¿rojose yuaare yigũ vadiati mũ? —Jesúre yiyujarã vātia.

³⁰ To ñna yiñaro sojua jãjarã ecariarã yesea macabañañujarã. ³¹ Ñnare ñacõari, rũcũbũose rãca Jesúre yisēniñujarã vātia:

—Yuaare mũ bureajama, õa yeseajuaare yuaare sãjarotiya —yiyujarã vātia.

³² To bajiro ñre ñna yijare,

—Mũare varotiaja yũ —vãtiare ñnare yiyuju Jesús.

To ñ yirone, juarãjũrene ñna usurijure sãñaboariarã budicoasujarã yuja, yeseajuaare sãjaroana. Ñna sãjarone, buro ñmaroja vacõari, utabũcũrajũ ñna ñaro cõrone rearoderujacõa tũjasujarã, vātia ñnare ñna sãjajare.

³³ Yeseare coderimasa, to bajiro ñna bajisere ñacõari, ñmacoasujarã, ñna ya macajũ vana. To bajicõari, vātia sãñaboariarã ñna yiecose ñaro cõrone ti macanare gotijeocõañujarã ñna. ³⁴ Tire ajicõari, Jesúre ñarã vasujarã ñna, ti macana jediro. Ñ tu ejacõari, ñre gũirã, rũcũbũose rãca ñre varotiyujarã.

9

Micagũre Jesús ñ catiore queti

(Mr 2.1-12; Lc 5.17-26)

¹ To bajiro ñre ñna yijare, utabũcũra gajejacaũajũ tudijẽa ejacoasuju Jesús, ñ ya macajũ. ² Ti macajũ ñ ñaro, micagũre rijarã ñmivariajũ joejũ ñre

ãmiejayujarã. “Ïre ãamaicõari, ãre cationucumi” ãna yituoïasere ãamasicõari, micagũjũare ado bajiro ãre yiyuju Jesús:

—Yũ maigũ, tuoïatutuaya. Rojose mũ yirere mũre masiriocõaja yũ —ãre yiyuju Jesús.

³ To ã yisere ajicõari, ti macana sãgũri Dios ã rotimasire gotimasiorimasa ado bajiro tuoïañujarã: “To bajise ã ñagõjama, Diore ãre rãcũbũobecu yami”, yituoïañujarã ãna. ⁴ To bajiro ãna yituoïasere ãamasicõari, ado bajiro ãnare yiyuju Jesús:

—“Diore bajiro masa rojose ãna yisere masiriomasiaja’ yisocaami”, yũre yituoïaboaja mũa. ⁵ “Rojose mũ yisere masiriocõaja” yũ yicõa tũjajama, “Socũ yami. Socũ me yami”, yũre yĩãmasigũ magũmi. To bajiboarine, micagũre, “Vũmũrũgũcõari, vasa” ãre yũ yijama, “Socũ me yami. Rojose ã yirere masiriocõami”, yũre yĩãmasirãja mũa. ⁶ To bajiri, “Dios ã roticõacacũ ñari, Diore bajirone masare rojose ãna yisere masiriomasigũ ñaami’ yũre yĩãmasiatio” yigũ, ãni micagũre ado bajiro yaja yũ: Vũmũrũgũña mũ. Mũ jesarijũre ãmiña. To yicõari, mũ ya vijũ tudiasa, ãre yaja yũ —ãre yiyuju Jesús.

⁷ To ãre ã yirone, micagũ ñaboar’i, vũmũrũgũcõari, ã jesarijũre ãmi, ã ya vijũ vacoasuju ã yuja. ⁸ To bajiro Jesús ã yisere ãacacoasujarã masa. “Ti ãnire ãabetirũgũcajũ mani. ãni, Dios ã masise rãca yigũ yami” yituoïacõari, “Quẽnaro yaja mũ”, Diore ãre

yivariquēnañujarã ñna.^b

Mateore Jesús ñ jire queti

(Mr 2.13-17; Lc 5.27-32)

⁹ Micagãre catiogajano vagune, Mateo vãme cutigure yure ñabujacami Jesús. Ujũre gãjoa sēnibosarimasu ñacaju yu. Gãjoa sēnirã ñna rujirijũre gãjoa sēnirujicaju. To yu yĩnaro ñacõari,

—Yure ajisuyaya —yure yicami Jesús. To bajiro ñ yisere ajicõari, ñre sũyacoacaju yu yuja.

¹⁰ Yu ya vijũ ejacaju yua. To ejacõari, bacaju yua. Yu rãca barã ejacana, jãjarã ñacama. Yu yicatore bajiro rojose yirã, ujure gãjoa sēnibosarimasa, to yicõari, gãjerã, “Rojose yirã ñaama” masare yĩarã quēne ñacama. Jesús buerimasa quēne ñacama. ¹¹ To yua bajirone, ejacama fariseo masa. Ñna ñacama, Moisére Dios ñ roticũmasirere buto ajirũcubũorã, rojose yirã rãca ñaruamena. Ejacõari, yua bañasere ñacõari, yu rãcanare Jesús buerimasare ñnare sēniñacama:

—¿No yigũ mũare buegũma, ãnoa rojose yirã rãca bati? —yicama ñna.

¹² To bajiro ñna yisere ajicõari, ado bajiro ñnare cudicami Jesús, fariseo masare:

—Catiquēnarãma, uco yigure bojamenama. Ri-jaye cutirã rĩne ñre bojarãma ñna. To bajiro bajiaja yure quēne. “Rojosere yirã me ñaja yua”, yirãma, yure bojamenama. “Rojose yirã ñaja yua” yirã rĩne yure bojarãma. ¹³ Dios oca masa ñna ucamasirere ado bajiro quēnaro tũoñaña mũa. Ado bajiro gotiaja

b 9:8 Rĩjorojũrema Mateo “Yiyuju Jesús” yiucauyumi, capítulo 1, to yicõari, capítulo 9 versículo 8, ñ rãca ñnabetirí ñari. Capítulo 9 versículo 9, to yicõari, tusari capítulo 28, ñ rãca ñarí ñari, “Yicami”, yiucauyumi yuja.

ti: “Gãjerãre m̄ua ãmaisere bojaja yu. Gãjerãre m̄ua ãmaibetijama, vaibucãrã ecariarãre sãacõari, yure m̄ua soem̄uoboajaquẽne, ñie vaja manoja ti”, yigotiaja Dios oca, masa ãna ucamasire. Quẽnaro yirãre jiḡu me, adi macarucuroj̄ure vadicaju yu. Rojose yirãre, “Rojose ãna yisere yitajato” yiḡu, vadicaju yu. To bajiri to bajiro yit̄uõãgũ ñari, ãnoa rãca baḡu yaja yu —Ûnare yicami Jesús.

“Mani sutiritisere ãacõari, quẽnaro manire ejarẽmor̄uc̄ami Dios” yirã, bare babetire queti
(Mr 2.18-22; Lc 5.33-39)

¹⁴ Juan vãme cutiḡu, masare oco rãca bautizari-masu buerã, Jesús t̄uj̄u ejacama ãna. To bajicõari, ado bajise ãre s̄eniãacama:

—Yua quẽne, fariseo masa quẽne, mani ñicua ãna yimasiriarore bajiro Diore yua s̄enirir̄um̄ir̄ema bare babetir̄uḡuja yua. ¿No yirã tire yibeati m̄u buerãma? —Ûre yicama Juan buerimasa.

¹⁵ To ãna yisere ajicõari, ado bajiro ãnare gotimasiocami Jesús:

—Sĩgũ ã ãmosiarir̄um̄ure ãre variquẽnaejarẽmorã ñarãma. To ã ãmato yiñaro cõro ãre variquẽnaejarẽmorãma. Ûnare bajiro bajiamama buerã. Yu rãca ñari, variquẽnacõa ñaama. “Sutiritimena ñari, no yirã bare babeticõa yimenama”, yimasire ñaja. To bajiboarine, cojor̄um̄u yure ãna ñiavato ãacõari, bare bamenane Diore s̄enir̄uarãma, “Mani sutiritisere ãacõari, quẽnaro manire ejarẽmoato Dios” yirã.

¹⁶ Mame oca yu gotimasiose ricati ti ñajare, yu ye rãca mani ñicua ãna yimasirere m̄ua t̄uõãv̄uojama, quẽnabeaja. Sudiro buc̄ase ti

vojama, mamagasero rāca seretumasimenaja mani. Mamagaserone mani seretujama, mani coero bero carato tātutu vatone bꝰcꝰasejꝰa vocoatoja. Bꝰcꝰase, mamase rāca mani seretumasibetore bajirone, mame oca yꝰ gotimasiosere, mani ñicꝰa oca rāca tꝰoĩavꝰobesa mꝰa.

¹⁷ To bajirone bajiaja ꝰye oco quēne. Mame ꝰye ocore, vaibꝰcꝰgaserone quēnorajoa bꝰcꝰjoajꝰare jiomenaja mani. Bꝰcꝰjoajꝰare mani jiojama, jāmꝰsĩnituca yiro, yivocōaroja tjoajꝰare. To bajiro mani yijama, ꝰye ocore, vaibꝰcꝰgaserone quēnorajoare quēne, to bajirone yireacōa tꝰjana yirāja mani. “To bajirobe” yirāma, mame ꝰye ocore vaibꝰcꝰgaserone quēnorajoa, mamajoaꝰare jiore ñaroja. To yicōari, ꝰye oco, vaibꝰcꝰgaserone quēnorajoa quēne, cojoro cōro quēnaro ñarꝰaroja. To bajiri mame ꝰye ocore, bꝰcꝰjoajꝰare mani jiobetore bajiro mame oca yꝰ gotimasiosere, mani ñicꝰa oca rāca tꝰoĩavꝰobesa mꝰa —ĩnare yicami Jesús.

*Jud'io masa ꝰjꝰ macore Jesús ĩ catiore queti
(Mr 5.21-43; Lc 8.40-56)*

¹⁸ To bajise Jesús ĩ gotiñarone, sīgꝰ jud'io masa ꝰjꝰ ejacami. Ejacōari, Jesús rĩjoroꝰa gꝰsomuniari tuetucami, ĩre rācꝰbꝰogꝰ. To yigꝰne, ado bajiro Jesúre yicami:

—Yꝰcꝰacane yꝰ maco bajirocacoamo. So tꝰ ejacōari, sore mꝰ moaĩajama, tudicaticoarꝰocomo so —Jesúre yicami.

¹⁹ To ĩ yisere ajicōari, ĩre sꝰyacoacami Jesús. To bajiri yꝰa, ĩ buerimasa quēne vacajꝰ. ²⁰⁻²¹ To yꝰa vatone, sīgō rōmio rijago Jesús sꝰyaroꝰa

ejarügãriomo. Gãmorõmi cutigo ñañumo so. Juaãmo cõro, gũbo jua jẽnituari cãmari rijañañuju. “Jesús sudiro gaja moañajaja yu. Ti rĩne bojaja yu. To bajiro yu yijama, quẽnaejacoarũocoja yu”, yiriomo so. To bajiro yirio ñari, Jesús sayarojua ejarügũcõari, ĩ sudiro gajare moañariomo. ²² So moañasere masicõari, jũdarügũcami Jesús. To yicõari, ado bajiro sore goticami:

—Variquẽnaña yu maigõ. “Ĭ sudiro gajare yu moañajama, quẽnaejacoarũocoja yu” yure mu yitũoĩase ñajare, “Quẽnaejato” mure yibu yu —sore yicami Jesús.

To bajiro ĩ yirirĩmarone, quẽnaejacoacamo so yuja.

²³ To yi vanane, uju ya vijũ ejacoacaju yua, Jesúrãca. Ĭ macore yujeroana, tõroari juti, yioti avasãñacama^C ²⁴ To bajiro ĩna yĩñajare, ado bajiro ĩnare yicami:

—Budiasa mua. “Bajirocacoajamo” mua yiboago, bajirocabetesumo. Cãnigõ yigomo —ĩnare yicami Jesús. To ĩ yijare, ĩre ajacama ĩna, “Bajirocacoamo” yimasirã ñari.

²⁵ Masa ĩna budiato bero, bajirocario tũju jãjacõari, so ãmore ñiacami Jesús. To ĩ yirone, quẽna tudicaticõari, vãmũrügũcoacamo so. ²⁶ Jesús sore ĩ catiosere ti sitana masa ñaro cõrone gotibatocõañuma ĩna.

Juarã caje ĩamenare Jesús ĩ ĩarotire queti

²⁷⁻²⁸ Toju ñariarã yua cãnirivi yua tudiatone, caje ĩamena juarã Jesúre avasã sayadicama:

^C **9:23** To bajiro ĩna yijama, ĩna yirügũriarore bajiro yirã yiyujarã.

—Uju David ñamasir'i jãnami, “Rotimorũgõrũcũja mũ” yigu, Dios ï cõar'i ñaja mũ. Yũare ñamaiña —Jesúre yisũyacama ña. Viju yua sãjajearone, ña quẽne sũyasãjajacoacama.

To ña bajirone, ado bajiro ñare sẽnĩacami Jesús:

—“Yua caje ñabetire ‘Ïato’ yigu, yũare ejarẽmomasiũmi”, ¿yũre yitũoĩati mũa? —Ñare yicami Jesús.

—Yua uju, to bajirone mũre yitũoĩaja yua —ĩre yicũdicama.

²⁹ To ña yijare, ña cajere moaĩagũne ado bajiro yicami Jesús:

—“Manire catorũcũmi” yũre mũa yitũoĩase sũorine mũare ñarotiaja yũ —Ñare yicami.

³⁰ To ï yirone, ñacõacama. To yicõari, ado bajiro ñare goticami Jesús:

—Gãjerãre gotibetimasucõama mũa —Ñare yiboacami.

³¹ To bajiro ï yiboajaquẽne, ti sitana jedirore gotibatocõañujarã ña.

Ñagõbecũre Jesús ï ñagõrotire queti

³² Ñamena ñaboariarã ña budirirĩmarone, ejacama gãjerã, ñagõbecũre ãmiejarã, vãti ï usũjũre sãjacõari, ñre ñagõrotibetir'ire. ³³ Jesús, vãtire ï burocarone, ñagõbecũ ñaboar'i, ñagõcoacami yuja. Tire ñacõari, no yimasibeticama masa:

—Adojũre, Israel sitajũre, ado bajise yigũre ñaña manirũgũmũ maji —yicama ña.

³⁴ Fariseo masajũama, ado bajiro yicama:

—Ñni, vãtia uju ï masise rãca vãtiare bureaami —yicama ña.

Jesús masare ï ïamaire queti

³⁵ Ti sitaj_u gotimasiocudijeocami Jesús. Tocãrãca maca masa Dios ocare ïna buerivirijure sãjacõari, oca quẽnasere masare ïnare gotimasiocami. “Uj_u Dios yarã quẽnaro ï yirona m_ua ñar_uajama, rojose m_ua yisere yit_ujacõari, y_ure ajitirã_uña”, ïnare yigotimasiocami. To yicõari, rijaye cãtirãre jediro catiocami. ³⁶ Oveja, _uj_u manare bajiro bajirã ñacama ïna masa. No yimasibetiboana t_uoïagõjanabidirã ñacama. To bajiro ïna bajisere ïacõari, ïnare ïamaicami Jesús. ³⁷ To bajiro ïna bajisere ïag_u ñari, ado bajiro y_uare yicami:

—Ote jairo bu_uaroja. To bajiboarine, mojoroaca ñarãma tire juarimasa. ³⁸ To bajiro ti bajijare, ote _uj_ure sãniña, ïre moabosarimasa cõato ï yirã —y_uare yicami Jesús. d

10*Ï ocare goticudis_uoronare Jesús ï besere queti**(Mr 3.13-19; 6.7-13; Lc 6.12-16; 9.1-6)*

¹ Cojorã_u ï buerimasare y_uare j_uaãmo cõro, g_ubo j_ua jẽnituarirãc_u ñarãre jirẽocami Jesús. Y_uare jirẽocõari, ado bajiro yicami:

—Masa _us_urij_u sãñarãre vãtiare, “Budiya” m_ua yijama, budir_uarãma. Rijaye cãtirãre quẽne, “Catiya” m_ua yijama, caticoar_uarãma —y_uare yicami Jesús.

d **9:38** “To bajiro ï yijama, ado bajiro yig_u yiyuju: ‘Jãjarã ñarãma y_u ocare ajicõari, y_ure ajitirã_urona. To bajiboarine, mojoroaca ñarãma y_u ocare gotirãj_ua. To bajiro ti bajijare, Diore sãniña, ‘Jãjarãb_usa y_u ocare gotirimasare cõato ï’ yirã’ yiyuju Jesús”, yiyujarã Dios oca masa ïna ucamasire buerimasa.

2-4 Juaãmo cõro, gũbo jua jẽnituarirãcũ ñacajũ yua, “Yũ ocare gotimasiodudiba” Jesús ï yicana. Ado bajiro vãme cutirã ñacajũ yua: Simón vãme cutiboacacũ, Pedro vãme cutigũ, ï bedi Andrés ñacama. To yicõari, Zebedeo rĩa ñacama Santiago, ï bedi Juan. Gãjerã, Felipe, Bartolomé, Tomás, yu Mateo vãme cutigũ, ujure gãjoa sãnibosarimasũ ñaboacacũ ñacajũ. Alfeo macũ Santiago, to yicõari, Tadeo vãme cutigũ, gãji ñacami Simón vãme cutigũ, celote yere tũoĩaboar'i. Tũsagũ Judas Iscariote vãme cuticami. Ï ñaũumi Jesúre ïsirocarocũ.

5 To bajiri yua, juaãmo cõro, gũbo jua jẽnituarirãcũre ado bajiro yuare gotimasiodud-iroiticami Jesús:

—Jud'io masa me ïna ñarimacari gotimasiodud-ibeja mũa. Samaria sita ñarimacarire quẽne vabeja mũa —yuare yicami. 6 —Israel sitana tũjure vasa. Ïna ñarãma Dios yarã ñaboariarã, oveja yayirãre bajiro bajirã —yicami. 7 —“Diore rotibosarocũ ï rotisũoroti mojoroaca ruyaja. Uju Dios yarã quẽnaro ï yirona mũa ñarũajama, rojose mũa yisere yitũjacõari, Jesúre ajitirũnaña” yigotimasiodudiba mũa. 8 Gase boarãre mũa ïajama, ïnare catioba mũa. Gãjerã no bojase rijaye cutirãre quẽne ïnare catioba. Rijariarãre tudicatioba. Masa usuriju sãñarãre vãtiare quẽne ïnare bureaba. Vaja manone to yirotire mũare ujoaja yu. To bajiri, vaja sãnimenane, mũa quẽne gotimasiodudi, rijaye cutirãre catio, ïna usuriju sãñarãre vãtiare ïnare burea, yicudirũarãja mũa —yuare yicami Jesús. 9 —Mũa vaja yiroti gãjoa juaábeja. 10 To yicõari, bare sãriajoari juaábeja mũa. Sudi mũa sãñasene

sãñacõari, vaja. Gajeye gũbo sudi mũa vasoaroti juaábeja. Tueriayucárire quẽne juaábeja. No bojarã gãjerãre moabosarimasa, vaja bũjarãma. To bajirone bajirũaroja mũare quẽne. Ìnare mũa gotimasiose vajane Ìsiecorũarãja mũa quẽne —yũare yicami Jesús. ¹¹ —Jairimaca, mojorimacare ejarã, quẽnaro yigũre macama mũa. Ìre bũjacõari, ì tũ cãnima. Ti macanare mũa gotimasiojama, ì tũ rĩne ñama maji, gajerojũ mũa varoto rĩjoro. ¹² Vijũ ejarã, “¿Ñati mũa?” yisẽniãcõari, “Quẽnaro ñaña mũa”, yiba. ¹³ To mũa yirone, ti viana quẽnaro mũare Ìna bocaãmijama, mũa yirore bajiro quẽnaro ñarũarãma. Quẽnaro mũare Ìna bocaãmibetijama, “ ‘Quẽnaro ñaña’ yũa yibetiriarãre bajirone ñacõaña mũa” Ìnare yì, vacoaja mũa. ¹⁴ Mũare quẽnaro Ìna bocaãmibetijama, to yicõari mũa gotisere Ìna ajirũabetijaquẽne, ti vire ñabeja. Ti vire budicõari, sitare gũbo sudi tuyasere varereaba. “Quẽnaro yũare bocaãmibeticõari, yũare mũa ajirũabetijare, rojose mũare yirũcumì Dios” yirà, to bajiro yirũarãja mũa. ¹⁵ Riojo mũare gotiaja yũ. Ti macana mũare Ìna ajirũabeti vaja Diojũama, rojose Ìnare yirũcumì masare ì beserirãmũ ti ejaro. Sodoma macana ñamasiriarã rẽtobũsaro rojose tãmũorũarãma Ìna, mũare quẽnaro bocaãmimenama —yũare yicami Jesús.

“Dios oca mũa gotise sũori, ajijũnisinicõari, rojose mũare yirũarãma”, Jesús ì yire queti

¹⁶ Quẽna ado bajiro ì buerãre yũare yicami Jesús: —Ovejare, buyairoa vatoajũ gũiorojũ Ìnare cõagũre bajiro mũare gotimasiodirotiaja yũ. To bajiri mũa ñagõroto rĩjoro, quẽnaro tũoĩama. To

yicōari, m̄are rojose ña yiboajaquēne, m̄ajuma quēnasejmare yirã r̄ine ñacōama. ¹⁷ Ado bajiro bajiroti ñajare, quēnaro t̄oĩama m̄a: M̄are ñejecōari, Dios ocare ña buerivirij̄a ñjarã r̄joroj̄a m̄are juaár̄arãma ña. Toj̄a m̄are bajer̄arãma. ¹⁸ To yicōari, ȳa ocare m̄a gotimasiojare, macari ñjarã r̄joroj̄a m̄are juaár̄arãma ña. To yi vanane, ñjarã ñamasurã r̄joroj̄a m̄are juaár̄arãma. To bajiro m̄are ña yijare, ñjarãre, to yicōari, jud'io masa mere ȳa ocare gotir̄arãja m̄a. ¹⁹⁻²⁰ Ñjarã r̄joroj̄a m̄are ña juajaro, “¿No bajiro ñagōrãti ȳa?”, yit̄oĩarejaibeja m̄a. “Ñagōña” m̄are ña yirir̄imarone, mani jac̄a Dios ñ cōagã, Esp'iritu Santo ñ ejarēmose rãca “Ado bajiro gotir̄arãja ȳa” yimasir̄arãja m̄a —ȳare yicami Jesús.

²¹ Quēna ado bajiro ȳare yicami Jesús:

—Ȳa yere ajiterãre güiose ña yisere ñar̄arãja m̄a. Sīgũ r̄ia ñaboarine, “Ñare s̄iato” yirã, ñejerotir̄arãma ña. To yicōari, jac̄a quēne, “Ȳa r̄iare s̄iato” yirã, ña r̄iare ñejerotir̄arãma. Ña r̄aj̄a quēne, ña jac̄are ajij̄ūnisinicōari, gãjerãre s̄iarotir̄arãma ña. ²² Ȳa ocare m̄a goticudijare, jediro masa m̄are ñater̄arãma. To bajiro ña yiboajaquēne, no bojarã ȳare ajitir̄an̄a t̄jamenarema, rojose t̄am̄ot̄jabetir̄iaroj̄a ña varoti ñaboarere ñare yir̄etobosar̄c̄ami Dios. ²³ Sojo maca m̄are rojose ña yijama, gaje macaj̄a rudiaja m̄a. Riojo m̄are gotiaja ȳa. Jediro Israel sitaj̄are ñarimac̄arire m̄a goticudijeoroto r̄joro, ȳa, Dios ñ roticōac̄a, adi macar̄c̄ar̄oj̄are tudiejar̄c̄aja ȳa.

24 Īnare buegɥ rētoɓusaro masirã me ñaama ĩ buerã. To bajiboarine, quēnaro ĩna buejeocōajama, ĩnare buerimasare bajirone masirãma ĩna quēne. 25 “Yɥare buegure bajiro yɥa bajijama, quēnaja”, yitɥoĩaroti ñaja. To bajicōari, ĩre moabosarimasare quēne, “Yɥa ɥjare bajiro yɥa bajijama, quēnaja”, yitɥoĩaroti ñaja. To bajiro ti bajijare, yɥre mɥa ɥjare Beelzebú yɥre ĩna vãme yitud'ijama, yɥ yarã mɥa ñajare, rētoro rojose mɥare yitud'irɥarãma ĩna — yɥare yicami Jesús.

*“Masa rojose yirãre güimenane, Diojɥare güiroti ñaja mɥare”, Jesús ĩ yire queti
(Lc 12.2-7)*

26 Quēna ado bajiro ĩ buerãre yɥare yicami Jesús: —Rojose mɥare ĩna yitud'iboajaquēne, ĩnare güibeja mɥa. “Masa ĩna ĩabeto yitud'irã yaja” mɥare ĩna yiboajaquēne, Diojɥama, ĩacōarɥcɥmi. Ñiejɥa masa ĩna yirudise maja, Diorema. Adirɥmɥri masa ĩna masibeti jediro, Dios ĩ beserirɥmɥ ti ejaro, “Quēnaro tire masiato” yigɥ, gotirɥcɥmi. 27 Masa ĩna ajibeto yayioroaca mɥare yɥ gotisere “Jediro ajiato” yirã, gotibatorɥarãja mɥa. 28 Mɥare sɩarɥarãre güibeja mɥa. Mɥa ɥsɥrijɥrema sɩamasimenama ĩna. Diojɥare mɥa güijama, quēnaja. ĩ ñaami mani catisere rotigɥ. ĩ masu masiami. To bajiri rojose tãmɥotɥjabetiriaroju mɥare reamasicōami.

29 Jɥarã miniare mani vaja yijama, cojotii gãjoatii rãca vaja yire ñaroja ti, mojoroaca vaja cɥtirã ĩna ñajare. To cōroaca vaja cɥtiboarine, Dios ĩ rotibetone rijagɥ magãmi. 30-31 Masajɥare, Dios ĩ ĩajama, jairo vaja cɥtirãre bajiro manire ĩaami.

Manire b̄to maiami ĩ. To bajiro bajiḡu ñari, mani r̄ajoajoare, cojojoara r̄ayabeto c̄õãajeogu ñaami. To bajiri rojose m̄are yirãre güibeja —ĩ buerãre ȳare yicami Jesús.

“Masa ĩna ĩaro r̄joroj̄na, Jesúsre ajitir̄ñnḡũ ñaja ȳn’ m̄na yijama, quẽnaja”, Jesús ĩ yire queti
(Lc 12.8-9)

³² Quẽna ado bajiro ȳare yicami Jesús:

—Masa ĩna ĩaro r̄joroj̄na, “Jesúsre ajitir̄ñnrã ñaja ȳna” yirãrema, ȳn quẽne õ vecaj̄n ȳn jac̄n ĩ ĩaro r̄joroj̄na, “Ánoa ñaama ȳn yarã”, ȳĩoruc̄s̄ja ȳn. ³³ To bajiboarine masa ĩaro r̄joroj̄na, “Jesúsre ajitir̄ñnrã me ñaja ȳna” ĩna yijama, ȳn quẽne, õ vecaj̄n ȳn jac̄n ĩ ĩaro r̄joroj̄na, “Ȳn yarã me ñaama ĩna”, yir̄uc̄s̄ja ȳn —ȳare yicami Jesús.

“Ȳure m̄na ajitir̄ñnsere ĩac̄õari, m̄are ĩajũnisinir̄narãma”, Jesús ĩ yire queti
(Lc 12.51-53; 14.26-27)

³⁴ Quẽna ado bajiro ȳare yicami Jesús:

—“Quẽnaro ñato masa’ yiḡn, vayumi Jesús”, ȳure yit̄oĩabesa m̄na. Dios ĩ bojabeti yirã, ȳn ocare ajjũnisinic̄õari, ȳure ajitir̄ñnrãre ĩater̄narãma ĩna. To bajiri ado bajiroj̄na ȳure yit̄oĩañã: “ ĩ s̄orine ricatiri t̄oĩar̄narãma’ yiḡn, vayumi Jesús”, ȳure yit̄oĩañã. ³⁵ ĩ mac̄n, ȳure ĩ ajitir̄ññajama, ĩ jac̄ñna ĩre ĩater̄uc̄smi. Jac̄ñna, ȳure ĩ ajitir̄ññajama, ĩ mac̄ñna, ĩre ĩater̄uc̄smi. So mac̄oj̄na, ȳure so ajitir̄ññajama, so jac̄oj̄na, sore ĩater̄uc̄ocomo. Jac̄oj̄na, ȳure so ajitir̄ññajama, so mac̄oj̄na, sore ĩater̄uc̄ocomo. So ũmañicoj̄na ȳure so ajitir̄ññajama, so j̄ejoj̄na, sore ĩater̄uc̄ocomo. ³⁶ To bajiri s̄iḡũ ȳure ajitir̄ñnḡũ ĩ ñajare, ĩ yarã ñaboarine, ĩre ĩater̄narãma.

³⁷ No bojagu ĩ jacore, ĩ jacure yure ĩ mairo rĕtobusaro maigũma, yu yu ñamasibecumi ĩ ũgũma. No bojagu ĩ macore, ĩ macure yure ĩ mairo rĕtobusaro maigũma, yu yu ñamasibecumi ĩ ũgũma. ³⁸ No bojagu, “Jesũre bajiro rojose tãmuosuyarũcũja yu” yitũoĩabecuma, yu yu ñamasibecumi ĩ ũgũma. ³⁹ No bojarã, no ĩna bojarone ñare cutirãma adi macarũcũro ñasere ĩavariquĕnacõari, Diore tũoĩamenama, Dios ĩ catisere yayibetire cũomena ñarũarãma ĩna. To bajiboarine, yure ajitirũnrã, yu oca ĩna gotisere ajijũnisinicõari, ĩna sũarãma, Dios tũ quĕnaro ñarona ñarãma —yũare yicami Jesús.

*“Ado bajiro yirã ñarãma Dios tũju quĕnase bũjarona”, yire queti
(Mr 9.41)*

⁴⁰ Quĕna ado bajiro yũare yicami Jesús:

—Mũare cõagũ yu ñajare, gãjerã tũ mũa ejaro, quĕnaro mũare ĩna yijama, yũrene quĕnaro yirã yirãma. Yũre quĕnaro yirãma, yũre cõacacure quĕnaro yirã yirãma. ⁴¹ “Diore gotirĕtobosarimasũ ñagũmi” yimasicõari, quĕnaro ĩre yirã, ĩre gotirĕtobosarimasũ Dios tũ quĕnase ĩ bũjaroto cõrone bũjarũarãma ĩna quĕne. “Quĕnaro yigũ ñaami” yimasicõari, quĕnaro ĩre yirã, quĕnaro yigũ Dios tũ quĕnase ĩ bũjaroto cõrone bũjarũarãma ĩna quĕne. ⁴² Riojo mũare gotiaja yu. Yũre ajisuyarã ñamasurã me ĩna ñaboajaquĕne, yũre ajitirũnrã ĩna ñajare, quĕnaro ĩnare yirã, to bajiro ĩna yise vaja, vaja bũjarũarãma ĩna. Ocone ĩnare ĩna ioboajaquĕne, vaja bũjarũarãma —yũare yicami Jesús.

11

*Juan vāme cūtigū, masare oco rāca bautizari-
masū ĩ cōariarā, Jesúre ĩna sēniāre queti*

(Lc 7.18-35)

¹ Yūare, ĩ buerāre juaāmo cōro, gūbo jua jēnitarirācū ñarāre yūare ĩ gotimasioro bero, ti sita ñarimacarianare ĩnare gotimasioducirā vacajū yua, Jesúrāca.

² Tirodo Juan vāme cūtigū, masare oco rāca bautizarimasū, tubiberiavijū ñañuju ĩ. Tojū ĩ ñarone, Jesús masare ĩ gotimasioducicati, to yicōari, ĩaĩañamani ĩ yīocati queti ĩre ejayuju. Tire ajicōari, juarā ĩ buerimasare cōañumi, “Jesúre sēniāaya” yigū. ³ Yua tū ejacōari, ado bajiro Jesúre sēniācama ĩna:

—¿Mūne ñati “Rotimūorūgōrūcūmi” yigū, Dios ĩ cōar’i, “Yū bero ejarūcūmi” Juan ĩ yigotimasiodacū? ¿Gājire yuroti ñatique maji? —ĩre yisēniācama ĩna.

⁴ To ĩna yisēniārone, ado bajiro ĩnare yicūdicami Jesús:

—Vasa mūa. Juan tūjū tudiasa. ĩ tū ejacōari, mūa ĩasere, mūa ajisere quēne ĩre gotiba. ⁵ Ado bajiro ĩre gotiba mūa: “Jesús ĩ masise rāca ĩ yijare, ĩabetiboariarā quēne ĩama. Rujasagueri vaboariarā quēne, quēnaro vama. Gase boariarāre quēne, ĩna cāmi yatībū. Ajimena ñaboariarā quēne, ajima. Bajireariarā quēne, tudicatima. To yicōari, maioro bajirā quēne, Dios oca quēnasere gotimasio ecoama ĩna”, yigotiba, Juan tūjū ejacōari. ⁶ To bajiri, “‘Quēnase bujaruarāma yūre ajitirūnūrā, “Socū me yami” yūre yitūoĩarāma’ yimi”, ĩre yigotiba —ĩnare yicami Jesús, Juan buerimasare.

⁷ To bajiro ï yisere ajicõari, ïna vase rãcane, Juan vãme cutigũ, masare oco rãca bautizarimasũ ï ñare quetire goticami Jesús, jãjarã ïre ajisũyarãre:

—Yucá manojũ vana, ¿ñimũ ùgũre tũoĩa vacati mũa? ¿Masa ïna bojasere bajiro yirũa tũoĩagũre ïarã vacati mũa? “To bajiro tũoĩagũ me ñacami”, yimasiaja mũa. ⁸ ¿Ñimũ ùgũre tũoĩarã vacati mũa? ¿Quẽnase sudi sãñagũre tũoĩa vacati? To bajiro me tũoĩariarãja mũa. “Quẽnase sudi sãñarãma, quẽnarivirijũ, ùjarã ya virijũ ñarãma”, yimasiaja mani. ⁹ ¿Ñimũ ùgũre tũoĩa vacati mũa? ¿Diore gotirẽtobosarimasũre tũoĩa vacatique mũa? Riojo mũare gotiaja yũ. Gãjerã Diore gotirẽtobosarimasa rẽtoro ñagũre ïariarãja mũa. ¹⁰ Juan ï bajiro tire gotiro, ado bajise gotiaja Dios oca masa ïna ucamasire:

“ “Rotimũorũgõrũcumĩ” yigũ, mũre yũ cõaroto rĩjoro, mũre gotiyurocũre cõasũorũcũja yũ maji’ yami Dios. ï ñarũcumĩ ado bajise gotirocũ: “Yoaro mene ejarũcumĩ ‘Rotimũorũgõrũcumĩ’ yigũ, Dios ï cõarocũ. To bajiri rojose Dios ï bojabetire yitũjacõari, ï bojasejũare yĩ yuya mũa” yigotirocũ ñarũcumĩ’, yami Dios”, yigotiaja Dios oca masa ïna ucamasire.

¹¹ Diore gotirẽtobosarimasa ïna gotimasire rẽtoro ñamasuse ñaja, Juan, Diore ï gotirẽtobosasejũa. To bajiro ti bajiboajaquẽne, Juan ï gotise rẽtoro ñamasuse ñaja yũ gotiroticõarã ïna gotise. “Ûjũ Dios yarã quẽnaro ï yirona mũa ñarũajama, Jesũre ajitirũnũña” ïna yigotisere yaja yũ. Ñamasurã ñaama, “Ñamasurã me ñaama Jesús ï gotiroticõarã” mũa

yĩaboajaquēne —yicami Jesús, ĩre ajisuyarāre.

¹² Quēna ado bajiro yicami Jesús:

—Juan ĩ gotimasiosuorijune, “Uju Dios yarā quēnaro ĩ yirā mua ñarujama, rojose mua yisere yitujacōari, Jesúre ajitirũña” yirere ajicōari, ti josa-
boajaquēne, yure ajisuya variquēnasuoadicama
masa. ¹³ Juan ĩ gotimasiosuoroto rĩjorojune,

“Rotimusuorũgōrucami” yigu Dios ĩ cōarocure goti-
coayuma ĩna, Diore gotirētobosarimasa. Moisére
Dios ĩ roticūmasire quēne, tire gotiaja ti. ¹⁴ “Diore
gotirētobosarimasa El’ias vāme cutimasir’ire ba-
jiro bajigu ejarucami”, yigotiyujarā ĩna, Diore
gotirētobosarimasa. To bajiro ĩna yimasirere, “Ri-
ojo ucamasiñuma ĩna” mua yituoĩajama, “Juan
ĩ ejarotire gotirā yimasiñuma”, yimasiaja mua.
¹⁵ Mua ajimasirujama, quēnaro yure ajitirũña
mua —ĩre ajisuyarāre yicami Jesús.

¹⁶⁻¹⁷ Quēna ado bajiro ĩre ajisuyarāre goticami
Jesús:

—Ado bajiro yirāre bajiro yirā ñarāja mua,
adirodoriana: Daquerā, gājerā rāca ajerujamenare
bajiro yirā ñarāja. ĩna ajeritūcuroju rujicōari,
gājerājuare, ado bajiro ĩnare gotirujirāma:
“‘Basavariquēnato mani’ yirā, muare
jutibosaboabu yua. To bajiro yua yiboajaquēne,
basabeju mua. To bajiri, ‘Rijariarāre bucurā
ĩna oticatore bajiro sutiriose boca otirujarāja
mua, yua basañarone’ yiboabu yua. To yua
yiboajaquēne, otibeju mua”, ĩnare yigotirāma, ĩna
rāca ajerujamenare. ¹⁸ ĩna rāca ajerujamenare
bajiro yirā ñarāja mua, adirodoriana. Juan,
quēnase bare babeti, quēnase idire idibeti

bajiñañuju ĩ. To bajiro bajigu ĩ ñajare, “Vãti sãñagũ ñagũmi”, ĩre yitũoĩacaju mũa, ĩre ajiterã ñari. ¹⁹ ĩ bero gotimasiosuocaju yũ, Dios ĩ roticõacacu. Yũjũama, quẽnase bare ba, quẽnase idire idi bajiñaja yũ. To bajiro yigu yũ ñajare, “Jairo bagũ ñaami. Idimecũgũ ñaami. Ʋjũre gãjõa sãnibosarimasa, gãjerã rojose yirãre quẽne ĩnare baba cutiami”, yũre yĩajũnisiniaja mũa, yũre quẽne ajiterã ñari. To bajiro Juanre quẽne, yũre quẽne mũa yise ti ñaboajaquẽne, Dios ĩ masise rãca yũa yise ti ñajare, beroju, “Quẽnaro yirã yiboayuma” yũare yimasirũarãja mũa —yicami Jesús, ĩre ajisũyarãre.

Ĩre ajitirũnũbeti macariana ĩna bajisere to yicõari, ĩna bajiro tire tũoĩacõari, Jesús ĩ gotire queti (Lc 10.13-15)

²⁰ Tijũ bero, ĩaĩañamani ĩ yĩõboacana ya macarire tũoĩacõari, Dios ĩ bojabetire ĩna yisere tũoĩasutiriticõari, ĩna yitũjabetijare, rojose ĩna tãmũorotire yigu, ado bajiro goticami Jesús:

²¹ —Coraz'in macana, to bajicõari, Betsaida macana quẽne, bũto rojose tãmũorũarãma. Ti macarianare ĩaĩañamani yũ yĩõcatore bajiro, Tiro vãme cuti macanare, Sidón vãme cuti macanare quẽne ĩaĩañamani yũ ĩojama, tirũmũjũ rojose ĩna yisere tũoĩasutiriticõari, yitũjacoaboriarãma ĩnama. “Rojose yũa yisere yirũabeaja” yisutiritirã ñari, sutiritirã ĩna sãñasejũa sudi vasoacõari, to yicõari, ĩna rũjoarijũ õja majeoboriarãma. ²² Riojo mũare gotiaja yũ. Sidón macana, to bajicõari, Tiro macana ñamasiriarã rõtobũsaro rojose tãmũorũarãma ĩna, Dios, masare ĩ beserirũmũ ti ejaro. ²³ Capernaum macanajũa,

“Quēnarã ñari, õ vecajũ Dios ã ñaroju ñarona ñaja mani”, yitũoĩaboarãma ãna. To bajiro ãna yitũoĩaboajaquēne, Dios tũju ñabetiruarãma. Rojose tãmuotũjabetiraroju ñaja ãna cõaecorotoma. Toanare ãaĩañamani yũ yĩĩocatore bajiro, Sodoma macanare quēne yũ yĩĩojama, rojose ãna yisere yitũjaboriarãma ãnama. To bajiri adirũmũgire quēne ñacõaboriaroju ti maca maji. ²⁴ Rioju mũare gotiaja yũ. Ti macana yũre ãna ajirũabeti vaja, Diojuama, rojose ãnare yirũcũmi masare ã beserirũmu ti ejaro. Sodoma macana ñamasiriarã rētoũsarõ rojose tãmuorũarãma ãna —yitũoĩa goticami Jesús.

*“Quēnaja” Diore Jesús ã yivariquēnare queti
(Lc 10.21-22)*

²⁵⁻²⁶ ãre ajitirũnarãre, “Mũ sũorine ajitirũnũama” yigũ, “Quēnaja” Diore yivariquēnagũ, ado bajiro yicami Jesús:

—Cacũ, õ vecagũ uju ñaja mũ. Adi macarũcũrore quēne, ñajediro uju ñaja mũ. “Jēre masiaja yũ” yitũoĩaboarãre, “Yũ ocare ajimasibeticõato ãna” yigũ, ãnare masirioaja mũ. To yicõari, “Masimena ñaja yũ” yirãjũare, “Ajimasiato” yigũ, ãna ajimasirotire yirēmorũgũaja mũ. To bajiro mũ yijama, mũ bojarore bajiro yigũ yaja mũ —Diore yicami Jesús.

²⁷ To yicõari, ãre ajisũyarãjũare ado bajiro goticami Jesús:

—Yũ jacũ ã ejarēmose sũorine jediro yimasijeogũ ñaja yũ. “Tire yimasiato” yigũ, adi macarũcũroju yũre cõacami yũ jacũ. To bajiro yicacũ ñari, yũ yisere masijeocõami yũ jacũ. Yũ quēne, ã yisere

masijeocõaja. “Ïre masiato” yigũ, yũ beserã rĩne yũ jacũre masiama —Ïnare yicami Jesús.

²⁸⁻²⁹ Quẽna ado bajiro yicami Jesús:

—Cojo vãme me ãna rotise ti ñajare, jairo gajacõari, ñarãre bajiro bajiaja mũa. “Tire cãdijeomasimenaja mani” yisutiritirã ñari, yũjũare ajirã vayá mũa. Yũre ajitirũnũcõari, rũcuse gajacõari, ñamenare bajiro variquẽnarã ñarũarãja mũa. Masare maitũõlagũ ñaja yũ. “Ñamasugũ ñari, ãnare ajirũcũbũobeaja yũ” yigũ me ñaja yũ. No bojarãre yũre ajitirũnrãre ejarẽmogũ ñaja. ³⁰ Mũare yũ rotise josari me ñaja. To bajiri yũ rotisere mũa cãdijama, variquẽnarũarãja mũa —yicami Jesús.

12

Usũsãjariarũmũ ñaboajaquẽne, Jesús buerimasa trigo ajere tũnejuacõari ãna bare queti

(Mr 2.23-28; Lc 6.1-5)

¹ Usũsãjariarũmũ ti ejaro, trigo ãna oteriavese cãtore vacajũ, Jesũrãca. To bajivanane ñiorijacajũ yũa. To bajirã ñari, trigo ricare tũnejuacõari, yũa ãmorine ti gasere sĩguẽreacõari, bacajũ yũa. ² Tire yũa basere ãacõari, fariseo masa ado bajiro Jesũre ãre yicama ãna:

—Ïãña mũa! Mũ buerimasa, usũsãjariarũmũ yire mere yama ãna —Jesũre ãre yicama.

³ To bajiro ãna yisere ajicõari, ado bajiro ãnare cãdicami Jesús:

—¿David ñamasir'i ã babarã rãca ñiorijacõari, ãnare ã ãmato bamasirere masibeati mũa? ⁴ Ñiorijarã ñari, “Mani rãca ñagũmi Dios” masa ãna yirivijũre

sājacōari, Diore ĩre rācūbūorā gājerā pan ĩna cūboarerene juacōari, ĩ babarā rāca bamasiñuju ĩ. To bajiri Moisés ñamasir'i ĩ gotimasirema, “Paia rĩne baruarāma” ĩ yimasiboarerene bamasiñujarā ĩna. To bajiro ĩna yiboajaquēne, ti vaja rojose ĩnare yibetimasīñumi Dios. ⁵ ¿“Ususājariarūmu ti ñaboajaquēne, Diore yirūcūbūoriavijū paia ĩna moatūjabetiboajaquēne, rojose yirā me yirāma ĩna”, Moisés ñamasir'i ĩ yiucomasirere masiritiatique mūa? ⁶ Riojo mūare gotiaja yū. Moisére ĩ roticūmasire, Diore yirūcūbūoriaviaye ñase rētoḃsaro ñamasuse ñaja mame yū rotise. ⁷ Dios oca masa ĩna ucomasire ajimasibetibūsaja mūa. Ado bajiro gotiaja ti: “Vaibūcūrā ecariarāre sīacōari, yūre ĩna soemūosere bojabetibūsaja yū. Masa gājerāre quēnaro ĩna ĩamaisejūare bojamasucōaja yū”. To bajiro yigotiaja Dios oca masa ĩna ucomasire. Tire, “Ado bajiro yirūaro yaja” yiajimasirā masu mūa ñajama, Dios ĩ bojabeti rojose ĩna yibetiboajaquēne, “Rojose yama” yū buerimasare ĩnare yīābetiboriarāja mūa. ⁸ Yū, Dios ĩ roticōacacu, “Ususājariarūmure ado bajiro mūa yijama, quēnaja. To bajirojūa mūa yijama, quēnabeaja”, yīrotigū ñaja yū —ĩnare yicūdicami Jesús, fariseo masare.

*Āmo ñujobecūre Jesús ĩ ñujorotire queti
(Mr 3.1-6; Lc 6.6-11)*

⁹ To yi vacūne, Dios ocare ĩna buerivijū yūare ūmato sājacami Jesús. ¹⁰ Ti vijū ñacami sīgū, cojojacatua āmo ñujobecū. Fariseo masa quēne ñacama. “Jesús, rojose yimi” ũjarāre yi ocasāruarā, ado bajiro Jesúre sēniātocama ĩna:

—Dios, Moisére ï roticũmasirere m̄ t̄oĩajama, “Adir̄m̄ us̄s̄ajariar̄m̄re rijaye c̄tir̄re mani catiojama, quẽnac̄aroja”, ¿yit̄oĩati m̄? —Jesúre ïre yis̄eniĩatocama ïna.

¹¹ To ïna yisere ajic̄ari, ado bajiro yicami:

—Oveja m̄a ecar'i, gojēm̄ ï quediropas̄ajama, “Us̄s̄ajariar̄m̄ ñaja” yir̄a, ¿ãmir̄a vamenada m̄a?

¹² ¿Mas̄ r̄etob̄saro maiĩogũ ñatique, ovejaj̄a? To bajiri, ¿us̄s̄ajariar̄m̄ quẽne, no bojaḡm̄ mas̄re quẽnaro maní yijama, quẽnabetojarique? —Ïnare yic̄adicami Jesús.

¹³ To yic̄ari, ãmo ñujobec̄j̄are:

—M̄ ãmore ñujoya —Ïre yicami.

To ï yirone, ï ãmore ï ñujorone, quẽnaejacoacaj̄m̄ yuja, gaje ãmore bajirone. ¹⁴ To ï yisere ïac̄ari, budicoacama fariseo masa. Budiac̄ari, “¿No bajiro yic̄ari, Jesúre s̄larotir̄ati mani?” gãmer̄a yĩnagõñujar̄a ïna.

Diore gotir̄etobosarimasa Jesús ï bajiro tire yir̄a, ïna ucamasire queti

¹⁵ To bajiro ïre ïna t̄oĩa ñagõjaisere masic̄ari, gajeroj̄m̄ vacami Jesús quẽna. Jesús ï vato ïac̄ari, ïre s̄yacaj̄m̄ ȳna, j̄ajar̄a masa. Toj̄m̄ ñajediro masa rijaye c̄tir̄re catiocami. ¹⁶ To yic̄ari, ïnare ï catiosere gotirotibeticami ï. ¹⁷ To bajiro ï yijama, “Isa'ias ñamasir'i Diore gotir̄etobosarimas̄, ‘To bajiro bajir̄aroja’ ï yucamasiriarore bajiro bajiato” yiḡm̄, yicami, ado bajiro yise ti ñajare:

¹⁸ “Ãni ñaami, ȳre moabosarimas̄ ȳ besec̄m̄, ȳ ïavariquẽnagũ. Esp'iritu Santore ïre c̄õar̄c̄j̄a ȳ, ‘Ï ejar̄ẽmose r̄ãca ȳ bojasere yimasiato ï’

yigũ. To bajiri, ‘Ado bajiro riojo yiroti ñaja’ yigotibatorũcũmi, masa ñajedirore.

- 19 Masa rãca oca josabecũ ñarũcũmi ĩ. To yicõari, masa ĩna ĩaro rĩjorojũa rãgõcõari, ‘Yũre ajiya mũa. Masigũ ñaja yũ’ yiavasã gotibecũ ñarũcũmi.
- 20 Yũre quẽnaro ajitirũnũmenare, yũ bojarore bajiro yimasibeticõari, tũoĩasũtiritirãre quẽne mairũcũmi. ĩnare ĩamaicõari, ‘Quẽnaro yũre ajitirũnũato ĩna’ yigũ, ĩnare ejarẽmorũcũmi.
- 21 Jud'io masa me ñarã rojose ĩna yise vaja rojose ĩna tãmũoborotire, ‘Manire yirẽtobosarũcũmi. To bajiri rojose tãmũobetirũarãja’ yivariquẽna yuñarũarãma”, yucamasĩũmi Isa'ias, Diore gotirẽtobosarimasũ.

“Vãtia mũjũ ĩ masise rãca yigũ yami Jesús” ĩna yire queti

(Mr 3.20-30; Lc 11.14-23; 12.10)

22 Sĩgũ ñacami vãti sãñagũ. “ĩabeticõato; ñagõbeticõato” yigũ, ĩ mũsũjũre sãjacõari, ñañumi. To bajiri Jesús tũjũ ĩre ãmiejacama masa. To ĩna yirone, ĩ mũsũjũre sãñagũre vãtire burocacami Jesús. To bajiri vãtire ĩ burocajare, ĩamasi, ñagõmasi, bajicoacami yuja. 23 Tire ĩacõari, no yimasibeticama masa jediro:

—¿Mũjũ David ñamasir'i jãnami “Rotimũorũgõrũcũmi” yigũ, Dios ĩ cõar'i mani tũoĩa yuñarũgũgũ ñatique ĩ? —yicama.

24 To bajiro ĩna yisere ajicõari, ado bajiro ĩnare yicama fariseo masajũa:

—Vātiare ĩ bureajama, vātia ɯjɯ Beelzebú vāme ɕɯtigɯ ĩ masise rāca vātiare bureagɯ yami—yicama ĩna.

²⁵ To bajiro ĩna tɯoĩasere ĩamasicōari, ado bajiro ĩnare gotimasiocami Jesús:

—Cojo sitana rotirimasa ĩna gāmerã quějajama, ĩna masune gāmerã sĭayayirã yirãma. To bajirone bajiroja cojo macanare quēne, cojo vi ñarãre quēne. ²⁶ To bajirone bajiroja vātiare quēne. Vātia ĩna gāmerã bureajama, “Masare rojose yitɯjato mani” yirã yiborãma. To bajiro ti bajijare, “Beelzebú vāme ɕɯtigɯ ĩ masise rāca masa ɯsɯrijɯ sãñarãre vātiare bureaami” yɯre mɯa yiboase, riojo yirã me yaja mɯa. ²⁷ To bajiro yɯre mɯa yitɯoĩaboajama, mɯa buerã quēne masa ɯsɯrijɯ sãñarãre vātiare ĩna bureasere, “Vāti ĩ masise rāca burearãma ĩna quēne” yirãre bajiro yaja mɯa. To bajiro mɯa yijama, “Tɯoĩamavisiaja mɯa”, mɯare yirɯarãma ĩna, mɯa buerã. ²⁸ Ado bajirojɯa tɯoĩarona ñaboaja mɯa: “Vātia ɯjɯ ĩ masise rāca me yami. Esp'iritu Santo ĩ masise rācajɯa vātiare bureaami”, yɯre yitɯoĩarona ñaja mɯa. To yicōari, “‘Rotimɯorũgōrɯɕɯmi’ yigɯ, Dios ĩ cōar'i ñaami”, yɯre yitɯoĩamasiroti ñaja mɯare.

²⁹ “To bajiro yimasiroti ñaboaja” yigɯ ñari, “Quēnabusaro yimasiató” yigɯ, quēna gajeye gotimasiore queti mɯare gotiaja yɯ: Sĭgũ, gãji guamɯ ya vi sãjacōari, ĩre ĩ siabetijama, gajeyeũni ĩmamasibecɯmi. ĩre siacōari, ĩ gajeyeũnire ĩmamasigũmi yuja. To bajirone bajiaja yɯre quēne. Vātia ɯjɯ ĩ rotiboasere ĩre yirotibeticōari, masa ɯsɯrijɯ sãñarãre vātiare yɯ burease sɯorine, vāti

ĩ rotiajeboariarãre ĩre ĩmagũ yaja, “Yũ yarã ñato” yigũ.

³⁰ No bojarã yũ gotiboasere ajitirũnũmenama, yũre ajitirũnũboronare matarã yirãma. No bojarã, “Jesũre ajitirũnũña” yũre yigoticudibosamenama, “Īre ajibesa” yirãre bajiro bajirã ñarãma.

³¹ To bajiri, riojo mũare gotiaja yũ. Masa jediro rojose ĩna yijama, jediro rojose ĩna ñagõjaquẽne, sũtiriticõari, Diore ĩna sãnijama, rojose ĩna yisere masiriorũcũmi. To bajiboarine, Esp'iritu Santojũare rũcũbũomena rojose ĩre ĩna yitud'ijama, tirema masiriobetirũcũmi. ³² No bojarã, Dios ĩ roticõacacũre rojose yũre ĩna ñagõro bero, sũtiriticõari, Diore ĩna sãnijama, rojose ĩna yisere masiriorũcũmi. To bajiboarine, Esp'iritu Santo ĩ masise rãca moagũre, “Satanás ye rãca moami” ĩna yitud'ijama, Esp'iritu Santojũare rojose yirã yirãma. Tirema gajerodo ti ñacoaboajaquẽne, masiriobetirũcũmi Dios —ĩnare yicami Jesús.

*“Ti rica cũtise sũorine yucũre ĩamasiaja mani”,
Jesũs ĩyigotimasiore queti*

(Lc 6.43-45)

³³ Quẽna ado bajiro goticami Jesús:

—Yucũ quẽnase ti rica cũtijama, “Quẽnaricũ ñaja”, yaja mani. Yucũ rojose ti rica cũtijama, “Rojoricũ ñaja”, yaja mani. Ricare ĩacõari, “Quẽnaricũaye, rojoricũaye ñaja”, yĩamasiaja mani. To bajirone bajiaja mani yise quẽne. “Quẽnagũ ñaami. Rojogu ñaami” yimasirũarã, ĩ yisere ĩaĩarãja mani. ³⁴ Vãtia uju rojose ĩ yirore bajirone rojose yijairã ñaja mũa. Rojorã ñari, no yirã quẽnasere ñagõmenaja

mua. Mua usuriya rojose mua tuoĩasãñasere ñagõburũgũaja mua. ³⁵ Quẽnagũma, quẽnaro tuoĩagũ ñagũmi. To bajiri quẽnase ñagõgũmi. Rojogũyama, rojose tuoĩagũ ñagũmi. To bajiri rojose ñagõgũmi. ³⁶ Riojo muare gotiaja yu. Ejaruaroja masa jedirore Dios ĩ beserirũmu. Tirũmure tocãrãca vãme, mua ñagõria vãmere, “Ado bajiro ti bajijare, to bajise ñagõcaju yua”, Diore yigotiruarãja mua. ³⁷ To bajirone bajiruaroja. Mua ñagõrere ĩacõari, “Quẽnase bujarã, rojose tãmuorã, bajiruarãja”, yirotirucumi Dios —ĩnare yicami Jesús.

*“Ĩaĩañamani mu yĩosere bojaja yua”, ĩna yire queti
(Mr 8.12; Lc 11.29-32)*

³⁸ To ĩ yiro bero, ado bajiro ĩre yicama fariseo masa, Dios ĩ rotimasire gotimasiorimasa quẽne:

—Gotimasiorimasu, ĩaĩañamani mu yĩosere bojaja yua —Jesúre ĩre yicama ĩna.

³⁹ To ĩna yirone, ado bajiro ĩnare cudicami Jesús:

—Mua adirodoria, rojose yirã jãjarã ñaja mua. Yure ajiterã ñari, ĩaĩañamani muare yu yĩosere bojaboaja mua. To bajiro mua bojaboajaquẽne, to bajise muare yĩobetirucuja yu. To bajiboarine Jonás ñamasir'i Diore gotirẽtobosarimasu ĩ bajimasirere bajiro bajĩoroti ñaroja. ⁴⁰ N'inive vãme cuti macana ñamasiriarã, ĩna taju Jonás ĩ ejaroto rĩjoro idiarũmu, idia ñami vai jaigu gudajoaju ĩ ñamasirere ĩnare ĩ gotisere ajicõari, “Diore gotirẽtobosagu ñaami”, ĩre yituoĩañujarã ĩna, N'inive macana. To bajiro bajirucuja yu quẽne, Dios ĩ roticõacacu quẽne. Idia ñami, idiarũmu sita eñerocaju yu ñarere ajicõari, “Dios ĩ cõar'ine ñañumi”, yimasiruarãma ĩna, masa.

⁴¹ N'inive macana ñamasiriarã, Jonás ñamasir'i

Dios oca ï gotisere ajicōari, rojose ïna yisere s̄atiriticōari, yit̄ujamasiñujarã ïna. Jonás rētoro ñamasugũ ñaja yu. To bajiro yu bajiboajaquēne, m̄uaj̄ama, rojose m̄ua yisere yit̄ujabeaja m̄ua. To bajiro yirã m̄ua ñajare, masare Dios ï beserir̄um̄u ti ejaro, ado bajiro bajir̄uaroja: N'inive maca ñamasiriarã, tudicaticōari, “M̄ua ye s̄uorine rojose tãm̄uor̄uarãja”, m̄uare yĩar̄uarãma. ⁴² Sabá sitana ujo ñamasirio, “Ūju Salomón quēnaro masigũ ñañuju” yire quietire ajicōari, sōju vadicōari, ïre ajigo ejamasiñuju so. Salomón rētoro ñamasugũ ñaja yu. To yu bajiboajaquēne, m̄uaj̄ama, yure ajitir̄un̄ubeaja m̄ua. To bajiri, masare Dios ï beserir̄um̄u ti ejaro, ado bajiro bajir̄uaroja m̄uare: Salomón tu ejamasirio, tudicaticōari, “M̄ua ye s̄uorine rojose tãm̄uor̄uarãja”, m̄uare yir̄uocomo so, yu gotisere ajirã ñaboarine, rojose m̄ua yit̄ujabetijare —fariseo masare ïnare yicami Jesús.

Vãti, masu usujure sãñar'i, budicōari, ï tudisãjare quieti

(Lc 11.24-26)

⁴³ Quēna ado bajiro yicami Jesús:

—Vãti, masu usujure budicōari, oco manorij̄u vacudiḡumi. Tujariaj̄au bujabecu ñari, ado bajiro t̄uoĩaḡumi: ⁴⁴ “Yu budiriaroj̄une vacoarocu ñaḡuja yu”, yit̄uoĩaḡumi. Masu usujure ï budigoriarore tudiej̄au ï ïajama, gōjanabiose mano, quēnarivire bajiro masu usujure ïaej̄aḡumi. ⁴⁵ To bajiro ï usujure ïaejacōari, cojomo cōro j̄ua jēnituarir̄acu vãtia ï rētoro rojose yirãre ũmato ejaḡumi. To yicōari,

ĩna ñaro cõrone masu usujure sãjarãma ĩna. To bajiri, rētorobusa rojose yigu ñagũmi masu yuja. To bajirone bajirũaroja mũare adirodoriana rojose yirãre quēne. Vãtiare yu bureacõaboajaquēne, yure ajitirũnumena ñari, bũtobusa rojose yirã ñaja mũa —ĩnare yicami Jesús.

“Yu yarãma ado bajiro bajirãjũna ñaama”, Jesús ĩ yire queti

(Mr 3.31-35; Lc 8.19-21)

⁴⁶⁻⁴⁷ Jesús, masare ĩ gotimasio ñarone, sīgũ, ado bajiro Jesúre ĩre yicami ĩ:

—Mũ jaco, mũ bederã rãca macajũju ejama, mũ rãca ñagõrũarã —Jesúre ĩre yicami.

⁴⁸ To bajiro ĩ yiboajaquēne, ado bajiro ĩre yicudicami Jesús:

—¿Ñimo ñati yu jacoma? ¿Ñimarã ñati yu bederãma? —ĩre yicami Jesús. ⁴⁹ To yigũne, yũajũare, ĩ buerimasare ĩacõari,

—Mũa ñaja yu bederãma, yu jacore bajiro bajirãma. ⁵⁰ No bojarã yu jacu õ vecagu ĩ rotirore bajiro yirã, ĩna ñarãma yu bederãre bajiro bajirãma, yu jacore bajiro bajirãma —yũare yicami Jesús.

13

Oterimasu ĩ bajirere Jesús ĩ gotimasioire queti

(Mr 4.1-9; Lc 8.4-8)

¹ Tirũmũne, vi ñar'i, budiacõari, utabũcũra tũju yua rãca ejarũju ejacami Jesús. To bajicõari, masare gotimasiocami. ² Masa jãjarãbũsa ĩna rējaquearo ĩacõari, cũmuaju vasãjacõari, rujicami Jesús. Masajuama, utabũcũra tu rũgõcõacama ĩna.

³ To bajicõari, cojo queti me tũoĩacõari, “Ado bajiro

bajisere bajiro bajiaja” ñnare yigotigũ ñnari, ado bajise goticami:

—Sĩgũ oterimasũ, vesejũ ote ajere otegũ vacũmi. ⁴ Vese ejacõari, ote ajere ñ reabaterone, gajeye maajũ vẽjaquearoja. To bajiri minia ejacõari, tire bareacõarãma ñna. ⁵⁻⁶ Gajeyema, gũta joejũ reajeoroja. Tijũ, mojoroaca sita ti ñajare, guaro ti judidaboajaquẽne muiju, asisĩocõagũmi. To bajicõari, oco manijare, sñnireacoatoja ti. ⁷ Gajeyema, jotayucũ vatoajũ vẽjaquearoja. To bajicõari, ti judiboaajaquẽne, jotajũna bũcũaveocoatoja ti. ⁸ Gajeyema, sita quẽnarojũ vẽjaquearoja. To baji, judibũcũacõari, quẽnase ñacõari, jairo rica cõtiroja. Cojotõ, cien ñnaricari rica cõtiejoroja. Gajetõ sesenta ñnaricari, gajetõ treinta ñnaricari rica cõtiroja. ⁹ Tire mũa ajimasirũajama, quẽnaro tũoĩaña mũa —yicami Jesús.

“Ado bajiro yigũ, gotimasiore queti gotirũgũaja yũ”, Jesús ñ yire queti

(Mr 4.10-12; Lc 8.9-10)

¹⁰ To ñ yiro bero, ado bajiro Jesũre sẽnĩñacajũ yũ, ñ buerã:

—¿No yigũ gotimasiore queti tũoĩacõari, ñnare gotirũgũati mũ? —Ñre yisẽnĩñacajũ yũ.

¹¹ To yũa yirone, ado bajiro yũare cũdicami:

—“Ûjũ Dios yarã quẽnaro ñ yirona yũ ñnarũajama, ado bajiro yiroti ñaja” ñna yimasibeticatire, yucũrema Dios ñ masise rãca ajimasiaja mũama. To bajiboarine, gãjerãjũama, Dios ñ bojabetijare tire ajimasibeama. ¹² No bojagũ Diore ajitirũnũgũre, “Quẽnarobũsa ajimasiato” yigũ, ñ masisere cõarũcũmi Dios. Gãjirema, ñre ajigũ ñnaboarine, ñre ñ ajitirũnũbetijare, ñ

ajimasiboasere masiriojeocōarucumi ĩ. To bajiri ĩre masibetimasucōarucumi ĩ. ¹³ Masa ado bajiro bajirã ĩna ñajare, gotimasiore queti ĩnare gotirũgũaja yu: Yu yĩosere ĩarã ñaboarine, yu gotisere ajirã ñaboarine, ajimasicōari, “To bajiro manire yigotigu yatique”, yimasimenama. ¹⁴ Diore gotirẽtobosarimasu Isa'ias ñamasir'i muu bajiro tire yigu, Dios ĩ ñagōmasirere ado bajiro yiucamasiñumi:

“Yuere ajirã ñaboarine, ajimasibeticōa ñaruarãma. Yu yĩosere ĩarã ñaboarine, “To bajiro bajisere yigu yatique ĩ”, yĩamasibeticōa ñaruarãma.

¹⁵ Ado bajiro bajirã ñari, yu yere ajimasimena ñarãma ĩna: Gãmo gojeri tusubeti, to yicōari, caje ĩamenare bajiro bajirãma. To bajiro yu yijama, “Yu yere tuoĩaruamena ñaama” yigu yaja yu. To bajirã ñari, tire quẽnaro ajimasibeama. Yu yere ĩna tuoĩaruajama, tire ajimasicōari, yu bojarore bajiro tuoĩavasoacōari, yure sēnirũcubũoborãma ĩna. Yuere ĩna sēnijama, yure ĩna cãmotadicōa tũjaborotire ĩnare yirẽtobosabogũja yu', yigotiami Dios”, yiucamasiñumi Isa'ias ñamasir'i.

¹⁶ Variquẽnaña muuama. Yu yĩosere tuoĩacōari, yu bojarore bajiro tuoĩavasoariarã ñari, tire yu gotimasiosere ajimasiaja muuama. ¹⁷ Riojo muare gotiaja yu. Tirũmũju jãjarã Diore gotirẽtobosamasiriarã yucu muare yu yĩosere ĩaruamasiboayuma. Yu gotimasiosere muu ajisere ajirũamasiboayuma. To bajiri muuama, jairo yu yĩosere masirã ñari, to yicōari, yu gotimasiosere ajirã ñari, variquẽnaña muu —yuare yicami Jesús, ĩ buerãre.

Ado bajise tʰoĩacõari, “Oterimasu ĩ bajire quetire gotibʱu yʱ”, Jesús ĩ yire queti (Mr 4.13-20; Lc 8.11-15)

¹⁸ Quēna ado bajiro goticami Jesús:

—Ado bajise tʰoĩacõari, oterimasu ĩ bajire quetire gotibʱu yʱ: Quēnaro ajiya mʱa. ¹⁹ Ote aje, maajʱu vējaquearere, minia ĩna barere yʱ yijama, “ʰjʱu Dios yarā quēnaro ĩ yirona ĩna ñarʱajama, ado bajiro yiroti ñaja” yʱ yigotimasiosere ĩna ajiboasere, vātia ʱjʱu ejacõari, guaro ĩ masiriosere yigʱu yibʱu yʱ — yʱare yicami.

²⁰⁻²¹ —Gāta joejʱu vējaqueacõari, guaro judibʱucʱaboarere, muiju ĩ asisʱorere yʱ yijama, yʱ yere ajicõari, quēnaro variquēnase rāca ajirā ñaboarine, yoaro mene tire ĩna quejerotire, to yicõari, yʱ gotisere ajirā ĩna ñajare, gājerā rojose ĩnare ĩna yijama, yoaro mene yʱ ocare ĩna ajitʱajarotire yigʱu yibʱu. ²² Jotayucú vatoajʱu vējaqueacõari, judiboarere jotajʱu ti bʱucʱaveorere yʱ yijama, yʱ gotisere ajirā ñaboarine, adi macarʱucuro ti bajisejʱare tʰoĩarejairā ñari, to yicõari, gajeyeũni bojatʰoĩarā ñari, yʱ yejʱare tʰoĩatʱajacõari, yʱ bojarore bajiro yimenare yigʱu yibʱu yʱ. ²³ Sita quēnarojʱu vējaqueare judibʱucʱacõari, quēnase rica cʱtirere cojotõ cien ñaricari, gajetõ sesenta ñaricari, gajetõ treinta ñaricari rica cʱtirere yʱ yijama, yʱ gotimasiosere ajimasicõari, Dios ĩ bojarore bajiro quēnaro yirā yʱ ocare ĩna gotimasiose sʱori, gājerā masa quēne yʱre ĩna ajitirʱanarotire yigʱu yibʱu — yʱare yicami Jesús.

Trigo vatoajʱu vidi judire queti

24 “Masare Dios ĩ beserirũmũ ti ejaro ado bajiro bajirũaroja” yigũ, gaje queti gotimasiocami Jesús:

—Sĩgũ ĩ ya vesejũ trigo ajere otegũmi. 25 ĩ otero bero, ĩre moabosarimasa ĩna cãnitoye, ĩ ya vese ejacõari, vidi oterudigũmi, ĩre ĩategũ ñari. To yigajano, vacoacũmi ĩ. 26 To bajiri trigo ti judibũcũato, vidi quẽne ruyuaroja. 27 To bajisere ĩacõari, ĩna ujure gotirã vanama ĩna. ĩ tũ ejacõari, ado bajiro yirãma: “Yũa uju, ¿no yiro trigo rĩne mũ otecati ñaboarine, vidi quẽne judiri?”, yirãma, ĩna ujure. 28 To ĩna yijare, “Sĩgũ yure ĩategũ oterimi”, ĩnare yigũmi ĩ. To ĩ yirone, “¿Ado cõrone yũa vũerearã vatire bojati mũ?”, ĩre yisẽniãrãma ĩna. 29 To ĩna yisere ajicõari, ado bajiro ĩnare yigũmi ĩna uju: “¡Vũebesa maji! Mũa vũejama, ote rãcane vũecõarãja mũa. 30 Trigo rãca bũcũacoajaro maji. Ti rica cũti bũcũaro ĩacõari, tire jua bajirãne vũereacõari, soereacõarũarãja mũa. Trigore juacõari, tire cũriavijũ cũcõarũarãja mũa”, ĩnare yirotigũmi oterimasũ —yigotimasiocami Jesús.

*“Mostaza vãme cũtiũ rica, ajeare bajiro bajiaja”,
Jesús ĩ yire queti*

(Mr 4.30-32; Lc 13.18-19)

31 Quẽna ado bajiro gotimasiocami Jesús:

—“Rotimũorũgõrucũja mũ” yigũ, Dios ĩ cõagũ, yũ gotimasiosere no bojarã ĩna ajitirũnũjama, mũare yũ gotisere mojoroaca ajimasiboarine, rojose ĩna ñare cũtisere tũoĩvasoacõari, tocãrãcarũmũri quẽnaro ñamũjarũgũcõari, quẽnaro ajimasimũjarũgũjama, ado bajiro bajirũaroja: Sĩgũ ĩ ya vesejũ mostaza ajea otegũmi. 32 Gajeye ote aje rẽtoro rũjaricaca ñaroja ti mostaza ajeaca.

To bajiri ĩ oterica mojouricaca ñaboarine, ti judibucacoajama, ote yucári rētohusaricu jairicu ñaroja tiu. Jairicu ti ñajare, tiu rujujijū minia ĩna ria cūtirotijurire quēnorāma ĩna —yigotimasociami Jesús. e

“Pan vauvasere bajiro bajiaja”, Jesús ĩyire queti (Lc 13.20-21)

³³ Quēna ado bajiro gotimasociami Jesús: “ ‘Rotimūorūgōrūcūja mā’ yigū, Dios ĩ cōagū, yū gotimasiosere no bojarā ĩna ajitirūnūjama, mūare yū gotisere mojouroaca ajimasiboarine, rojose ĩna ñare cūtisere tūoĭavasoacōari, tocārācarūmūri quēnaro ñamūjarūgūcōari, quēnaro ajimasimūjarūgūjama, ado bajiro bajirūaroja” yigū, gaje gotimasioire queti goticami:

—Rōmio, pan quēnogoago, trigo vetare idiaji vasācōari, pan ūmato vauvasere vūogomo so. To so yijare, jairo vauvaroja ti. Tire bajirone bajirūaroja, Diore rotibosagure yure ajitirūnūrā jājarābūsa māa būjūroti —ĩnare yigotimasociami Jesús.

“Ado bajiro Diore gotirētohosarimasū ĩ yiucamasire ñajare, gotimasioire queti gotirūgūaja yū”, Jesús ĩyire queti (Mr 4.33-34)

³⁴ Gotimasioire queti rāca rīne ĩnare gotimasiōrūgūcami Jesús. ³⁵ Diore gotirētohosarimasū,

e 13:32 Mostaza ajea ti bajire queti Jesús ĩ gotirere, “Ado bajiro yirūaro yaja”, yiyujarā Dios oca masa ĩna ucamasirere buerētobudiriārā sīgūri: “Jesús ĩ gotimasiosere ajitirūnūrā ĩ ñarirodo mojouroaca ñaboarine, jājarā ĩna būjūrotire yigū yiyuju Jesús”, yiyujarā ĩna.

“Ado bajiro bajiruroja” ĩ yimasire ti ñajare, to bajise gotimasiōrũgũcami. Ado bajiro ucamasiñumi Diore gotirētobosarimasu:

“Masare ĩnare gotigu, gotimasiore queti tũoĩacõari, ĩnare gotimasiōrcami. To bajiro yigu, adi macaruro ti ruyuaroto rĩjorojũne masiñamanicoadirere gotimasiōrcami”, yuucamasiñumi Diore gotirētobosarimasu Jesũre tũoĩa yugu.

Trigo vatoaju vidi judirema, “Ado bajiro yiruro yaja”, Jesũs ĩyigotimasiore queti

³⁶ To bajiro yigotigajanocõari, “Viju vacu yaja yu”, yisãjacoacami. To ĩ yi vatone, ĩre suyasãjacaju yua quẽne. Sãjaejacõari, ado bajiro ĩre sẽniãacaju yua, ĩ buerimasa:

—Vidi judire quetire, “Ado bajiro yigu, to bajise yibu yu”, yuare yigotiya —Jesũre ĩre yicaju yua.

³⁷ To bajiro yua yijare, ado bajiro yuare goticami Jesũs:

—Trigo oterimasare yigu, yu masune yigu yibu yu, Dios ĩ roticõacare yu yijama. ³⁸ ĩ ya vesere yu yijama, adi macaruro mani ñarojũre yigu yibu yu. Trigo yu yijama, yu yarãre quẽnaro Dios ĩ yirãre yigu yibu. Vidire yu yijama, vãtia uju, Satanás ĩ bojarore bajiro yirãre yigu yibu. ³⁹ Vidi oterudirimasare yu yijama, vãtia uju Satanãre yigu yibu. Trigo ti bucratoju ĩna juarere yu yijama, adi macaruro ti jedirotire yigu yibu. Trigo ti bucro, juarimasare yu yijama, ángel mesare yigu yibu, yicami Jesũs. ⁴⁰ Vidi juacõari, ĩna soerearore bajiro bajiruroja adi macaruro ti jediroju. ⁴¹ To cõrone, Dios ĩ roticõacu,

Diore rotibosagu, ángel mesare cōarucija yu. “Yu yarã vatoaju ñacōari, rojose yirãre, to yicōari, rojose ñare ũmato yirãre quēne juaáya” yigu, ñare cōarucija. ⁴² Ñare juacōari, jeame yatibetimeju reacōaruarãma ña. Toju ñacōari, buto rojose tãmuorã ñari, guji pōguē, oti, yiruarãma ña. ⁴³ Ángel mesa, ñare ña reagajanoro bero, ado bajiro bajiruarãja mua: Mani jacu, “Quēnase yirã ñaama” ñi yĩarã ñari, muiju ñi busurore bajiro busuruarãja. Tire mua ajimasiruarajama, quēnaro tuoĩña —yuare yicami Jesús.

Buto vaja cutisere ñi bñjare queti

⁴⁴ Quēna ado bajiro yuare goticami Jesús:

—Dios yarã quēnaro ñi yirã mua ñase buto quēnaja ti. To bajiro ti bajijare, sigũ buto vaja cutise bñjagure bajiro bajirãma Dios yarã ñaruarã. Sigũ yere buto vaja cutisere sita vatoaju ñi yayioboarere bñjagumi gãji. Tire bñjacōari, quēna tijane tudiyaiocũgũmi. To bajiri, “Jairo vaja cuti ñaja” yivariquēnagũ ñari, ñi gajeyeũni ñaro cōrone gãjerãre ñisjeocōagũmi, gãjoa bñjaru. To yicōari, ti gãjoa rãca ti sita mũre vaja yigumi, sita vatoaju jairo vaja cutise ñi bñjarere cuoru. Tire bajiro bajirãma Dios yarã ñaruarã. “Adi macarucuroaye jediro yu tuoĩa bojaboase rētoro quēnase ñaja Dios ye” yituoĩacōari, jediro ñi bojarore bajiro yirũgũrãma —yuare yigotimasiocami Jesús.

Buto vaja cutia, perla vãme cutiare ñi bñjare queti

⁴⁵ Ti vãmere bajiro gaje queti ado bajiro yuare goticami Jesús:

—Dios yarã quẽnarõ ã yirã mani ñase quẽnaja ti. To bajiro ti bajijare, bũto vaja cutia perla vãme cutiare bujagure bajiro bajirãma Dios yarã ñaruarã. Sīgũ gajeyeũni ĩsicudirimasũ, perla vãme cutire sēnicudigumi. ⁴⁶ To yicudigune, gãji ĩ c̃oricare quẽnamasuricare bujagumi yuja. To bajiri tiare bũto bojagũ ñari, ĩ gajeyeũni jedirore ĩsicõari, vaja sēnigũmi, gãjoa bujarũ. To yicõari, ti gãjoa rãca ĩ bojaricare vaja yigumi yuja. Tire bajiro bajirãma Dios yarã ñaruarã. “Adi macarucuroaye jediro yũ tũoĩa bojaboase rẽtoro quẽnaja Dios ye” yitũoĩacõari, jediro ĩ bojarore bajiro yirũgũrãma — yũare yigotimasiocami Jesús.

Vai s̃arimasa, vai quẽnarã r̃ne ĩna besere queti

⁴⁷ Quẽna gotimasiore queti yũare gotimasiocami Jesús:

—Masare Dios ĩ beserirãmũ ti ejaro, vai s̃arimasa vaire ĩna beseriarore bajiro bajirũaroja. Vai s̃arimasa bajiũ rãca ĩna vayaro, vai vãme cutirã ñaro cõro sãjarãma ĩna. ⁴⁸ ĩna sãjaro ĩacõari, jabuajũ ĩnare tũamocũrãma. ĩnare beserãma. Bariarãrema jĩbũjũ juasãcõari, bayamanare reacõarama. ⁴⁹ To bajirone bajirũaroja macarucuro ti jediro. Ángel mesa, masare beserã vadirũarãma. Quẽnarãre, rojorãre beserũarãma. ⁵⁰ Rojorãre ĩnare juacõari, jeame yatibetimejũ reacõarũarãma. Tojũ ñacõari, bũto rojose tãmũorã ñari, guji põguẽ, oti, yirũarãma ĩna — yũare yicami Jesús.

“Jesũre ajitirũnũrã ñarãma Dios ocare tirãmũayere, mamere quẽne quẽnarõ riojo gotimasiorã”, yire queti

51 Tire yuare gotigajanocōari, ado bajiro yuare sēniñacami Jesús:

—¿Tire muare yu gotimasiose queti jedirore ajimasiati mua? —yuare yisēniñacami.

—Ajimasiaja —ĩre yicudicaju yua.

52 To bajiro yua yijare, ado bajiro yuare goticami:

—To bajiri Dios oca masa ĩna ucamasire quēnaro riojo gotimasiomasicōarāja mua. To yicōari, muare yu gotimasiosere ajimasirā ñari, tire quēne quēnaro riojo gotimasiomasirāja. To bajiro mua bajijama, vi ujmu gajeyeũni tirũmujmu ñarere quēne, mame ĩ juarere quēne quēnocũr'ire bajiro bajirāja mua. ĩ ya viana ĩna cubetijama, ĩnare ĩsigũmi. ĩ yirore bajirone mua yarāre quēne ĩna ajimasiroti tirayajama, tirũmuayere, to yicōari, yucmu yu gotisere quēne quēnaro riojo ĩnare gotimasioruarāja —yuare yicami Jesús.

*Nazaret vāme cubti macajmu Jesús ĩ vare queti
(Mr 6.1-6; Lc 4.16-30)*

53 To bajiro yuare gotimasio gajano, yuare ũmato vacoacami Jesús. 54 To bajivana, ĩ ya macajmu ejacajmu yua. Tojmu Dios ocare ĩna buerivijure sājajecōari, masare gotimasio ñacami. Quēnaro ĩ gotimasiosere ajicōari, no yimasibeticama ĩna:

—¿No bajicōari, to bajise gotimasiomasiati ĩ? ¿No bajiro yicōari, ĩaĩañamanire yati? 55 ¿Adi macagmu yucú moarimasmu macmu me ñatique ĩma? ¿Mar'ia macmu me ñatique? ¿Santiago, José, Simón, Judas mesa gagmu me ñatique ĩ? 56 To yicōari, jediro mani vatoajmu ñarā, ¿ĩ bederā rōmiri me ñatique ĩna? To

bajiri, ¿noju bueyujari ãni? —Jesúre ãre yicama ãna, ã ya macana.

⁵⁷ To bajiri, “Ñamasugũ me ñaami. Mani ya macagu mani masigũ ñaami” yirã ñari, ãre ajitirũnubeticama ãna. To ãna yirone, ado bajiro ãnare goticami Jesús:

—Diore gotirẽtobosarimasu gajeroju Dios ocare ã gotimasiocudijama, ãre ajirũcũbũorãma. To bajiboarine, ã ya macanare, ã ya vianare quẽne Dios ocare ã gotimasiojama, ãre ajirũcũbũomenama — ãnare yicami Jesús.

⁵⁸ To bajiri ã ya macana, ãre ãna ajitirũnubetijare, ããñañamanire jairo yĩomasibeticami.

14

*Juan vãme cutigũre, masare oco rãca bautizari-
masare ãrũjoare ãna jatarocare queti*
(Mr 6.14-29; Lc 9.7-9)

¹ Cojorũmu Galilea sitana uju, Herodes vãme cutigũ, ããñañamani Jesús ã yĩose quetire ajiyuju. ² To ã yĩãsere ajicõari, ãre moabosarimasare ado bajiro yiyuju:

—Juan vãme cutigũ, masare oco rãca bautizari-
masane, ñagũmi quẽna. Rijacoaboarine, tudicaticoarimi. To bajiri ããñañamani yĩõñaãgũmi ã —
yitũõãboayuju Herodes.

³⁻⁴ Juan ã sãacoroto rĩjoro ado bajiro bajire ti ñajare, to bajiro tũõãñuju Herodes: ã bedi Felipe manajore Herod'ias vãme cutigore ãmacõari, manajo cutiyuju Herodes.

To bajiro ã yire ñajare, ado bajiro ãre gotirũgũñuju Juan:

—Herod'iare m̄a manajo c̄utise quēnabeaja. Dios ï rotimasirere ajibeaja m̄a —ïre yirũgũboayuju Juan.

Tire ajir̄aibesuju ï manajo Herod'ias. To bajiri Juanre c̄õmemane siac̄õari, tubiberotiyuju Herodes. ⁵ To yic̄õari, ïre s̄ãrotir̄aaboayuju. “Diore gotir̄etobosarimas̄a ñaami Juan” masa ñna yir̄uc̄baosere ajiḡa ñari, b̄uto güiyuju. To bajiri ïre s̄ãrotimasibesuju.

⁶ Herodes ï ruyuarar̄um̄a ejayuju. To bajiri, masare jir̄eoñuju ï, “Boser̄um̄a yito” yiḡa. To yic̄õari, ñna r̄ējaro bero, Herod'ias maco, ñna ïaro r̄ĩjoroj̄are basañoñuju. So basasere ïac̄õari, b̄uto variquēnañuju Herodes. ⁷ To bajiri,

—Riojo m̄are gotiaja ȳa. T̄uõĩavasoabetir̄uc̄ja. No bojase m̄a s̄ēnijama, m̄are ïsir̄uc̄ja —sore yiyuju ï Herodes. ⁸ To bajiro ï yisere ajic̄õari, so jacoj̄a, “Ado bajiro ïre yic̄diya” so yi ocasãjare, ado bajiro Herodere c̄adiyuju so:

—Yuc̄acane Juan v̄ãme c̄utiḡa, masare oco r̄ãca bautizarimas̄a r̄ajoare, bare jeobariabaja joej̄a jeoc̄õari, ȳare ïsiḡa vayá —ïre yiyuju so.

⁹ To bajiro so yisere ajic̄õari, s̄ãtiritiyuju Herodes. To bajiboarine, ï jic̄õariarã ñna ajiro r̄ĩjoroj̄a, “Riojo m̄are gotiaja ȳa. No bojase m̄a s̄ēnijama, m̄are ïsir̄uc̄ja” ï yic̄õare ti ñajare, so s̄ēnirore bajirone yiyuju. ¹⁰ Tubiberiavija ñaḡare, “Juanre r̄ajoa jataya”, ñnare yiyuju. ¹¹ To bajiri, ï r̄ajoare bare jeobariabaja joej̄a jeoc̄õari, Herod'ias macore ïsiñujarã ñna. To yic̄õari, soj̄a, jacore ïsir̄etoñuju so yuja.

¹² Ti queti ajic̄õari, Herodes t̄uj̄a ejayujarã, Juan buerimasa. Ejac̄õari, ï ruj̄ari ñaboarere ãmivac̄õari,

yujeyujarã. To ñna yiro bero, yua tu ejacama ñna, Jesúre gotirã.

*Masa, cinco mil ñarãre Jesús i bare ecare queti
(Mr 6.30-44; Lc 9.10-17; Jn 6.1-14)*

¹³ Juan oco rãca bautizarimasure ñna sãare que-tire ajicõari, jãjarã masa yuare ñna sũyajare, ñna rãca ñarũabecu ñari, cũmuaju vasãja, yuare ũmato jẽacoacami, masa ñna manibũsaroju yuare ũmato vacũ. To bajiri ti macariana Jesús i vasere ajicõari, boeju jãjarã variarãma, Jesús i ejarotijure vana. ¹⁴ To bajiri rocatu ejarãne, jãjarã masa ñarãre ñacaju yua, boeju vacõari ejariarãre. Ñnare ñamaicõari, rijaye cutirãre ñna juaejarãre catiocami Jesús. ¹⁵ Rãioroto rĩjoro, i tu ejacõari, ado bajiro yicaju yua, i buerã:

—Jẽre rãioato yaja. Masa manojũ ñaja. To bajiri ñnare varotiya mu, “Masa cutojũ bare vaja yibarã vajaro” yirã —ĩre yiboacaju yua.

¹⁶ To yua yisere ajicõari, ado bajirojua yuare yicami Jesús:

—No yirã vamenama. Mũane ñnare bare ecaya —yuare yicami Jesús.

¹⁷ To i yijare, ado bajiro ĩre yicũdicaju yua:

—Bare maja yuare quẽne. Cojomo cõro pan, juarã vai cũoaja yua —ĩre yicaju yua.

¹⁸ To bajiro yua yisere ajicõari, ado bajiro yicami:

—Adojua tire juaya maji —yuare yicami.

¹⁹ To bajiri,

—Masare tatũcuroju ñnare rujirotiya —i buerãre yuare yicami Jesús.

To yicõari, cojomo cõro ñaricari pan, juarã vai ñarãre juacõari, õ vesaajua ñamõocami. To yicõari,

“Quēnaro yaja m̄”, Diore ĩre yicami. To yicōari, tire iguesurebatecōari, ĩ buerāre yuare ĩsicami. To bajiri yuaj̄ma, rujirāre ĩsibatocaj̄ma yuā yuja. ²⁰ Sīgū r̄yariaro mano quēnaro baṁs̄c̄t̄ijedicōacama ĩna. ĩna bagajanoro bero, ĩna bar̄asere, yuā juarēojama, j̄uaāmo cōro, ḡubo j̄ma jēnituario ñarijib̄ari r̄yacaj̄ma. ²¹ Tire bacana cinco mil ūm̄ma ñacaj̄ma yuā. Rōmiare, r̄īamasare quēne cōīabeticaj̄ma yuā.

Oco joene Jesús ĩ vare queti

(Mr 6.45-52; Jn 6.16-21)

²² Cūmuaj̄ma yuare vasājaroticami Jesús. “Yuare jēadiyuya. Maji masare tudirotiḡma yaja yu”, yicami. ²³ ĩnare tudirotigajano, buroj̄ma majacoasuju, toj̄ma Diore sēnir̄ma. Ti r̄āioato bero, toj̄ma ĩ sīgūne ñacōañuju ĩ maji. ²⁴ Yuaj̄mama, ūtab̄uc̄ra jēana, sōj̄ma tira ḡudareco t̄usacaj̄ma yuā. To yuā t̄usatone, b̄uto mino vacaj̄ma. To bajica yiro, sabet̄ucōacaj̄ma ti. To bajiri jēat̄imabeticaj̄ma. ²⁵ To yuā bajiñarone, busurocaroar̄ij̄ma yuā t̄uj̄ma oco joene vadīcami Jesús. ²⁶ Oco joej̄ma ĩ vadire ĩarāne, ūsacaj̄ma yuā.

—¡Bajirocar!i v̄āti ñaami! —yīavasāc̄aj̄ma yuā.

²⁷ To yuā yiboajaquēne,

—Gūibesa. Variquēnaña m̄ma. Yune ñaja —yuare yicami Jesús.

²⁸ To ĩ yisere ajicōari, yuā r̄ācaḡma Pedro ado bajiro ĩre yic̄dicami:

—Yu ūj̄ma, m̄ne m̄ ñajama, oco joene m̄ t̄uj̄ma yure varotiya —ĩre yicami Pedro.

²⁹ To ĩ yisere ajicōari,

—Vayá m̄ —ĩre yicami Jesús.

To ĩ yisere ajicōari, v̄āḡā, oco joej̄ma vacami Pedro, Jesús t̄u ejaṁac̄ma. ³⁰ To bajiboarine, mino b̄uto

ti vasere ñacõari, güicami. To bajicõari, rujacõa sñoacami yuja. To bajigune,

—Yñ ujñ, rujacñ yaja yñ. Yñre ejarẽmogñaya — yivasãcami.

³¹ To ñ yirone, ñ ãmore ñiacõari, ado bajiro ñre yicami Jesús, Pedrorre:

—¿No yigñ, “Ñ ejarẽmose rãca vamasirñcñja yñ”, yñre yitñoña tñjacoajari mñ? —Pedrorre ñre yicami Jesús.

³² To yicõari, cñmuajñ ñna vasãjarone, mino vatñjacoacajñ yuja. ³³ To yicõari, cñmuajñ Jesús rñjorojñ gñsomuniari tñtucajñ yñ, ñre rñcñbñorã:

—Socagñ me ññja mñ. Dios macñne ññja —Jesúre ñre yicajñ yñ.

Genesaret sitanare rijaye cñtirãre Jesús ñ catoire queti

(Mr 6.53-56)

³⁴ To baji jẽanane, Genesaret vãme cñti sitajñ eja-cajñ yñ. ³⁵ Ti macariana Jesús ñ ejasere ñamasicõari, masa jedirore gotibatoriarãma. To bajiri, masa rijaye cñtirãre juaejacama Jesús tñjñ. ³⁶ To ñna yirã, ado bajiro Jesúre yicama ñna:

—Mñ ye sudi gaja yñare moañarotiya. Ti rñne bojaja yñ. To bajiro yñ yijama, caticoarñarãja yñ —ñre yisẽnicama.

To bajiri, ñ sudi gajare moañarãma, caticoacama.

15

“Masa ñna yisere ñacõari, ‘Rojorã ñaama’ yire me ññja. Ñna tñoñasejñare masicõari, ‘To bajiro yirã ñaama’ yire ññaroja”, Jesús ñ yigotimasiore queti

(Mr 7.1-23)

¹ Fariseo masa, to yicōari Dios ĩ rotimasire gotimasiorimasa quēne ejacama, Jesús tuj̄. Jerusalénj̄ vadiriarã ñacama. Jesús t̄ ejacōari, ado bajiro ĩre sēniñacama ĩna:

² —¿No yirã mani ñicua ĩna yimasiriarore bajiro yibeati m̄ buerimasa? ĩna baroto r̄joro, ĩna ãmori coemasiriarore bajiro coebeamã ĩna —ĩre yicama ĩna.

³ To bajiro ĩna yijare, ado bajiro ĩnare c̄dicami Jesús:

—Mani ñicua ĩna rotimasirej̄are c̄dirã ñari, Dios ĩ rotimasusej̄arema c̄dibeaja m̄. ⁴ Ado bajiro gotiaja Dios ĩ rotimasire: “M̄ jac̄re, m̄ jacore quēnaro r̄c̄b̄uoya”. To yicōari, gaje v̄ame ado bajiro yaja: “No bojaḡ, ĩ jac̄re, ĩ jacore, ‘Rojose t̄m̄oucaruarãja m̄’ ĩnare ĩ yijama, ĩre s̄aroti ñaja”, yigotiaja Dios ĩ rotimasire.

⁵⁻⁶ M̄aj̄ama, ado bajiroj̄a rotiaja m̄: “Ĭ ye r̄ca ĩ jac̄are ĩ ejarēmobetijama, quēnacōaja. ‘Ȳ gajeyeũni ȳ c̄ose Diore ȳ ĩsiroti r̄ne ñaja. To bajiri m̄are ejarēmomasibeaja ȳ’ yicōari, ĩ jac̄are ĩ ejarēmobetijama, quēnacōaja”, yirotiaja m̄. To bajiro m̄a yijama, mani ñicua ĩna rotimasirej̄are c̄dirã ñari, Dios ĩ rotisej̄arema c̄dibeaja m̄. To bajiro m̄a yijama, “Ñie vaja maja Dios oca”, yirã yaja m̄. ⁷ “Quēnaro yirã ñaja ȳa” yiboarine, rojorã ñaja m̄. Diore gotirētobosarimas̄, Isa'ias ñamasir'i, m̄a bajirotire quēnaro t̄oñacōari, ado bajiro ucamasiñumi:

⁸ “Ĭna oca masune yirã, quēnaro ȳre yir̄c̄b̄uoaama ĩna. To bajiro yirã ñaboarine, ȳ bojarore bajiro t̄oñabeama.

9 Y_u yere buecōari, ñna masu ñna t_uoĩasere gotimasioama. Tirene, ‘Dios ñ rotise ñaja’ yiboama. To bajiri, y_ure ñna r_uc_ub_uoboase vaja, ñie vaja b_ujamenama ñna”, yiuca-masiñumi Isa’ias, Diore gotirētobosagu — yigoticami Jesús.

10 To ñ yiro bero, masare jicōari, ado bajiro ñnare yicami Jesús:

—Y_ure ajicōari, quēnaro ajimasiña m_ua. 11 Dios ñ ñajama, mani ñic_ua ñna yimasiriarore bajiro ñmo coemenane mani base s_uori me rojose yirãja mani. Rojose t_uoĩacōari, rojose mani ñagōsej_ua ñaja rojose mani yise. “Ti s_uorine rojose t_um_uo_ur_uarãja mani”, yimasirona ñaja m_ua — ñnare yicami Jesús.

12 To bajiro Jesús ñ yisere ajicōari, ado bajiro ñre yicaj_u y_ua:

—¿Tire m_u gotisere fariseo masa m_ure ñna ajijūnisinisere masibeati m_u? —Ñre yicaj_u y_ua, ñ buerimasa.

13 To bajiro y_ua yiro, ado bajiro y_uare yicami Jesús:

—Ñ ya vesej_u ote ñ otere t_u vidi ti judijama, ti ñe rãc_uj_une v_uereacōar_uc_umi. To bajirone yir_uc_umi y_u jac_u quēne. “Y_u yarã me ñaama” yig_u ñari, ñnare reacōar_uc_umi Dios. 14 To bajiri fariseo masare t_uoĩagüibesa m_ua. ñna ñnarãma ñamenagaãjerã ñamenare t_ua vanare bajiro bajirã. Sīg_u ñabec_u, gãji ñabec_ure ñ t_uavajama, gojej_u reasãcōanama ñna juarãj_une. To bajiri rojose ñna bajirotire masirã ñari, ñnare t_uoĩagüibesa m_ua —y_uare yicami Jesús.

15 To ñ yirone, ado bajiro ñre yicami Pedro:

—M_u gotimasiosere quēnaro y_uare gotirētobuya
—ĭre yicami.

¹⁶ To ĭ yisere ajicōari,

—¿Ajimasibeati m_ua quēne? —yicami. ¹⁷⁻¹⁸ —
M_ua basāse m_ua g_udajoaj_u vatoja ti. Tij_u bero,
rētobudiroja ti. To bajiri m_uare rojose yimasibeaja
ti. To bajiboajaquēne, m_ua ñagōjama, t_uoĭacōari,
ñagōaja m_ua. To bajiri rojose m_ua t_uoĭajama, ti
s_uorine rojose tām_uo_uarāja m_ua. ¿Tire quēnaro aji-
masibeatique m_ua? ¹⁹ Masa, rojose t_uoĭacōari, ado
bajise rojose yirāma: Gājerāre sĭarāma ĩna. Manajo
c_utirā, manaj_u c_utirā, manajo mana, manaj_u mana
quēne, gājerā rāca ajeriarā c_utirāma. Juarudirāma.
Socarāma ĩna. Gājerā ajiro rĭjoroj_ua, socarāne, “Ado
bajise rojose yima”, yigotirāma. ²⁰ To bajise rojose
yirāma masa, rojose t_uoĭacōari. Ti s_uorine rojose
tām_uo_uarāma. Baroto rĭjoro, āmori mani ñic_ua
ĩna coemasiriarore bajiro coebeti s_uori me, rojose
tām_uo_uarāma masa —y_uare yicami Jesús.

Jud'io maso me Jesúre so ajitirān_ure queti
(Mr 7.24-30)

²¹ Gotigajanocōari, y_uare ũmato vacoacami Jesús,
Tiro, to yicōari Sidón vāme c_uti macari t_uj_u vana.
²² Toj_u y_ua ejaro bero, sĭgō cananeo maso, Jesús
t_uj_uare avasā vadicamo so:

—Y_u _uj_u, David ñamasir'i jānami, “Ro-
tim_uo_urgō_uc_uja m_u” yĭg_u, Dios ĭ cōar'i ñaja
m_u. Y_ure ĩamaiña. Y_u maco so _us_uj_u vāti sãñagō
ñ_uamo. To bajiri b_uto rojose tām_uoamo —Jesúre
yigoticamo so.

²³ To bajiro so yiboajaquēne, sore cʉdibeticami Jesús. To bajiri ado bajiro Jesúre yicajʉ yʉa, ĩ buerimasajʉama:

—Sore varotiya mʉ. Gõjanabioro manire avasã sʉyaamo —ĭre yiboacajʉ yʉa.

²⁴ To bajiro yʉa yirone, ado bajiro sore yicami Jesús:

—Yʉ yarã jud'io masa, oveja mavisiarãre bajiro bajirãma. ĩnare yʉre ejarẽmoroticõacami Dios —sore yicami Jesús.

²⁵ To bajiro ĩ yisere ajicõari, ĩ rĩjorojʉa gʉsomuniari tuetuejacamo so, ĩre rʉcʉbʉogo. To yicõari, ado bajise ĩre yicamo:

—Yʉ ʉjʉ, yʉre ejarẽmoña —ĭre yicamo so.

²⁶ To bajiro so yiboajaquēne, ado bajiro sore yicami Jesús:

—To bajiro yʉ yijama, rĩamasa ĩna basere ĩmacõari, yaiare ecagʉre bajiro yigʉja yʉ —sore yicami.^f

²⁷ To bajiro ĩ yisere ajicõari, ado bajiro ĩre yicamo so:

—Yʉ ʉjʉ, riojo gotiaja mʉ. To bajiboarine ĩna ʉjarã ĩna bavẽjasere barãma yaia —Jesúre ĩre yicamo so. “Yʉa quēne, jud'io masa me ñaboarine, mojoroaca yʉare mʉ ejarẽmojama, quēnaja” yigo, to bajise ĩre yicamo so.

²⁸ To bajiro so yisere ajicõari, ado bajiro sore yicami Jesús:

—“Yʉre ĩamaicõari, ejarẽmorʉcʉmi”, yʉre yitʉoĩa tʉjabeco masu ñaja mʉ. To bajiro mʉ yitʉoĩase

^f **15:26** Ado bajiro yigʉ, to bajise sore yiyuju Jesús: “Judío masare ejarẽmobecʉne, gãjerãjʉare yʉ ejarẽmojama, quēnabeaja” yigʉ, to bajise yiyuju.

ñajare, mꝯ maco ꝯsꝯjꝯ sãñagũre vãtire ãre buro-
cacõaja yꝯ —sore yicami Jesús.

To bajiro ã yirirĩmarone, quẽnaejacoasuju so, vijꝯ
ñario.

Jãjarã, rijaye cõtirãre Jesús ã catiore queti

²⁹ To ã yiro bero, Galilea vãme cõtirita tꝯjꝯ va-
cajꝯ yꝯa, Jesúrãca. Tojꝯ ejaçõari, burojꝯ majacajꝯ.
Tojꝯ maja, joe jeaejaçõari, ejarũjucoacajꝯ. ³⁰ To
yꝯa bajiro ãaçõari, Jesús tũre jãjarã masa ejacama,
rijaye cõtirãre juaejarã. Ñna juaejacana ado bajiro
bajirã ñacama: Rujasagueri vana, jeariarã, ãamena,
ñagõmena, to yicõari, jãjarã gajeye rijaye cõtirã
ñacama. Ñ tꝯ ñna ejarone, ñnare catiocami Jesús.

³¹ Ñagõmena ñaboariarã, ñagõcoacama. Rujasagueri
vaboariarã, quẽnaro vacama. Ñamena ñaboariarã,
ãacoacama. Jeariarã quẽne, quẽnaejacoacama. To
bajiro bajisere ãaçõari, no yimasibeticama masa, ti
ũnire ãabetirũgũriarã ñari. To bajiri Diore quẽnaro
rãcꝯbꝯo variquẽnacama ñna, “Ñ ñagũmi quẽnaro yigꝯ,
jud'io masa yꝯa rãcꝯbꝯogꝯ” yirã.

*Masa, cuatro mil ñarãre Jesús, bare ã ecare queti
(Mr 8.1-10)*

³² Ñ buerãre yꝯare jicõari, ado bajiro yicami Jesús:
—Ado ñarãre ãamaiaja yꝯ. Idiarũmꝯ tꝯsajꝯ yuja,
yꝯ rãca ñna ñaro. To bajicõari, bare maama. Bame-
nane ñna ya virijꝯ ñna tudiasere bojabeaja yꝯ. Ñnare
yꝯ tudirotijama, bamenane ñna vajama, varũtu
vanane, ñiorijarã ñari, rijavẽjaborãma —yꝯare yi-
cami Jesús.

³³ To bajiro ã yirone, ado bajiro ãre yicajꝯ yꝯa:

—Ado, masa manojm ñaja. No bajiro masa ñaro cõro ñna barotire bare bñjamasifna manoja —ÿre yicajm yna.

³⁴ To yna yirone,

—¿No cõro jairo pan cõoati mna? —ynare yicami.

—Cojomo cõro jna jñnituario ñaricari ñaja. To yicõari, vai mojoroaca ñaama —ÿre yicajm yna.

³⁵ To yna yirone, rãcacane masare rujirociami Jesús. ³⁶ To yicõari, pan cojomo cõro jna jñnituario ñaricari ñasere, vaire quẽne juacõari, “Quẽnaro yaja mñ”, Diore ÿre yivariquẽnacami. To yicõari, tire iguesurebatecõari, ynare ÿsicami. To bajiri yna jna, rujirãre ñnare ÿsibatocajm yna yuja. ³⁷ Sifgũ rnyariaro mano baũsũcutijedicõacama. ñna bagajanoro bero, ñna baruasere yna juarẽojama, cojomo cõro jna jñnituario ñarijiburi rnyacajm. ³⁸ Tire bacana cuate mil ÿmna ñsacajm yna. Rõmiare, rñamasare quẽne cõĩabeticajm yna. ³⁹ To yigajanocõari, masare tudirociami Jesús. To baji, cũmuane Magadãn vãme cuti macajm vacajm yna.

16

“ÿããñamani ynare yifõña”, Jesũre ñna yiboare queti (Mr 8.11-13; Lc 12.54-56)

¹ Fariseo masa, saduceo masa quẽne, Jesũre ÿarã ejacama ñna. Ejacõari, ÿre sñniacama, “Cũdimasibeticõari, rojose tãmõoato ÿ” yirã:

—“Dios ÿ cõagũ ñnaami’ ynare yimasiato” yigm, õ vecaye ÿããñamani ynare yifõña —yisñiboacama.

² To ñna yiboajaquẽne, ado bajiro ñnare cãdicami Jesús:

—Rãioriję, ãmũagasero ti sũaro ãacõari, “Busiyę, quẽnarirũmũ ñarũaroja”, yaja mũa. ³ Busuriję ñibiacõari, bueri ti sũayujjama, “Adirũmũ, oco quedirũaroja”, yĩamasiaja mũa. No bojarirũmũ, ãmũagaserore ãacõari, “Quẽnarirũmũ, rojorirũmũ ñarũaroja”, yĩamasiaja. To bajiro yĩamasirã ñaboarine, ñamasusejũare ãamasibeaja mũa. Adirũmũri yũ yisere ãarã ñaboarine, “Dios ã roticõar'i ñari, yami”, yĩamasibeaja mũa. ⁴ Mũa adirodoria, rojose yirã, Diore mũa gotirore bajiro yimena ñaja mũa. To bajirã ñari, “ããããmani mũa yĩose bojaja”, yũre yisẽniboaja mũa. To bajiro mũa yiboajaquẽne, to bajise mũare yĩobetirũcũja. To bajiboarine Jonás ñamasir'i Diore gotirẽtobosarimasũ ã bajimasirere bajiro mũare bajĩoroti ñaroja —ĩnare yicũdicami Jesús.

To bajiro ãnare yicõa, ãnare jẽaveocoacajũ yũa.

Fariseo masa panre vauvasere bajiro ãna bajire queti

(Mr 8.14-21)

⁵ Utabũcũra gajejacatũajũ jẽaejacõari,

—Mani baroti pan masiriticoayuja mani —yũa masune gãmerã yĩñacajũ yũa.

⁶ To yũa yiro, ado bajiro yũare goticami Jesús:

—Fariseo masa, saduceo masa “Pan vauvato” yirã ãna vnosere quẽnaro ajicõããña mũa —yũare yicami.

⁷ To ã yisere ajimasimena ñari, yũa masune ado bajiro gãmerã yicajũ yũa:

—Pan mani masiritijare, to bajise gotigũ yigumi —gãmerã yicajũ yũa.

⁸ To bajiro yua yituoĩasere masicõari, ado bajiro yuare yicami Jesús:

—¿No yirã, “Pan maja manire”, yati mña? “Pan ti maniboajaquẽne, manire ãamaicõari, quẽnaro ejarẽmorucumi Jesús”, ¿yuare yituoĩabeati mña? ⁹ ¿No yirã ajimasibeati mña maji? Cojomo cõro ñaricare panre bujucõari, cinco mil masa ñarãre ecacaju yu. Ñnare yu ecaro bero, jairo baruarajiburi ruycaju, ¿Tire masiritiati mña? ¹⁰ Tijũ bero, quẽna cojomo cõro jua jẽnituario ñaricari panre bujucõari, cuatro mil masa ñarãre ecacaju yu. Ñnare yu ecaro bero, jairo baruarajiburi ruycaju. ¿Tire quẽne masiritiati mña? ¹¹ No yirã ajimasimena masu ñamenaja mña tia. Jẽju, “Fariseo masa, saduceo masa, ‘Pan vauvato’ yirã, ñna vuosere quẽnaro ajicõiaña” yu yijama, “Pan juabesuma” yigu me yibu yu —yuare yicami Jesús.

¹² To ñ yijare, ajimasicaju yua yuja. “Fariseo masa, saduceo masa, ‘Pan vauvato’ yirã ñna vuosere quẽnaro ajicõiaña’ yuare yigu, ‘Ñna gotimasiõsejũare quẽnaro ajicõiamasiña, ‘Ñnare bajiro bajimavisiarobe’ yirã’ yire ãnire yuare gotimasiogũ yiboayujari Jesús”, yiajimasicaju yua yuja.

*“Rotimũorãgõrucumi’ yigu, Dios ñ cõar’i ñaja mña”, Jesúre Pedro ñ yire queti
(Mr 8.27-30; Lc 9.18-21)*

¹³ To yi varũtu vanane, Cesarea de Filipino vãme cuti sitajure ejacaju yua, Jesúrãca. Toju ejacõari, ado bajiro yuare sẽnĩacami Jesús:

—Yure, Dios ñ roticõacacure, ¿ñimũ ñnaami yure yati ñna, masa? —yuare yisẽnĩacami Jesús.

14 To bajiro ĩ yisere ajicōari, ado bajiro ĩre cūdicajū yua:

—Sīgūri, “Juan vāme cūtigū, masare oco rāca bautizarimasū, tudicaticōari bajigūmi quēna”, mure yama ĩna. Gājerāma, “El’ias ñamasir’i ñagūmi”, yama ĩna. Gājerājūama, “Jerem’ias ñamasir’i ñagūmi”, yama. Gājerājūama, “Gāji, Diore gotirētosamasir’i ñagūmi”, mure yama ĩna —Jesúre ĩre yicūdicajū yua.

15 To bajiro yua yirone,

—Mūama, ĩñimū ñaami yure yati mūa? —yūare yisēñiacami.

16 To ĩ yisere ajicōari, ado bajiro yicami Simón Pedro:

—Mū ñaja rojose yua tāmūoborotire yūare yirētosacōari, rotimūorūgōrocu, Dios ĩ cōar’i. Masirētogū, Dios macū ñaja mū —Jesúre ĩre yicūdicami.

17 To ĩ yisere ajicōari, ado bajiro ĩre yicami Jesús:

—Quēnaro riojo gotiaja mū, Simón, Jonás macū. Variquēnaña mū. Tire gotigū, masū ĩ masise sūori me tire gotimasiaja mū. Ō vecagū yū jacū ĩ masise rāca tire gotimasiaja mū. 18 Ado bajiro mure gotiaja yū: Mū vāme ñaja Pedro. “Gūta” yirūaro yaja ti “pedro” ti yijama. Mū gotimasiose sūorine jājarā masa, yure ajitirūnūcōari, rējarūgūñarāma ĩna. Yure ajitirūñarā ĩna ñajare, vāti yarā, “Bajireacōa tūjajaro ĩna” yirā, rojose ĩnare yimasibetirūarāma ĩna. 19 To bajiri, ado bajiro mure gotiaja yū: Ūmūagasero soje jāñariaro cūogure bajiro mure cūrūcūja yū. To bajiri, masare ĩacōari, ado bajiro ĩnare yimasirūcūja mū: “Ānoa to bajiro yirā ñari,

Ūjɯ Dios yarã quẽnaro ï yirã ñaruarãma. Ñnoajɯa, to bajiro yirã ñari, Dios yarã me ñaama”, ñnare yimasirɯcɯja mɯ. Adi sitajɯ yɯre rotibosagu ñarɯcɯja mɯ. To bajiro yigɯ ñari, “Ado bajiro mɯa yijama, Dios yarã ñaruarãja mɯa. Ado bajirojɯa mɯa yijama, Dios yarã me ñaruarãja mɯa”, yimasirɯcɯja mɯ —ïre yicami Jesús.

²⁰ To bajiro Pedrore ïre yigotigajanocõari, ado bajiro yɯare yicami:

—Ïne ñaami “ ‘Rotimɯorũgõrɯcɯmi’ yigɯ, Dios ï cõar’i”, gãjerãre ñnare yigotibeja —yɯare yicami Jesús.

*“Yɯre sïaruarãma”, Jesús ï yire queti
(Mr 8.31–9.1; Lc 9.22-27)*

²¹ To ï yiro bero, Jerusalénjɯ ï bajirotire ado bajiro yɯare gotimasiosɯocami Jesús:

—Jerusalénjɯ varoti ñaja yɯre. Tojɯ yɯ ejaro, bɯcɯrã, paia ɯjarã, to yicõari, Dios ï rotimasire gotimasiorimasa quẽne, rojose yɯre yicõari, yɯre sïaruarãma ñna. Yɯre ñna sïaboajaquẽne, idiarũmɯ tɯsatirũmɯne yɯre catiorɯcɯmi Dios —yɯare yisɯocami Jesús. ²² To ï yisere ajicõari, ricati ïre jicãmotocõari, ïre yiboacami Pedro:

—Yɯ ɯjɯ, to bajiro mɯ bajirotire bojabecɯmi Dios. ¡To bajiro mɯ bajiroti, mɯre bajibeticõato! —ïre yiboacami Pedro.

²³ To ï yisere ajicõari, jɯdarũgũgũne, ado bajiro Pedrore ïre goticami Jesús:

—¡Satanás, vasa mɯ! Vãtia ɯjɯre ñagõbosagu yaja mɯ. To bajiro yibesa. “Dios ï bojarore bajiro yibeticõato” yigɯre bajiro yaja mɯ. To bajiro mɯ yijama, Dios ï tɯoïarore bajiro me tɯoïaja mɯ. Masa ñna

tuoĩarore bajiro tuoĩagũ yaja —Pedrore ĩre yicami Jesús.

²⁴ To yicõari, ado bajiro ĩ buerãre yũare yicami Jesús:

—No bojagu yu yu ĩ ñarũajama, ĩ bojasere ĩ ye ñarotire tuoĩabecũne, “Jesúre bajiro rojose tãmuogũcũja yu quẽne” yituoĩacõari, yũũare ajisũyarũcũmi. ²⁵ No bojarã, ĩna bojaro ñare cutirãma, adi macarũcũrore ñasere ĩavariquẽnacõari, Diore tuoĩamenama, Dios ĩ catisere yayibetire cũomena ñarũarãma ĩna. To bajiboarine, yũre ajitirũnarã, yu oca ĩna gotisere ajijũnisinicõari, ĩna sũarãma, Dios tu quẽnaro ñarona ñarãma. ²⁶ Sĩgũ adi macarũcũroju gajeyeũni jediro ĩ bũjaboajaquẽne, beroju rojose tãmuotũjabetiriaroju ĩ vajama, gajeyeũni ĩ bũjaboare, ñie vaja manoja. Ñiere Diore ĩsimasibecũmi, “Ĩ rijato berojũma tudirijabeticõato” yigu, “Dios ĩ catisere yũre ĩsiato” yigu. Mani rijato berojũma “Tudirijabeticõato” yigu, Dios ĩ catisere ĩ ĩsise cõro vaja cuti manoja. ²⁷ Yu, Dios ĩ roticõacacũ ñacõari, “Quẽnarẽtogũ ñaja yu”, yu jacu ĩ yĩõore bajiro yigu ñari, ĩ bususe rãca tudiejarũcũja yu. Yu rãca vadirũarãma Dios ĩ cõarã, ángel mesa. Tudiejacõari, masa ĩna yisere ĩacõari, “To bajiro yirã ñari, quẽnase bũjarã, rojose tãmuorã bajirũarãja mũa”, ĩnare yirũcũja yu. ²⁸ Riojo mũare gotiaja yu. Mũa sũgũri mũa bajireabetone, “Ñajediro mũũ ñaami yu roticõacacũ” Dios mũare ĩ yĩõsere

ĭaruarãja mña —yũare yicami Jesús. 8

17

*Ĭ buerimasa ĭna ĭaro rĩjorojua Jesús ĭ godovedĩore
queti*

(Mr 9.2-13; Lc 9.28-36)

¹ Cojomo cõro, coja jẽnitarirũmũ bero, Pedro, Santiago, ĭ bedi Juanre quẽne ẽmũariburo joejũ ĭnare ũmato vacami Jesús. ² Tojũ ĭna ejaro, ĭna ĭaro rĩjorojua, Jesús rioga busucoasuju ti. Ɛmũagũ muijũre ĭacãnamuriarore bajiro cajemose busuyuju ti. To yicõari, sudi ĭ sãñase quẽne bũto boticoasuju ti. ³ To bajicõari, Moisés ñamasir'i, El'ias ñamasir'i rãca Jesús tũ ruyuarũgũcõari, ĭ rãca ĭna gãmerã ñagõsere ĭaũujarã ĭna, Pedro mesa. ⁴ To bajiro ĭna bajisere ĭacõari, ado bajiro Jesũre yiyuju Pedro:

—Yũ ẽjũ, adoju mani ñajama, quẽnamasucõaja. Mũ bojajama, mña ñaro cõrone vijãiri mũare bũabosarũcũja yũ. Mũ yajãi, El'ias yajãi, to yicõari, Moisés yajãi bũabosarũcũja —Jesũre yiboayuju Pedro.

⁵ To bajiro ĭ yirirĩmarone, bueri bũto cajemose ĭnare buebibecõañuju ti. Ti bueri vatoajũ ado bajiro ocaruyuyuju:

—Ãnine ñaami yũ macũ, yũ maigũ. Ĭre bũto ĭavariquẽnaja yũ. Ĭre quẽnaro ajitirũnũña mña —yi ocaruyuyuju.

8 16:28 Dios oca masa ĭna ucamasirere buerẽtoburimasa sĩgũri ado bajiro yicama ĭna, 16.28 gotirijũre: “ ‘Ñajediro ẽjũ ñaami yũ roticõacacũ” Dios mũare ĭ yĩorotire’ Jesús ĭ yijama, ĭ buerimasa sĩgũri ĭna ĭaro rĩjorojua Jesús ĭ godovedĩore yigũ yirimi”, yicama Dios ocare buerẽtoburimasa sĩgũri.

⁶ To bajiro yi ocaruyusere ajicōari, bato güiyujarã ñna Pedro mesa. Bato güirã ñnari, muqueacoasujarã ñna. ⁷ To bajiro ñna bajisere ñacōari, ñna ta vacōari, ñnare moañañuju Jesús. Ñnare moañañune, ado bajiro yiyuju:

—Vũmurũgũña. Güibesa mua —ñnare yiyuju.

⁸ To bajiro ñ yiro bero, ñamũoboayujarã. El'iare, Moisére ñnare ñabujabesujarã. Jesús sũgũne ñañañuju ñ yuja.

⁹ To bajiro bajicōari bero, ti buro ñnare ũmato rojacũne, ado bajiro ñnare rotiyuju Jesús:

—Jẽju mua ñasere gãjerãre gotibeja maji, yũ, Dios ñ roticōacacũ, yũ rijato bero, quẽna yũ tudicatiroto rĩjorore —ñnare yiyuju Jesús.

¹⁰ To ñ yijare, ado bajiro Jesũre sẽnĩñañujarã ñna:

—¿No yirã, “ ‘Rotimũorũgõrũcumĩ’ yigũ, Dios ñ cõarocũ ñ ejaroto rĩjoro ejarũcumĩ El'ias ñamasir'i”, yati ñna Dios ñ rotimasire gotimasiorimasa? —Ñre yisẽnĩñañujarã ñna.

¹¹ To ñna yijare, ado bajiro ñnare cũdiyuju Jesús:

—Riojo yiyuma Dios ñ rotimasire gotimasiorimasa, “El'ias ñamasir'i ejasũorũcumĩ” ñna yijama. “Rotimũorũgõrũcumĩ” yigũ, Dios ñ cõarocũ, ñ ejaroti ñajare, “Jediro Dios ñ bojarore bajiro yirã, quẽnaro ñayuto mani” yigũ, ejasũorũcumĩ. To bajiro ñ bajiroti ñajare, Dios ñ rotimasire gotimasiorã, ñna gotiri vãmere bajirone yaja Dios oca masa ñna ucamasire quẽne. ¹² “To bajiro yaja” yimasirã ñaboarine, ñ ejaro ñre ñamasibesuma ñna. Jẽre ejayumi. To ñ bajiboajaquẽne, ñna bojarore bajiro rojose ñre yiyuma. Yũ, Dios ñ roticōacacũre quẽne, to bajirone yũre yirũarãma —ñnare yitudioja vayuju Jesús.

13 To bajiro ĩ yisere ajimasicōari, “El'ias ñamasir'ire ĩ yijama, Juan vāme catigũ, masare oco rāca bautizarimasũjũare gotigũ yami, ĩre bajiro tũoĩar'i ĩ ñajare”, yiajimasĩñujarā ĩna Pedro mesa.

*Masũ usũjũ sãñagũre vãtire Jesũs ĩ burocare queti
(Mr 9.14-29; Lc 9.37-43)*

14 Ti burojũ majariarā, yũa tũ rojaejacama ĩna quẽna. Jãjarā masa ñacama yũa rāca. Jesũs ĩ tudiejasere ĩacōari, ĩ rĩjorojũa gũsomuniari tuetucami sĩgũ. To yicōari, ado bajiro Jesũre yicami:

15 —Yũ usũjũ, yũ macũre ĩamaiña mũ. Biyaroaca rijaquedirũgũami. To bajica yigũ, bũto rojose tãmũorũgũami. Cojoji me jeamejũ rocatĩacōarũgũami. To bajicōari, oco vatoajũ quẽne rocaroacōarũgũami. 16 Mũ buerā tũ ĩre ãmiejaboabu yũ. ĩ usũjũre sãñagũre vãtire burocamasimema ĩna —Jesũre yicami.

17 To ĩ yisere ajicōari, ado bajiro yicami, yũare ĩ buerimasare, to yicōari, ĩre ajirā ejarāre quẽne:

—Rojosere tũoĩarā ñari, Diore ajitirũnamena masu ñacōaja mũa. ¿No cōrojũ mũare gotimasio tũjaguti yũ? Yoaro mũa rāca yũ ñaboajaquẽne, yũ masisere mũare yũ usũjũre ajitirũnũbeaja mũa maji —yũare yicami Jesũs. To yigũne, —Adojũa vãti sãñagũre ĩre ãmiaya —yicami Jesũs.

18 ĩre ĩna ãmiejarone, ĩ usũjũ sãñagũre vãtire burocacōacami Jesũs. Vãti ĩ budirirĩmarone, catiquẽnagũ ñacoacami daquegũjũa.

19 To ĩ yiro bero, ricati cãmotadicōari, Jesũre ado bajiro ĩre sēniĩacajũ yũa:

—¿No yirā daquegũ usũjũre sãñagũre vãtire burocamasibeti yũa? —ĩre yicajũ yũa.

20 To bajiro yña yisere ajicōari, ado bajiro cūdicami Jesús:

—“Dios ĩ ejarēmose rāca burocaruarāja” yitnoīamena ñari, vātire burocamasibesuja mña. Riojo mñare gotiaja yñ: “Mojoroaca yimasirā ñaboarine, Dios ĩ ejarēmose rāca yimasicōarāja” yirā, i burore, “Gajerojñ vasa” mña yirotijama, to bajirone bajirñaroja ti. Ñiejña mña yimasibeti manirñaroja. ²¹ To bajiboarine, jējñ yñ burocagñre bajiro bajirāre mña burearñajama, bare bamenane Diore sēnicōari rñe bureamasirñarāja mña —yñare yicami Jesús.

*“Yñre sñarñarāma”, Jesús ĩ yigotibabore queti
(Mr 9.30-32; Lc 9.43-45)*

22 Galilea sitajñ vana, gāmerā cāmotadiri mene cojojñnane Jesúrāca vacudicajñ yña. To bajiro yñare ũmato bajicudigñe, ado bajiro yñare yicami Jesús:

—Yñre Dios ĩ roticōacacñre masare ĩsirocarñcñmi sñgñ. ²³ To bajiro ĩ yijare, yñre sñarñarāma ĩna. Yñre ĩna sñaboajaquēne, idiarñmñ tusatirñmñne yñre cationñcñmi Dios —yñare yicami Jesús.

To bajiro ĩ yisere ajicōari, bñto sñtiriticañ yña, ĩ buerā.

*Diore yirñcñbñoriavire boarijañrñre quēnorñarā,
vaja sēnirimasa, Pedrore ĩna sēññare queti*

24 To ĩ yiro bero, Capernaum vāme cñti maca ejacajñ yña, Jesúrāca. Tojñ yña ñaro, Diore yirñcñbñoriavire boarijañrñre quēnorñarā, vaja sēnirimasa, Pedrore sēññarā ejayujarā, macajñjñ:

—¿M̄are gotimasiorimas̄ma, Diore yir̄uc̄b̄oriavi quēnoroti vaja ĩsibec̄ati ĩ? —Pedrore ĩre yisēnīañujar̄ã ĩna.

²⁵—Īsir̄uc̄ami —yic̄diyuju Pedroj̄uama.

Tij̄u bero, vij̄u s̄ajaejac̄ari, vaja sēnirimas̄a ĩna sēnīarere ĩ gotibetone, Jes̄uj̄ua, ado bajiro Pedrore ĩre boca yic̄oacami:

—Simón, ¿no bajiro t̄oĩati m̄u? ¿Adigodoana ujar̄ã, ñimar̄ãj̄uare vaja yirotiati? ¿Īna yar̄arene ḡamer̄ã vaja sēniatiquē? ¿Gajero vadiriar̄ãj̄uare vaja yirotir̄uḡuatiquē ĩna? —Pedrore ĩre yisēnīacami Jes̄ús.

²⁶To bajiro ĩ yisēnīarone, ado bajiro ĩre c̄adicami Pedro:

—Gajero vadiriar̄ãj̄uare vaja yirotir̄uḡuama —yic̄dicami Pedro.

To ĩ yirone, ado bajiro yicami Jes̄ús:

—Riojo yaja m̄u. To bajiri Dios mac̄u ñari, ȳu ya vi ti ñajare, Diore yir̄uc̄b̄oriavi coder̄are vaja yibec̄aja ȳuma. ²⁷To bajiboarine, “Rojose manire t̄oĩabetic̄oato” yir̄ã, mani vaja yijama, quēnaja. Ūtab̄uc̄uraj̄u vasa m̄u. Toj̄u vai vejeba. Bas̄oḡure ĩre s̄iac̄ari, ĩ risej̄u ḡãjoatii b̄ujar̄uc̄aja m̄u. Titi-ine ĩnare vaja yiroti ñaroja, Diore yir̄uc̄b̄oriavi coder̄are. Titiire ãmic̄ari, ĩnare ĩsima —Pedrore ĩre yicami Jes̄ús.

18

“¿Ñim̄j̄ua ñaḡti ñamasuḡ ñaroc̄u?”, *Jes̄úre ĩna yisēnīare queti*

(Mr 9.33-37; Lc 9.46-48)

¹Tir̄am̄ne Jes̄úre ĩre sēnīacaj̄u ȳua ĩ buerimasa:

—Mure yua rotibosarirodo ti ejaro, ¿ñimujua ñagūti ñamasugū ñarocu? —İre yiseniñacaju yua.

² To yua yirone, sīgū daquegure jicōari, yua rījorojua İre rügōroticami Jesús. ³ To yicōari, ado bajiro yuare yicami:

—Riojo mure gotiaja yu. Daquerã, “Ñamasurã me ñaja yua” İna yitōiarore bajiro mua tōiabetijama, Uju Dios yarã quēnaro İ yirã me ñaruarãja mua. ⁴ Uju Dios yarã ñamasurã ñaama āni daquegure bajiro tōiarã, “Ñamasurã me ñaja yua” yirã. ⁵ Āni daquegure bajiro tōiarã İna ñajare, gājerã tu İna ejaro, quēnaro İnare yirãma, yujare quēnaro yirãre bajiro yirã yirãma —yuare yicami Jesús.

“Mua suorine gājerã rojose İna yijama, güiose ñaja”, Jesús İ yigotimasiore queti

(Mr 9.42; Lc 17.1-2)

⁶ Quēna ado bajiro yuare goticami Jesús:

—No bojarã, āni daquegure bajiro tōiarãre, yure ajitirūnarãre rojose İna ūmato yijama, buto rojose tāmhoruarãma. Rojose İnare İna ūmato yiroto rījoro, tocārãcurene İna āmuarijure gūta jairica siatucōari, riaga ūcuroju İnare rearoderuucōajama, rojose tāmubetibusaborãma. ⁷ Rojose yirã suorine buto rojose tāmhoruarãma masa. Rojose yirã jājarã ñarãma. To bajiri gājerãre rojose ūmato yiruarãma. To İna yise suori buto rojose masu tāmucōaruarãma.

“Buto mua maise ti ñabojaquēne, ti suorine Dios İ bojabeti mua yijama, tire reacōaña”, Jesús İ yire queti

(Mr 9.43-48)

8 “Yũ ãmo sũorine rojose yibũ yũ” mũa yitũoĩamasijama, jatarocaya. “Yũ gũbo sũorine rojose yibũ yũ” mũa yitũoĩamasijama, jatarocaya. Mũare cojo ãmo, cojo gũbo ti manijama, quẽnabetoja. To bajiboarine jũãmo rãca, jũa gũbo rãca mũa bajireajama, jeame yatibetimejũ mũa vajama, rẽtobũsaro quẽnabetirũaroja. 9 “Yũ cajea sũorine ĩabojacõari, rojose yibũ yũ” mũa yitũoĩamasijama tiare ãmirocacõañã. Coja cajea mũare ti manijama, quẽnabetoja. To bajiboarine, jũajũne caje cõtıcõari, mũa bajireajama, jeame yatibetimejũ mũa vajama, rẽtobũsaro quẽnabetirũaroja —yũare yicami Jesús.

*“Oveja yayir'ire ĩnare coderimasũ ĩre macagũmi”,
Jesús ĩ yigotimasiore queti
(Lc 15.3-7)*

10 Quẽna ado bajiro yũare goticami Jesús:

—Yũre ajitirũnũrãre, “Ñamasurã me ñaja yũa” yitũoĩarãre, “Vaja mana ñaama”, ĩnare yĩĩatebeja. Õ vecajũ ángel mesa ñarũarãma ĩnare ĩatirũnũrã. Yũ jacũ tũjũre cojorũmũ ruyabeto ĩnare ñagõbosarũgũrãma. 11 Yayirãre bajiro bajirãre, rojose tãmũoboronare, ĩnare yirẽtobosagũ vadicajũ yũ, Dios ĩ roticõacacũ —yũare yicami Jesús.

12 To bajiro yicõari, ado bajiro yirũtuacami Jesús:

—Adi quetiaca mũare yũ gotimasiosere quẽnaro ajitũoĩañã mũa. Sĩgũ ñagũmi cien oveja cũogũ. Cojorũmũ sĩgũ yayicoacũmi. To bajiri ĩnare coderimasũ, ruyarãre, noventa y nueve ñarãre ta vesejũ ĩnare cũcõari, yayir'ire macagũ vacoacũmi ĩ. 13 Gãjerã yayimena noventa y nueve ñarirãcũre, “Yayibesuma” yivariquẽnagũ ñaboarine, yayir'ire

bujacõari, ñnare ñ variquẽnaro rẽtobusaro ñre variquẽnagũmi. ¹⁴ Mani jacũ õ vecagũ to bajirone bajigũmi ñ quẽne. Sĩgũ ruayabeto daquegũre bajiro tũoĩagũ, Dios tũ ñ ñabetirotire bojabecũmi Dios — yũare yicami Jesús.

*“Mũare bajiro yũre ajitirũnũgũ ñaboarine, rojose tũare ñ yijama, ado bajiro ñre ñagõquẽnoma”, Jesús ñ yigotimasiore
(Lc 17.3)*

¹⁵ Quẽna ado bajiro yũare gotimasiocami Jesús:

—Yũre ajitirũnũgũ ñaboarine, rojose tũare ñ yijama, gãjerãre gotimenane, ñ tũ vacõari, ñagõquẽnoma, “Riõjo yaja mũ. Mũre rojose yibũ yũ’ yato ñ” yirã. “Riõjo yaja mũ” ñ yijama, ñagõquẽnorũarãja mũa. To bajiri ñ rãca quẽnaro baba cutirũarãja mũa quẽna. ¹⁶ “Bajibeaja” ñ yicũdijama, gãjerã jũarã, yũre ajitirũnũrã, “Rojose yibũ mũ” ñre yimasirãre ñnare jicõari, ñ tũ vaja mũa. Jũarã ñna manijama, sĩgũ yũre ajitirũnũgũre, “Rojose yibũ mũ” ñre yimasigũre jicõari, ñ tũ vaja mũa. ¹⁷ Ñnare quẽne ñ ajibetijama, yũre ajitirũnũcõari mũa rãca rẽjarã jediro ñna ñaro rĩjorojũa ñnare gotiba mũa. Ñna jediro “Rojose yiyuja mũ” ñre ñna yisere ñ ajibetijama, Diore ajibecũre, to yicõari, mũjũre gãjõa sẽnibosarimasare ñnare mũa cãmotadiriarore bajiro ñre cãmotadirũarãja mũa — yũare yicami Jesús.

¹⁸ Quẽna ado bajiro yũare yicami Jesús:

—Riõjo tũare gotiaja yũ. Adi macarũcũrojũ yũre rotibosarã ñarũarãja mũa. To bajiro yirã ñari, “Ado bajiro mũa yijama, Dios yarã ñarũarãja mũa.

Ado bajiroj_{ma} m_{ua} yijama, Dios yarã me ñaruarãja m_{ua}”, yimasiruarãja —y_{ua}re yicami Jesús.

¹⁹ Quëna ado bajiro y_{ua}re yicami Jesús:

—Gajeye ado bajiro m_{ua}re gotiaja y_u: Sīgũ ĩ t_{uo}ĩarore bajirone m_{ua} t_{uo}ĩajedicõajama, m_{ua} bojasere ĩsiruc_umi y_u jac_u õ vecag_u. ²⁰ No bojarij_u juarã, idiarã, y_ure ajitirũnarã ñari, Diore ĩna sēnijama, ĩna rãca ñaruc_uja y_u —y_{ua}re yicami Jesús.

²¹ To ĩ yiro bero, ado bajiro Jesúre sēniĩacami Pedro:

—Y_uuj_u, sīgũ m_ure ajitirũnugũ ñaboarine, y_ure rojose ĩ yijama, ¿nocãrãcaji masu ĩre masirioğuti y_u? ¿Cojomo cõro gaje ãmo juã jēnituario ñarirãcagine ĩre y_u masiriojama, quënarojari? —Jesúre ĩre yicami.

²² To ĩ yisere ajicõari, ado bajiro ĩre c_udicami Jesús:

—Tocãrãcagine rojose m_ure ĩ yiro cõrone masirioroti ñaja m_ure —ĩre yicami Jesús.

“Manire rojose ĩna yisere mani masiriobeti-jama, Dios quëne, ĩ bojabeti mani yisere masiriobeti-_uc_umi”, Jesús ĩ yigotimasiore

²³ To yicõari, ado bajiro ĩ buerãre y_{ua}re gotimasiocami Jesús:

—Buto rojose m_{ua} yiro bero, s_utiriticõari, “Y_{ua}re masirioya” Diore m_{ua} yijama, m_{ua}re masirioruc_umi. To bajiro m_{ua}re ĩ yise ñajare, “Gãjerã rojose m_{ua}re ĩna yiboajaquëne, m_{ua}re masirioroti ñaja” yig_u, ado bajise gotimasiore queti m_{ua}re gotiaja y_u: Uj_u, ĩre vaja morãre gotir_u, ĩre moabosarimasare jicõagũmi. ²⁴ ĩre vaja morãre “Adocãrãc_u ñaama” ĩ yig_uadij_une, sīgũ jairo ĩre vaja mogũre ĩre ãmiejarãma ĩna. ²⁵ ĩre ĩna

ãmiejarirĩmarore, ñie rãca vaja yimasibecumi. To bajiro ï bajijare, ïre ãmiejarãre ado bajiro ïnare rotigumi: “Ãnire, ï manajo, ï rĩare quẽne gãjerãre yure ïsibosaya, ‘Gãjerãre moabosarimasa ñato’ yirã. To yicõari, ï gajeyeũni jedirore gãjerãre ïsicõari, vaja sãnima. To yicõari, ti vaja mũa bũjasere yure ïsima. To bajiro mũa yijama, yure ï vaja mose jedicoarũaroja”, ïnare yigotigumi mũ. ²⁶ To ï yisere ajicõari, ï rĩjorojũa gũsomuniari tuetuejagumi ïre vaja mogũ. To yicõari, rũcũbũose rãca ïre sãnigumi: “ïYũ mũ, yuya maji! Mũre yũ vaja mosere vaja yijeocõarũcũja maji”, ïre yigumi. ²⁷ To ï yisere ajicõari, ïre ïamaigũ ñari, “Tone bajicõato”, ïre yicõa tũjacumi, ï mũ.

²⁸ To bajiro ï mũ ï yisere ajicõari, budicoacumi. Budiacũne, ï baba mojoroaca ïre vaja mogũre ïre ïabũjagumi ï quẽne. ïre ïabũjacõari, ï ãmũare ñiamatagumi. To yicõari, ado bajiro ïre yigumi: “ïYũre mũ vaja mosere vaja yijeocõañã mũ!”, ïre yigumi. ²⁹ To ï yiboajaquẽne, gũsomuniari tuetucõari, ado bajise ïre yigumi: “ïYuya maji! Mũre yũ vaja mosere vaja yijeocõarũcũja yũ”, yiboagumi. ³⁰ To ï yiboajaquẽne, ajibecumi ï. To bajiri tubiberiavijũ ïre ãmiacõari, ïre cũrotigumi, “Yũre mũ vaja mosere vaja yijeocõarijũ, budirũcũja mũ” yigũ. ³¹ ï babarã, to bajiro ï yisere ïacõari, bũto sũtiritirãma ïna. To bajiri ïna mũ tũ vacõari, ïna ïariaro cõro gotirãma. ³² To bajiro ïna yisere ajicõari, ïre vaja moboar'i ï masirior'ire jirotigumi mũ. ï ejaro ïacõari, ado bajiro ïre yigumi: “Yũre moabosarimasũ rojogũ masu ñacõaja mũ. Yũre mũ vaja mosere, ‘Tone bajicõato’ mũre yiboabũ

yū, rācubuoose rāca yūre mū sēnijare. ³³ Mure yū ĩamairore bajirone mū babare ĩamairoti ñaboayuja”, ĩre yigūmi ĩ ɱjū. ³⁴ To bajiro ĩre yicōari, buto jūnisinigū ñari, ĩre tubiberotigūmi ĩ quēne, “Yūre mū vaja mosere vaja yijeocōarijū, budirucūja mū” yigū —yūare yigoticami Jesús.

³⁵ To bajise gotigajanocōari, ado bajise yūare gotitusacami Jesús:

—To bajirone yirucūmi yū jacū ò vecagū quēne, gājerā rojose ĩna yisere mūa masiriobetijama —yūare yicami Jesús.

19

“Mūa manajoare reabetiroti ñaja”, Jesús ĩ yire queti

(Mr 10.1-12; Lc 16.18)

¹ To bajiro ĩgotimasioro bero, Galilea sita ñariarā vacōari, Judea sitajū ejacajū yūa. Jordán vāme cutirisa gajejacatūajū ñacajū ti sita. ² Tojū jājarā masa Jesúre sūyacama. Rijaye cutirāre ĩnare catio-cami ĩ.

³ Tojū yūa ñaro sīgūri fariseo masa ejacama, Jesúre sēniātorā. Ado bajiro ĩre sēniātocama ĩna:

—¿No bojase sūorine, manajo rocajama, quēnacōati? —ĩre yisēniātocama ĩna.

⁴ To ĩna yisere ajicōari, ado bajiro ĩnare cudicami Jesús:

—¿Dios oca masa ĩna ucamasire ado bajiro yisere ĩabeticatique mūa? “Rēmojū ũmure, rōmiore rujeomasifūju Dios”, yigotiaja Dios oca. ⁵ To yicōari gajejū ado bajiro gotiaja Dios oca: “Ūmū, rōmio ĩ rujeore ti ñajare, ũmūjūa, manajo cutigu, ĩ jacūare ĩnare cāmotadicoarucūmi. Manajo cutijama, juarā

ñaboarine, sīgũ rujure bajirone ñaruarãma”, yigoti-aja Dios oca. ⁶ “To bajiruarãma” Dios ï yimasire ti ñajare, m̃a manajoare reabetiroti ñaja —Inare yicami Jesús, fariseo masare.

⁷ To ï yisere ajicõari, ado bajiro tudisēniñatocama ñna:

—Riojo m̃a gotiboajaquēne, ¿no yigũ ricati rotimasiñujari Moisés ñamasir'i? Ado bajiro rotimasiñumi ï: “No bojagũ ï manajore ï rocaruajama, ‘M̃ure rocagũ yaja’ yise papera ucacõari, sore ïsiroti ñaja”, yimasiñumi Moisés —Jesúre ïre yicama.

⁸ To bajiro ñna yisere ajicõari, ado bajiro cudicami Jesús:

—Diore ajiterã ñna ñajare, “B̃utobusa rojose ñna manajoare yiroma” yigũ, manajoa reare beobeti-masiñuju Moisés ñamasir'i. Rēmojuma to bajiro me bajimasiñuju. ⁹ Riojo ado bajiro m̃are gotiaja yũ: ï manajo gãji rãca so ajeri cutibetiboajaquēne, sore rocacõari, gajeo ï manajo cutijama, Diojũa ï ïajama, ï manajo me ñagõmo. ï ajerio cutigo ñagõmo —Inare yicami Jesús.

¹⁰ To ï yisere ajicõari, ï buerimasajũa ado bajiro ïre yicajũ yũa:

—To yijama, manajo magũne ñacõaroti ñañuja — ïre yicajũ yũa.

¹¹ To bajiro yũa yisere ajicõari, ado bajiro yũare yicami Jesús:

—Jediro me ñarãma, manajo cutibetiboarine, Dios ï bojarore bajiro yimasirã. To bajiro yirãma, Dios ï ejarēmose rãca yirãma. ¹² Sīgũri manajo cutimena ñarãma. Rõmia rãca ñna yiroti ti manijare, bajirãma. To bajirãne ruyuararã ñari, bajirãma.

Gãjerãma, “Rĩa yimasibeticõato” yirã, ñna yijeriarã ñari, bajirãma. Gãjerãma, manajo bojamenama, “Y_u manajo catibetijama, y_u u_{ju}, Dios ï bojarore bajiro quẽnabusaro yimasirucija y_u” yituoïarã ñari, bajirãma. To bajiro bajirua tũoïarãma, to bajirone bajiato —y_uare yicami Jesús.

*“Rĩamasare Jesús ï ñubuejeore queti
(Mr 10.13-16; Lc 18.15-17)*

¹³ Jesús t_uju rĩamasacare juajacama masa, ï ãmori ñujeocõari, Diore ñnare sãnibosato ï” yirã. Ñna juajesere ñacõari, ado bajiro ñnare yicaj_u y_u, ï buerimasa:

—juavadibesa! Gõjanabioro yaja m_ua —ñnare yicaj_u y_u.

¹⁴ To bajiro y_ua yiboajaquẽne, Jesújuama, ado bajiro yicami:

—Rĩamasare ñnare matabesa. Ñnare bajiro tũoïarã ñarãma U_{ju} Dios yarã quẽnaro ï yirã —y_uare yicami Jesús.

¹⁵ To yicõari, rĩamasare ï ãmori ñujeocõari, Diore ñnare sãnibosacami Jesús. To yicõari bero, y_uare ùmato vacoacami Jesús.

*Gajeyeũni jaig_u Jesúre ï sãnĩare queti
(Mr 10.17-31; Lc 18.18-30)*

¹⁶ Gajeyeũni jaig_u, Jesúre sãnĩagũ ejacami:

—Gotimasiorimas_u, y_u rijato beroju “Tudirijabeticõato” yig_u, Dios ï catisere y_ure ï ñisere y_u bojajama, ¿no bajise quẽnase yiroti ñati y_ure? — Jesúre ñre yicami.

¹⁷ To ï yisere ajicõari, ado bajiro ñre cãdicami Jesús:

—¿No yigũ quẽnaseyere yũre sẽnĩfati mũ? Dios sĩgũne ñaami quẽnagũma. To bajiri Dios oca masa ñna ucamasirere ñaroti ñaja. Mũ rijato berojũ “Tudirijabeticõato” yigũ, Dios ñ catisere mũ bũjarũajama, Dios ñ rotimasirere cũdiroti ñaja —Ñre yicami Jesús.

¹⁸ To ñ yijare,

—¿Disere yati mũ, “Dios ñ rotimasirere cũdiroti ñaja” mũ yijama? —Jesũre ñre yicami.

To ñ yirone, ado bajiro ñre yicami Jesús:

—Dios ñ rotimasire yũ yijama, ado bajise rotimasirere yaja yũ: “Sĩabesa. Gãji manajo rãca ajerio cõtibesa. Juarudibesa. Socũne, ‘Rojose yimi’ yigotiyirobesa. ¹⁹ Mũ jacũre, mũ jacore quẽne quẽnaro ñnare rũcũbũoya. To yicõari, mũ masu rujare mũ maiore bajirone mũ tũanare maiña”, yigotiaja Dios ñ rotimasire —Ñre yicami Jesús.

²⁰ To ñ yirone, ado bajiro ñre yicũdicami:

—Daquegũjũne tire cũdisũoadicajũ yũ. ¿Ñie gajeye rũyati quẽnaro yũ yiroti? —Jesũre ñre yicami.

²¹ To ñ yisere ajicõari, ado bajiro ñre goticami Jesús:

—Cojo vãme rũyaja, mũ yiroti, mũ rijato berojũ “Tudirijabeticõato” yigũ, Dios ñ catisere mũ bũjarũajama: Jediro mũ cũosere gãjerãre ñsijeocõaña. To yicõari, ti vaja bũjacõari, maioro bajirãre ñsima. To bajiro mũ yijama, õ vecajũ Dios ñ ñarojũ quẽnase bũjarũcũja mũ. To bajiro yigajanocõari, yũre ajisũyaya —Ñre yicami Jesús.

²² To bajiro ñ yisere ajicõari, bũto sũtiriti vacocami ñ, gajeyeũni jaigũ ñari, tire maigũ.

²³ To bajiro ĩ bajivato ĩacõari, ĩ buerimasare ado bajiro yuare yicami Jesús:

—Riojo mure gotiaja yu. Gajeyeũni jairãrema, yure ĩna suyarua tuoĭaboajama, buto josaruaroja ĩnare. To bajicõari, yirẽto ecobosabetiruarãma. ²⁴ Quẽna tire bajise mure tudigotiaja yu: Vaibucu, camello vãme cutigu, gãjojota gojeacare sãjarẽtobudimasibecumi. To bajirone bajiaja gajeyeũni jairãre quẽne, yure ajitirãna suyaruaboarãre. To bajiro bajirã ñari, yirẽto ecobosabetiruarãma —yuare yicami Jesús.

²⁵ To ĩ yisere ajicõari, no yimasibeticaju yua, ti ũnre ajibetirũgũriarã ñari. To bajiri ado bajiro ĩre sẽnĩacaju yua:

—Riojo mu gotijama, ¿no bajiro bajirãju Dios tãjure ejaruarãda? —ĩre yicaju yua.

²⁶ To yua yirone, yuare ĩacõari, ado bajiro yicami Jesújumama:

—ĩna masune ejamasimenama masa, Dios tãjure. Diojumama, ñajediro yimasijeocõami. Ñiejua josase maja, ĩrema. ĩ suorine ĩ tãju ejamasire ñaja —yuare yicami Jesús.

²⁷ To ĩ yisere ajicõari, ado bajiro yicami Pedro:

—Jediro yua gajeyeũnre cõcõari, mure suyacaju yua. ¿To bajiro yua bajicati vaja, ñie bujarãti yua? —Jesúre ĩre yicami.

²⁸ To ĩ yisere ajicõari, ado bajiro yuare cudicami Jesús:

—Riojo mure gotiaja yu. Cojorãmu adi macarucuro ti jediro quẽna tudiquẽnorucumi Dios. To bajiro ĩ yirirãmu yu, Dios ĩ roticõacacu, rãcãbuorãju rujirãcãja yu, rotiguagu. To cõrone

mua quēne yure sɣyarã, juaãmo cõro, cojo gubo jua jēnituaro ñaricũmurorire rujiruarãja mua. To yicõari, mani yarã, jud'io masa, juaãmo cõro, cojo gubo jua jēnituairãcɣ ñarã masatubuarire rotiruarãja mua. Yure ajitirũnrãre, to yicõari, yure ajitirũnmenare ñabesemasiruarãja. ²⁹ No bojarã, yure ajitirũnrã ñari, ña ya vi, ña yarã, ña jacua, ña rãa, to yicõari, ña ya veserire quēne ña maise ñaro cõro ña vaveojama, adigodoju ña cɣosɣore rētoɣusaro quēnase bujaruarãma ña, Dios tɣju. ³⁰ To bajiboarine adire quēne quēnaro tɣoãña mua: Jãjarã ado bajiro mua tɣoãrore bajirone tɣoãboarãma: “Dios ñ bojase yirã rētoro Dios ñ bojasere yirã ñari, ñamasurã ñaja yua. To bajiri, õ vecajure quēne ñamasurã ñari, quēnase bujaruarãja”, yitɣoãboarãma. To bajiro yirã ñari, gãjerãre ñacõari, “Ña ya vi, ña yarã, ña jacua, ña rãa, to yicõari ña ya veserire vaveomena ñari, ñamasurã me ñaama. To bajiri, õ vecajure quēnase mojoroaca bujarona ñaama”, yitɣoãboarãma. To bajiro me bajiruaroja. Adoju ñamasurã, õ vecajurema ñamasumena ñaruarãma ña. Adi macarɣcɣroju ñamasumenama, õ vecajurema ñamasurã ñaruarãma —yure yicami Jesús.

20

Moabosarimasa ña bajire rãca tɣoãcõari, “Adi macarɣcɣrojure ñamasurã, õ vecajurema ñamasurã me ñaruarãma ña”, Jesús ñ yigotimasiore queti

¹ To yicõari, ñ buerimasare yure gotimasiorũtuacami Jesús. “ ‘Adoju ñamasurã ñaja yua. To bajiri õ vecaju quēne ñamasurã ñari, quēnemasuse

bujaruarãja' yituoĩabeticõato" yigũ, ado bajise yuare gotimasiocami:

—Uye vese cuogu, uye ti bucuaro ĩacõari, busurijũ jẽju ĩre moabosaronare jigũ vacumi. To bajirone yirũcumi Dios, mũa uju quẽne. ² ĩnare bujacõari, ado bajiro ĩnare gotigumi: "Mũa moase vaja mũa sẽniro cõrone mũare vaja yirũcũja yũ", ĩnare yigumi. To yicõari, ĩnare moaroticõagũmi, ĩ ya veseju. ³ Muiju ĩ asitutuajedirijũ cõro, moaruarã ĩna yuritũcuroju ĩna ñacõajare, gãjerãre ĩnare ĩabujagumi. ⁴ "Vasa, mũa quẽne. Yũ uye veseju moaaya. Mũa moajama, quẽnaro mũare vaja yirũcũja yũ", ĩnare yigumi. ⁵ To bajiri ĩna quẽne ĩre moabosarã vacoanama. To yicõari, bero ãmũrecaji ñaro vacũ, gãjerãre bujagumi. Ñamicajũa ti tũsato vacũ, gãjerãre bujagumi quẽna. Moare manare bujacõari, ĩnare moaroticõagũmi. ⁶ Yucũ veca muiju tũsato, gãjerã moaruarã ĩna yuritũcuroju ejacõari, moamenane ĩna ñacõajare, "¿No yirã moamenane ñarũmũ cãtiati mũa?", ĩnare yigumi. ⁷ To ĩ yirone, "Ñimũjũa, yuare moarotibeami. To bajiri ñacõaja yũa", ĩre yirãma ĩna. To bajiro ĩna yijare, "Vasa mũa quẽne. Yũ uye veseju yũre moabosaaya", ĩnare yigumi.

⁸ Rãiorijũ, ĩre moabosarimasare coderimasũre ĩre jigumi. "Yuare moabosarimasare ĩnare jiaya mũa", ĩre yigumi. "To yicõari, ejatũsariarãre vaja yisũoya. ĩnare vaja yigajanocõari, ĩna rĩjorobusa ejariarãre vaja yiya. To bajiro rĩne yicõa vasa. To bajiri, moarã ejasũoriarãre ĩnare vaja yitũsaya", ĩre yigumi, ĩre moabosarimasare coderimasũre. ⁹ To bajiro ĩ yijare, ejatũsariarãjũa ejasũorãma. ĩna ejaro ĩacõari, cojorũmũ vaja tariaro cõro

Īna moare vaja ĩnare vaja yigumi. ¹⁰ To cōro ĩna vaja tasere ĩacōari, “Manima jaibusaro bujaruarāja”, yituoĭaboarāma ejasuararājma. To bajiro yituoĭaboariarāre gājerā ĩna vaja taro cōrone ĩnare vaja yigumi. ¹¹ Ujma ĩ vaja yirotisere ĩacōari, ñagōjairāma ejasuararājma: ¹² “Vesejma ejatusariarā, yoaro meaca ĩna moaboajaquēne, yuare ma ĩsiro cōrone ĩnare ĩsiaja ma. Yuma, cojorūma jediro, muiju ĩ asicōaro josari moaboabuma”, ĩre yitud'irāma, ĩna ujure. ¹³ To bajiro ĩna yiboajaquēne, sīgure ado bajiro cudigumi ĩna ujma: “Rojose mare yibejma yma. Jējma, ‘Ma vaja sēniro cōrone mare vaja yiguma’ yigma ñari, to cōrone mare vaja yibma. ¹⁴ Ma moare vaja juacōari, vasa. Mare yma vaja yiro cōrone, ‘Ejatusariarāre quēne vaja yiguma’ yituoĭama yma. ¹⁵⁻¹⁶ Yma ye gājoa ñamti. To bajiri yma bojarore bajirone yibma yma. ĩnare quēnaro yma vaja yisere ĩajūnisiniaja ma”, ĩre yigumi ĩ ujma. To bajiri adi queti mare yma gotirote bajiro bajirumaroja. Adojma ñamasurā, ō vecajumarema ñamasumena ñaruarāma ĩna. Adi macarumarojma ñamasumenama, ō vecajumarema ñamasurā ñaruarāma —yuare yicami Jesús.

*“Yure sĭaruarāma”, Jesús ĩ yigotitusare queti
(Mr 10.32-34; Lc 18.31-34)*

¹⁷ Jerusalénjma yuare ūmato varūtu vacune, juaāmo cōro, gubo jma jēnitarirācma ñarāre yuare gotirma, ricati yuare jicāmotocami Jesús:

¹⁸ —Quēnaro ajiya ma. Jerusalénjma vana bajiaja mani. Tojma mani ejaro, yure Dios ĩ roticōacacure paia ujarāre, Dios ĩ rotimasire gotimasiorimasare ĩsirocarumti sīgū. ĩnajma, “ĩre sĭaroti ñaja”, yure

yiruarāma. ¹⁹ To yicōari, romano masare yure ĩsiruarāma. To ĩna yijare, yure ajatud'icōari, bajeruarāma ĩna. To yicōari, yucūtērojū yure jajuturuarāma. Yure jajutucōari, yū rijato bero, yure yujeboaruarāma. To ĩna yiboajaquēne, yure ĩna sĩaro bero, idiarūmū tūsatirūmane yure catiocōarūcūmi Dios —yūare yicami Jesús.

Santiago mesa jaco Jesúre so sēnire queti

(Mr 10.35-45)

²⁰ To ĩ yiro bero, Zebedeo rĩa jaco, so rĩa rāca ejacamo, so rĩa ĩna bajirotire Jesúre sēnigō ejago. Adocārācū ĩnacama so rĩa: Santiago, Juan ĩnacama ĩna. Jesúre rācūbūogo, ĩ rĩjorojūa gūsomuniari tuetucamo so. To yicōari, Jesús quēnaro so rĩare ĩ yirotire sēnicamo. ²¹ So sēnisere ajicōari,

—¿No bajiro quēnaro yū yirotire bojati mū? —
sore yicami Jesús.

To ĩ yijare, ado bajiro cūdicamo so:

—“Ñajediro cūjū ĩaja yū” yĩocōari, mū rotisūorirodo ti ejaro, yū rĩare ado bajiro ĩnare mū ũmato rujirotire bojaja yū: Sĩgū mū riojojacatūa, gājire mū gācojacatūa ĩnare ũmato rujirūcūja mū, “Mū rotirore bajirone ĩna quēne rotimasiato” yigū —ĩre yicamo so.

²² To so yisere ajicōari, so rĩajūare ado bajiro yicami Jesús:

—Tūoĩamasimenane yure sēniboaja mūa. Yū rāca mūa rotirūajama, ¿mūa quēne yure bajirone rojose tāmūorātique mūa? —ĩnare yicami Jesús.

—Bajicōarāja —ĩre yicama ĩna.

²³ To ĩna yisere ajicōari, ado bajiro yicami Jesús:

—Riojo m̄are gotiaja ȳ. M̄a quēne, ȳ t̄am̄orotire bajiro rojose t̄am̄or̄ar̄aja. To bajiboajaquēne, ȳ riojojacat̄a, ȳ ḡāsojacat̄a m̄are rojomasibec̄aja ȳ. “Īna ñar̄ar̄ama ȳ mac̄a t̄a rujirona” ȳ jac̄a ĩ yicana r̄ine rujir̄ar̄ama —Īnare yicami Jesús.

²⁴ Jesús buerimasa j̄aãmo c̄ro ñar̄a, ȳa aji-betone, “To bajiro bojaja ȳa” ĩna yirudisere ajic̄ari, j̄ūnisinicāj̄a ȳa. h ²⁵ To bajiro ȳa bajijare, ȳa jedirore jir̄eoc̄ari, ado bajiro yicami Jesús:

—Ījar̄a, Dios yar̄a me ñar̄a, ĩna yar̄are buto tu-tuaro rotir̄ama ĩna. Tire masiaja m̄a —ȳare yicami. ²⁶ —M̄ama, ȳ yar̄a ñari, ĩnare bajiro bajibetir̄ar̄aja. Ȳre ajitir̄an̄r̄a, ñamasur̄a ñar̄ar̄ama, ḡajer̄a ĩna bojasere masic̄ari, quēnaro ĩnare yie-jar̄emor̄a. ²⁷ To bajiri ñamasur̄a m̄a ñar̄ajama, ḡajer̄are moabosar̄ar̄aja m̄a. ²⁸ Dios ĩ rotic̄acac̄a quēne, to bajirone bajiaja ȳ. “Ḡajer̄a ȳ bojasere masic̄ari, quēnaro ȳre yato ĩna” yiḡa me vadicaj̄a ȳ. “Īna bojasej̄are masic̄ari, quēnaro ĩnare yir̄uc̄aja” yiḡa vadicāj̄a ȳ. To yic̄ari, j̄ajar̄a rojose ĩna yisere Dios ĩ masiriose vaja, ĩnare vaja yibosaḡaḡa vadicāj̄a ȳ —ȳare yicami Jesús.

J̄ar̄a caje ĩamenare Jesús ĩ ĩarotire queti

(Mr 10.46-52; Lc 18.35-43)

²⁹ Jericó v̄ame cuti maca ñac̄ari, ȳa vatone, j̄ajar̄a masa ȳare s̄yacama, Jesúre ĩar̄a. ³⁰ Toj̄a

h **20:24** Zebedeo manajo, Juan, Santiago jaco, Jesús b̄am̄o ñañuju so. To bajiri, “Ī yar̄a ñaama” yit̄oĭaḡo ñari, “Ȳ r̄iare quēnaro yir̄uc̄ami”, yit̄oĭaboayuju so. Tire ajimasic̄ari, j̄ūnisiniñujar̄a Jesús buer̄a j̄aãmoc̄ar̄ac̄a ñar̄aj̄a, “Ī yar̄a ñajare, ejar̄emoḡūmi” yit̄oĭar̄a ñari.

yua vatone, juarã ãmena rujicama, maa tu. Jesús ã rētosere ajicōari, ado bajiro ãre jiavasãcama ãna:

—Yua ujũ, Ujũ David ñamasir'i jãnami, “Rotim̃orũgõrũcũmi” yigũ, Dios ã cõar'i ñaja mũ. Yua ãmaĩña mũ —yiavasãcama ãna. ³¹ To bajiro ãna yiavasãrone,

—¿Avasãbesa! —ãnare yicama masa. To bajiro ãna yiboajaquẽne, b̃atob̃usa avasãcama ãna:

—Yua ujũ, Ujũ David ñamasir'i jãnami, “Rotim̃orũgõrũcũmi” yigũ, Dios ã cõar'i ñaja mũ. Yua ãmaĩña —Jesũre ãre yiavasãcama ãna.

³² To ãna yisere ajicōari, tujarũgũcami Jesús. To bajicōari, ãamenare jicami:

—¿No bajiro mũare yũ yisere bojati mũa? —ãnare yisẽniãcami, caje ãamenare.

To ã yijare, ado bajiro ãre yicadicama:

³³ —Yua ujũ, tudĩĩarũaja yua —ãre yicama ãna.

³⁴ To ãna yisere ajicōari, ãnare ãmaigũ ñari, ãna cajeare moãcami. To bajiro ã yirirĩmarone, ãmena ñaboacana, ãacoacama ãna yuja. ãcōari, ãna quẽne Jesúsre sayacoadicama.

21

“*‘Rotim̃orũgõrũcũmi’ yigũ, Dios ã cõagũ ñaja yũ*”
yĩogã, *Jerusalénjũ Jesús ã ejare queti*
(*Mr 11.1-11; Lc 19.28-40; Jn 12.12-19*)

¹⁻² Jerusalén cõñana, Betfagẽ vãme cãti maca eja-cajũ yua. Olivo vãme cãti buro jũdo ñacajũ ti maca. Tojũ juarã yua rãcanare ã buerãre ado bajiro ãnare roticōacami Jesús:

—Mani varoto riojo ñarimacare vasa maji. Tojũ ejacōari, burra ãna siaturũgõriore b̃jarũarãja mũa,

so macu rãca ñagõre. Ñinare õjacõari, yure juadi-bosaba. ³ Ti macagu mua õjaro ñacõari, mware ñ sēññajama, “Mani ujū ñinare bojami. No cõro mene tucõarucumi quēna”, ñre yicudiba. To bajiro mua yisere ajicõari, sēññarēmobetirucumi. “Ba. Vasa”, mware yirucumi —ñinare yicami Jesús.

⁴ To bajiro ñinare yiroticami Jesús, Diore gotirētobosarimasu, “Ado bajiro bajiruroja” ñ yuicamasire ñajare:

⁵ “Jerusalén macanare ado bajiro yiruarãja mua: Ñaña mua. Mua ujū vadiami. “Ñamasugū me ñaja yu” yitucõagūre bajiro ejaami. Burra, gajeyeñi umagõ macu joejū jesacõari, vadiami’ yiruarãja mua”, yuicamasifñuju Diore gotirētobosarimasu.

⁶ To bajiri Jesús ñ rotisere ajicõari, ñ rotirore bajirone yiyuma ñna. ⁷ Burra to yicõari, so macure quēne ñinare juajacama ñna. To yicõari, ñna ye sudi joeayere vejecõari ñna joere jeocama ñna. To ñna yiro bero, macujure vajejacami Jesús. ⁸ Jãjarã masa ñacama. Ñna ye sudi joeayere vejecõari, ñ varotijure cū rñjoro cuticama. “Yua ujū ñaja mu” yirã, to bajiro yicama, Jesúre rucuburã. Gãjerã yucá rujuri jasurecõari, maare cū rñjoro cuticama. ⁹ To yicõari, “ “Rotimurugõrucumi” yigu, Dios ñ cõagū ñaja yu’ yicõari, rotimurucumi yuja” Jesúre ñre yitucõarã ñari, buto variquēnacama ñna. Ñre rñjoro cuti vana, ñre suyarã quēne, ñre ñavariquēnarã ado bajiro avasã vacama ñna:

—¡Ujū David ñamasir'i jãnami, “Rotimurugõrucumi” yigu, Dios ñ cõar'i ñaami! ¡Quēnase ñre yivariquēnato mani! ¡Diore rotibosagu

quēnaro ï yigũ ñaami! ¡Diore quēne, quēnase ïre yivariquēnato mani, ñni yua ɯjare ï cõajare! — yivasã vacama ñna.

¹⁰ To bajiro Jesús, Jerusalénjũ, masa rãca ï ejasere ïacõari, bato gãmerã ñagõcama ti macana jediro.

—¿Ñimũ ùgũ ñati? —gãmerã yisēniñacama, masa ñna avasã vado vatoajũ Jesús ï vadire ïacõari.

¹¹ To ñna yijare, gãjerã ado bajiro yicudicama:

—Ñne ñaami Diore gotirētobosarimasũ, Jesús vãme cutigũ, Galilea sita Nazaret vãme cuti macagũ — yicama masa.

Diore yirũcũbũoriavijũ ñacõari, gajeyeũni ïsiriavire bajiro ñna yĩñajare, Jesús ñnare ï tud'ĩãgõbure queti (Mr 11.15-19; Lc 19.45-48; Jn 2.13-22)

¹² Ti macajure ejacõari, Diore yirũcũbũoriavijũ sãjacajũ yua, Jesúrãca. Ti vijũ gajeyeũni ïsirãre, ñnare vaja yirãre quēne tud'ĩãgõbucami Jesús. Gãjerã ye rãca gãjoa vasoarimasa ñna gãjoa jeorijaũre tucaguereacami. To yicõari, buja ïsirimasa ñna rujiri cũmurorire tucaguereacami. ¹³ To yicõari, ado bajiro ñnare goticami Jesús:

—Diore gotirētobosarimasa ñna ucamasire ado bajiro gotiaja: “Yũ ya vima, yure sēnirũcũbũorã rējariavi ñarũaroja”, yigotiaja, adi vire. To bajiro ï yimasire ti ñaboajaquēne, ado bajiro mũa yĩñase sũorine juarudirimasa ya vire bajiro bajiaja ti — ñnare yicami Jesús.

¹⁴ Ti vijũ, yua ñarone, ïamena to yicõari rujasagueri vana, ejacama, Jesús tũjũ. To bajiro ñna bajirone ñnare catiocami. ¹⁵ Ti vire ñacama paia ɯjarã, Dios ï rotimasire gotimasiorimasa quēne. To bajiri Jesús, ïaĩañamani ï

yĩosere ĩacōari, “¡H̄j̄m̄ David ñamasir'i jānami, ‘Rotim̄oꝛḡōꝛc̄m̄i’ yiḡm̄, Dios ĩ cōar'i ñaami! ¡Quēnase ĩre yivariquēnato mani!” rĩamasa ĩna yĭavasā ñasere ajicōari, Jesújuare b̄uto j̄ūnisinicama. ¹⁶ To bajiri ado bajiro Jesúre sēniĩacama:

—¿To bajiro m̄ure ĩna yisere ajiati m̄? “To bajise yibesa”, ĩnare yĭya —ĩre yicama ĩna.

To ĩna yĭboajaquēne, ado bajiro ĩnare goticami Jesús:

—Ajiaja ȳm̄. Dios oca masa ĩna ucamasire to bajirone gotiaja rĩamasa ĩna yĭrotire. ¿ĭabeticatique ado bajiro yisere? Ado bajiro gotiaja ti:

“ ‘Rĩamasa, to yicōari, ũjurāca quēne, m̄ure quēnaro r̄ac̄ub̄oꝛuar̄ama ĩna’ to bajiro m̄ yise ñajare”, yigotiaja Dios oca —ĩnare yicami Jesús.

¹⁷ To ĩ yiro bero, ĩnare vaveocōari, Betania vāme c̄ti macaj̄m̄ ejacōari, c̄nicaj̄m̄ ȳm̄.

*Higuera vāme c̄tiure, “Juaji rica manĭcar̄ar̄aja”, Jesús ĩ yire queti
(Mr 11.12-14, 20-26)*

¹⁸ Quēna busurij̄m̄ Jerusalénj̄m̄ tudiacaj̄m̄ ȳm̄. To ȳm̄ bajiro, Jesús, ñiorijacami. ¹⁹ Maa t̄m̄ higuera vāme c̄tīm̄ ñacaj̄m̄. Tĭ̄m̄ ricare bar̄m̄, ojaboacami Jesús. Rica manĭc̄aj̄m̄, tĭ̄m̄ama. J̄ū r̄ĭne ñacaj̄m̄. To bajiri tĭ̄ure ado bajiro yicami Jesús:

—Juaji rica manĭcar̄ar̄aja —tĭ̄ure yicami.

To bajiro ĩ yĭrir̄marone, s̄ñirocacoacaj̄m̄ tĭ̄m̄. ²⁰ To bajiro tĭ bajisere ĩacōari, no yimasibeticaj̄m̄ ȳm̄, tĭ ũnĭre ĭabetir̄ḡūcana ñari. “¿No yiro guaro s̄ñirocacoajari tĭ?”, yisēniĩacaj̄m̄ ȳm̄.

²¹ To ȳm̄ yĭrone, ado bajiro ȳm̄are c̄dicami ĩ:

—Riojo m̄are gotiaja ȳu. “To bajiro yir̄uc̄ami Dios” ĩre m̄a yiajitr̄un̄ t̄jabetijama, higuera v̄ame cutīare ȳu yise ũni r̄irene yimasimenaja m̄a. Gajeye josase ti ñaboajaqūene, yimasic̄ar̄aja. “I bure, moa riagaj̄u rocaroacoasa” m̄a yijama, to bajirone bajir̄aroja. ²² “Ȳua s̄enijama, ȳare ĩsic̄aḡami” yit̄uoĩac̄ari, Diore m̄a s̄enijama, m̄are ĩsir̄uc̄ami —ȳare yicami Jesús.

*“¿Ñim̄a m̄are ĩ rotise r̄aca to bajiro yati m̄a?”,
Jesúre ĩna yis̄enĩtare queti
(Mr 11.27-33; Lc 20.1-8)*

²³ To ĩ yiro bero, Jerusalénj̄u ejacaj̄u ȳua. To bajic̄ari, Diore yir̄uc̄ub̄oriavij̄u Jesúr̄aca s̄ajacaj̄u ȳua. S̄ajaejac̄ari, masare gotimasiocami Jesús. To ĩ yiñarone, b̄uc̄ar̄a, paia ɱjar̄a qūene, ejacama ĩna, Jesúre s̄enĩar̄a:

—¿Ñim̄a m̄are ĩ rotise r̄aca to bajiro yir̄uḡuati m̄a? —ĩre yis̄enĩacama ĩna.

²⁴⁻²⁵ To bajiro ĩna yisere ajic̄ari,

—Ȳu qūene, ado bajiro m̄are s̄enĩaja ȳu. Ȳure m̄a c̄udic̄aroj̄u, “ĩ rotise r̄aca yaja ȳu”, m̄are yir̄uc̄aja maji. ¿Ñim̄a rotiyujari, Juanre, “Oco r̄aca masare ĩnare bautizaya” yiḡu? ¿Dios rotiyujari? ¿Masaj̄ua rotiyujarique? —ĩnare yis̄enĩacami Jesús.

To ĩ yisere ajic̄ari, ĩna masurione ḡamer̄a ñaḡoñacama ĩna:

—“Dione, Juanre oco r̄aca masare bautizarotiyumi” mani yijama, ado bajiro manire s̄enĩajacaḡumi: “Tire masir̄a ñaboarine, ¿no yir̄a ĩre ajitir̄un̄beticati m̄a?” manire yis̄enĩajacaḡumi. ²⁶ To yic̄ari, “Masane, Juanre oco r̄aca bautizarotir̄ar̄ama” mani yijama, manire

buto tud'iruarāma masa, “Diore gotirētobosarimasu ñaboacami Juan” yirā ñari —gāmerā yicama ña.

²⁷ To bajiro gāmerā ñagōrā ñari, ado bajiro ñre cūdicama ña:

—Juanre rotir'ire masibeaja yu —Jesúre yicōacama ña.

To ña yisere ajicōari, ado bajiro ñnare cūdicami Jesús:

—To bajiro yure muu cūdiare, “Ī rotise rāca yaja yu”, muare yigotibetirucya yu quēne —ñnare yicami Jesús.

Juarā rīa cutigu, ĩ rīare ĩ moarotirere Jesús ĩ gotimasiore queti

²⁸ To bajiro ñnare yigajanocōari, gotimasiore queti ñnare goticami Jesús:

—¿No bajiro tuoīati muu, adire, yu gotigūadire? Sīgū ñagūmi juarā rīa cutigu. Ī macu ñasuoḡure ado bajiro yigūmi ĩ: “Macu, yucurema mani uye vesere moagūaja”, ñre yigūmi. ²⁹ To ĩ yiboajaquēne, “Varūabeaja yu”, ñre yicūdigūmi. To bajiro yiboarine, berojuma, tuoīavasoacōari, moagū vacoacūmi ĩ yuja. ³⁰ To ĩ yiro bero, gāji ĩ macure quēne, to bajirone ñre yigūmi. To ĩ yirone, “Ba. Moagū varucya yu”, ĩ jacure yicūdigūmi ĩ. To yiboarine, vabecūmi. ³¹ To bajiri muu tuoīajama, ¿nijua ñañujari ĩ jacu ĩ rotiriarore bajirone cūdir'i? —ñnare yisēniīacami Jesús.

To ĩ yisēniīarone, ado bajiro ñre cūdicama:

—Ī, moarotisuor'ijua, ĩ jacu ĩ rotiriarore bajiro ñre cūdiyūmi —ñre yicūdicama.

To ña yisere ajicōari, ado bajiro yicami Jesús:

—Riojo mũare gotiaja yũ. Ujũre gãjoa sēnibosarimasare, to yicōari, rōmia, ũmũare ajeriarã cuticōari, vaja sēnirã rōmirire, “Rojorã masu ñaama” ñare yĩlaterã ñarãja mũa. Mũa ĩaterã sīgũri, tũoĩavasoacōari, Ujũ Dios yarã quēnaro ĩ yirã ñarãma. Ñare bajiro mũa tũoĩavasoabetijama, ĩ yarã me ñarũarãja mũa. ³² Juan, oco rãca masare bautizarimasũ, “Ado bajirojũa mũa yijama, quēnaroja” mũare ĩ yigotimasioboajaquēne, ĩre ajibesuja mũa. To bajiboarine, “Rojorã masu ñaama” mũa yĩlaterãjũama, ĩre ajitirũnũñuma ĩna. To bajiri ĩre ĩna ajitirũnũsere ĩariarã ñaboarine, ĩre ajibeticōari, rojose mũa yirũgũriarore bajiro rojose yicōa ñaja mũa —ñare yicami Jesús.

*“Jud'io masa ĩna ajitirũnũbetijare, gãjerãjũare
 mũjorũcũmi Dios” yigũ, moarimasa rojose yirã ĩna
 bajire rãca Jesús ĩ gotimasiore*

(Mr 12.1-12; Lc 20.9-19)

³³ Quēna ado bajiro ñare gotimasiocami Jesús:

—Sīgũ masu ũye vese otegũmi. Tire otegajanocōari, matagũmi. To yicōari, ũye oco juarotijũ quēnogũmi. Tijũ bero, vecajũ ñacōari, ĩ ĩatirũnũjesarotijũ quēnogũmi. To yigajanocōari, gãjerãre, “Yũre ĩatirũnũbosaba”, yigũmi. “Uye ti rica cutiro, gãjerãre ĩsicōari, vaja sēnirũarãja mũa. To yicōari, mũa juajama, ‘Ado cōro ñaja mani ye. Ado cōro ñaja ĩ yema’ yicōĩama”, ñare yigũmi. To yicōari, gajerojũ vacoacũmi yuja. ³⁴ To bajiri cojorũmũ, “Uye rica cuti bũcũatoja ti” yigũ, ĩre moabosarimasare cōagũmi, “Uye, yũre ĩna cũbosarere yũre juabosaaya” yigũ. ³⁵ Uye vesejũ ĩna ejaro ĩacōari, ti vese coderãjũa, ado bajiro yirãma:

Īnare ñejeċōari, jarāma. Gājerāre sīarāma, to yicōari gājerāre gūtane reasīarāma. ³⁶ To ĩna yire quetire ajicōari, jājarābūsa ĩre moabosarimasare cōagūmi vese űjū, ĩ ye ñarotire juabosaaya yigū. Ti vesejū ĩna ejarone, ĩtirūnūrimasa, to rījoro ejariarāre ĩna yiriarore bajirone yirāma, ĩnare quēne.

³⁷ To bajiro ĩna yiecore quetire ajicōari, “Ųū macūjūare rūcūbūorāma” yitūōīacōari, ĩre cōaboagūmi. ³⁸ To bajiro ĩ yicōar'ire, vesejū ĩ ejasere ĩacōari, ado bajiro gāmerā ñagōrāma vese coderimasa: “Adi vese űjū macūne ñaami. To bajiri ĩ bajirocaveojama, ĩne ñaami ĩre vasoarocū. To bajiri ĩre mani sīajama, mani ye sita ñarūaroja yuja”, gāmerā yiñagōrāma ĩna. ³⁹ To bajiri vese sojūajū ĩre ñia vati, ĩre sīarocacōarāma —Īnare yicami Jesús.

⁴⁰ To bajiro ĩnare yigajanocōari, ado bajiro ĩnare sēniīacami:

—¿Ti vese űjū tudiejagū, no bajiro ĩnare yigūjari, ti vese coderimasare? —Īnare yisēniīacami Jesús.

⁴¹ To ĩ yisere ajicōari, ado bajiro ĩre cūdicama ĩna:

—Rojorā masu ñarāma ti vese ĩtirūnūrā. To bajiri ĩnare ĩamaibecūne ĩnare sīareagūmi. To ĩ yiro bero, gājerāre ti vesere ĩtirūnūronare vasoagūmi, ĩ ye ñarotire juabosaronare —Jesúre ĩre yicama ĩna.

⁴² To ĩna yicūdisere ajicōari, Jesújūa, ado bajiro ĩnare yicami:

—“Ųye vese űjū macūre rojorā ĩna sīarocarere bajirone viri būarimasa gūta ĩna beserocaria ñaboarine, ñamasurica ñarūaroja”, yigotiaja Dios ocare masa ĩna ucamasire. ¿Tire ĩabeticatique mūa? Ado bajiro gotiaja:

“Gūta rāca vi quēnorimasa coja gūtare rocarāma ĩna. ĩna rocaria ñaboarine, gajea gūta rētoro quēnarica ñaruaroja tia. Tia gūta suorine quēnarivi quēnorucumi Dios. Tia manijama, quēnomasibetibogumi. To bajiro bojagumi Dios mani ujū. To bajiri tia gūta suorī Dios quēnaro ĩ yisere ajimasicōari, buto tuoīa variquēnaja mani”, yigotiaja Dios oca masa ĩna ucamasire.

⁴³ To bajiri ado bajiro yigū, ti quetire mūare gotibū yū: Diore rotibosagure yure ajitirūnūmena mūa ñajare, jud'io masa mejūare, “Yū yarā ñaña” ĩnare yicōari, quēnaro ĩnare yirucumi Dios. ĩnajūama, Dios ĩ bojarore bajiro ĩre ajitirūnūgarāma. ⁴⁴ No bojarā yure, yū ocare ajiterā, rojose tāmūorūgarāma ĩna —ĩnare yicami Jesús.

⁴⁵ Jesús ĩ gotimasiosere ajicōari, “Mani bajisere yigū yami”, yiajimasicōacama fariseo masa, paia ujarā quēne. ⁴⁶ To bajiri Jesúre ñiaruaboacama ĩna. “Diore gotirētobosarimasū ñaami Jesús” masa ĩna yituoīajare, masare güirā, ĩre ñiabeticama.

22

*“Ī macū ĩ āmosiagūadijare, masare jirēogūmi ujū”,
Jesús ĩ yigotimasiore queti
(Lc 14.15-24)*

¹ Quēna gotimasiore queti masare goticami Jesús:

² —Adi quetire tuoīacōari, “Tire bajiro bajiruaroja, masare ‘Yū yarā ñaña mūa’ Ujū Dios ĩ yiroti” mūare gotimasiogū yaja: Sīgū ujū, ĩ macū ĩ āmosiarotirūmure quēnoyugumi.

3 To yicōari, “Īavariquēna ejarēmoronare jiaya m̄na” yiḡu, ĩre moabosarimasare cōaḡūmi ĩ. To ĩ yisere ajicōari, jirā vaboarāma ĩna. Īnajaama, vadiruamenama. 4 Īna vadiruabetire ajicōari, gājerā ĩre moabosarimasare cōaḡūmi quēna. “Ȳna ūju m̄are jiḡu ñari, ĩ yarā vaibucarā mame bucuarāre s̄iarotimi. Jēre quēnogajanom̄u ȳna. To bajiri ĩ mac̄u ĩ āmosiarirūm̄u ĩarā vayá m̄na quēne’ ĩnare yiba”, yicōaḡūmi ĩna ūju. 5 To ĩ yisere ajicōari, jirā vaboarāma ĩna quēna. ĩnare c̄udimenane, vacoanama, ĩna ye moare moaroana. Sīḡū ĩ ya veseju vac̄umi. Gāji ĩ gajeyeūni ĩsiroj̄u vac̄umi. 6 Gājerāma, ūju ĩ cōaboariarāre ñjecōari, ĩnare jas̄iacōarāma. 7 Tire ajicōari, b̄ato jūnisiniḡūmi ūju. To bajiri ĩ yarā surarare cōaḡūmi. “Īnare s̄iacōari, ĩna ya virire soereacoaya”, ĩnare yicōaḡūmi. 8 To ĩ yiro bero, gājerā ĩre moabosarimasare ado bajiro gotiḡūmi: “Ȳu mac̄u ĩ āmosiarotiaye quēnogajanom̄u. Jēju ȳu queti cōaboarā, ĩna ejabetijare, quēnaja. ĩnare jicōabetiroti ñaboayuja. 9 Jājarā masa ĩna vati maarijuare vasa. To m̄na ĩabujarā cōro jirēocōari, ĩnare ūmato vaba”, ĩnare yiḡūmi ūju, ĩre moabosarimasare. 10 ĩ rotirore bajirone masare jirēorāma ĩna. Quēnarā, rojorā, ĩna bujarā cōro jirēorāma. To bajiri ūju ya vi, jūm̄ucoatoja ti.

11 ĩ jicōariarāre ĩaḡū sājaḡūmi ūju. Sīḡūre, ĩna āmosiaro ĩarā ejarā ĩna s̄añase ūnire s̄añabec̄ure ĩabujaḡūmi ĩ. 12 To bajiri, ĩre ĩacōari, ado bajiro ĩre sēniĩaḡūmi: “¿No yiḡu ĩna āmosiaro ĩarā ĩna s̄añase ūni s̄añabeati m̄u?”, ĩre yiḡūmi. To ĩ yiboajaquēne, ĩre c̄udibec̄umi. 13 To ĩ bajijare, bare jeorimasare ado bajiro ĩnare yiḡūmi ūju. “Ī ḡubori, ĩ āmorire

quēne siacōari, rētiarojū ĩre rocacōaña. Tojū ñacōari, bũto rojose tãmuogũ ñari, guji pōguē, oti, yirũcũmi”, ĩnare yigũmi uju, bare jeorimasare. ¹⁴ To bajiro bajirũaroja, “Yũ yarã ñaña mũa” Uju Dios ĩ yiroti quēne. Jãjarã masare, “Yũ yarã ñaña mũa” Dios ĩ yire ti ñaboajaquēne, sīgũrine ñarãma ĩ rãca ñarona —ĩnare yicami Jesús.

*“Ujarã gãjoa manire ĩna vaja yirotijama, ĩnare ĩsiroti ñaja”, Jesús ĩ yigotire queti
(Mr 12.13-17; Lc 20.20-26)*

¹⁵ To ĩ yisere ajicōari, fariseo masa ĩ tũ ñaboarã cãmotadicoacama ĩna, gãmerã ñagõroana. “Ado bajiro yirãsa”, yiruyuyuma:

—Ado bajiro mani sēniñajama, cudimasibeticōari rojose tãmuorũcũmi —yitũoĩaboayuma.

¹⁶ To bajiro yitũoĩarã ñari, ĩna rãcanare, to yicōari, “Uju ñamasugũ ñarũcũmi Herodes” yirũgũriarãre quēne, Jesús tũ ĩnare cõañujarã ĩna, “ĩre sēniñaya mũa” yirã. To ĩna yicōariarã ado bajiro Jesũre sēniñacama ĩna:

—Ajiya gotimasiorimasũ. “Riojo gotigu ñaami”, mũre yimasiaja yũa. “Ado bajiro mani yisere bojagũmi Dios” yigotimasioğũ ñari, riojo yũare gotimasioaja mũa. “Ado bajiro yũ gotimasiojama, yũre ajijũnisinirũarãma” yitũoĩabecũne, riojo gotigu ñaja mũa. “Ãnoama, ñamasurã ĩna ñajare, ricati ĩna ajijũnisinibetire ĩnare gotimasiorũcũja”, yitũoĩabecũ ñaja mũa. Masa ñajedirore yũare riojo gotigu ñaja mũa. ¹⁷ To bajiro yigũ mũ ñajare, mũ tũoĩasere ajirũaja yũa. ¿Roma macagu uju, César, gãjoa manire ĩ vaja yirotisere mani vaja yijama, quēnacōarolari? ¿Dios

ĩ rotimasirere cüdimenta yirãjarique mani, ĩre mani vaja yijama? —Jesúre yisēniĩaboacama ĩna.

¹⁸ Jesújũama, “Rojose yure yiruarã, to bajise yure sēniĩatoama ĩna”, yimasicōacami. To bajiri ado bajiro ĩnare cüdicami:

—“Quēnarã ñaja yua” yihoarine, mua yirore bajiro yirã me ñaja mua. ¿No yirã, “Rojose ĩre yirãsa” yirã, to bajise yure sēniĩatoati mua? —ĩnare yicami Jesús. ¹⁹ —Roma macagũ ujure gãjoatii, ĩre vaja yiroitiire, cojotii yure ĩoña —ĩnare yicami Jesús.

To ĩ yijare, ãmiadi, ĩre ĩocama ĩna. ²⁰ Gãjoatiire ĩacōari, ado bajiro ĩnare sēniĩacami Jesús:

—¿Ñimũ rioga tuyati? ¿Ñimũ vãme tuyati? — ĩnare yicami Jesús.

²¹ To ĩ yirone,

—Roma macagũ Ujũ César rioga tuyaja. To yicōari, ĩ vãme quēne ñaja ti —Jesúre yicüdicama ĩna.

To ĩna yijare, ado bajise yicami Jesús:

—To bajiri aditiire ĩacōari, “César yatii ñaja”, yimasiaja mua. To bajiri, gobierno ĩ vaja yirotijama, ĩnare vaja yiroti ñaja. To bajirone bajiaja Diore quēne. Jediro Dios ĩ cōase ti ñajare, “Yua cuose ti ñaboajaquēne, ti rãca mũ bojarore bajiro yiruarãja”, Diore ĩre yiroti ñaja, manire. To yicōari, “No bojase moare yua yise quēne, mũ ujose rãca yua yimasise ti ñajare, ti rãca mũ bojarore bajiro yirũgũruarãja”, ĩre yiroti ñaja, mũare —ĩnare yicami Jesús.

²² To bajiro ĩ yisere ajicōari, no yimasibeticama ĩna, quēnaro gotigure ajibetirũgũriarã ñari. To bajiri jũaji tudisēniĩamenane, vacoacama yuja.

“¿Bajirearãma, tudicaticoanajari?”, Jesúre ñna yisēñiãtore queti

(Mr 12.18-27; Lc 20.27-40)

²³ Tirũmũne saduceo masa quẽne ejacama, Jesúre sēñiãtorã. “Masa ñna rijato bero, ñna usuri, ñna rujari ñaro cõrone quẽna tudicatimenama” yirã ñacama saduceo masa. Ado bajiro ñre sēñiãcama:

²⁴—Ajiya gotimasiorimasũ. Moisés ñamasir'i ado bajiro ñ yiuacũmasire ti ñajare, mũre sēñiãrã vabũ yua: “Sĩgũ, manajo cutiboa, rĩa magũne ñ bajirocajama, ñ gagũ manajo ñariore manajo cutirũcũmi ñ bedijũ. To bajiri ñ rãca ñacõari, so macũ cutijama, ñ gagũ macũ ñarũcũmi”, yimasĩñuju Moisés. ²⁵ Yua rãcana, sĩgũ rĩa, cojomo cõro jua jẽnituarirãcũ ãmua ñaboacama. Sĩgõrene manajo cutiboacama ñna. Ñasũogũ sore manajo cutisũoboacami. Rĩa magũne rijacoacami ñ. Ñ rijato bero, gãji ñ bedi vasoaboacami. Ñ quẽne rĩa magũne rijacoacami. ²⁶ Ñ bederã quẽne, to bajirone sore manajo cutiboacama. Rĩa manane, rijajedicoacama ñna quẽne. ²⁷ So manajua ñna rijajediro bero, so quẽne rijacoacamo yuja. ²⁸ To bajiri bajireacõari, quẽna ñna tudicatijama, ¿ñimũjua ñaguĩda so manajũ masu ñarocũma, ñna ñaro cõrone sore ñna manajo cuticato bero? —Jesúre yisēñiãtoca ñna.

²⁹ To ñna yirone, ado bajiro cãdicami Jesús:

—Dios oca masa ñna ucamasire ajimasimena ñaja mũa. Dios ñ masisere quẽne masirã me ñaja. To bajirã ñari, Moisés ñ ucamasirere tũoĩacõari, “Riojo me gotiro yaja”, yitũoĩaboaja mũa. ³⁰ Ado bajirojua bajiaja: Bajireariarã, ñna tudicatiro bero, manajo cutire, manajũ cutire quẽne manirũaroja. Ángel

mesare bajiro bajirã ñaruarãma ñna. ³¹ ¿“Masa ñna bajirearo bero, ñna usuri caticõaroja”, yirere ñabeticatique mua? Dios ñ masune ñ gotirere ñre gotirõtobosarimasu ado bajise ucamasifñumi: ³² “Mua ñicua ñamasiriarã Abraham, Isaac, Jacob, ñna rucubuo vadimasicacune ñaja yu”, yigotimasiñumi Dios. Masa bajireariarã ñna usuri ti caticõa ñabetijama, to bajise yibetimasiborimi. Bajireariarã, quëna tudicatrãjua ñna rucubuoogu ñagãmi. “Ñna usuri ti caticõa ñajare, bajireariarã ñaboarine, Diore rucubuoocõa ñarãma”, yire ñaja — ñnare yicami Jesús.

³³ To bajiro ñ yisere ajicõari, no yimasibeticama ñna, quënarõ gotigare ajibetirũgũriarã ñari.

Dios ñ rotimasire ñamasuri vãmere Jesús ñ gotire queti

(Mr 12.28-34)

³⁴ Saduceo masare Jesús quënarõ ñnare ñ cãdise ñajare, gajeye ñre ñna sënifatomasibetirere ajiyujarã fariseo masa. Tire ajicõari, rëjañujarã ñna. ³⁵ Tijua bero, sigũ ñna rãcagu, Dios ñ rotimasire gotimasiorimasu, Jesúre sënifagũ ejacami. “Ado bajiro josasere yu sënifajama, cãdimasibeticõari rojose tãmnoꝛũcũmi” yigu, ado bajise ñre sënifacami:

³⁶ —Gotimasiorimasu, ¿disejua ñnati ñamasuse masu Dios ñ rotimasire, mua ñajama? —Ñre yisënifacami.

³⁷ To bajiro ñ yisere ajicõari, ado bajiro cãdicami Jesús:

—Mani ujure, Diore bato mairoti ñaja. No bojagure mani mairo rëtoro, no bojase mani cãose, to yicõari, mani bojatũoñase rëtoro Diore mairoti

ñaja. ³⁸ Ti ñaja ñasuse, ñamasuse Dios ï rotimasire. ³⁹ To yicõari, gajeye tire bajibusasene ado bajiro yaja: “M_u masu rujare m_u mairone bajirone m_u t_uanare maiña”, yigotiaja Dios ï rotimasire. ⁴⁰ To bajiri j_ua vāmene ñaja ñamasuse masu Dios ï rotimasire. Tire m_u c_udijama, Moisés ñamasir'i ï rotimasire, to yicõari, Diore gotirētobosarimasa ña gotimasiomasirere quēne c_udijeocõagū yig_uja m_u —ïre yicami Jesús.

“Rotim_uorūgōr_uc_umi’ yig_u, Dios ï cōaroc_u, ¿ñim_u ñar_uc_umi, yit_uoĩati m_ua?”, Jesús ï yisēñiare queti (Mr 12.35-37; Lc 20.41-44)

⁴¹⁻⁴² Fariseo masa y_ua t_u ña rējaro, ado bajiro ñare sēniñacami Jesús:

—“Rotim_uorūgōr_uc_umi” yig_u, Dios ï cōaroc_u, ¿ñim_u ñar_uc_umi yit_uoĩati m_ua? —ñare yicami Jesús.

—“Ëj_u David ñamasir'i jānamine ñar_uc_umi” yaja —ïre yic_udicama ña.

⁴³ To ña yisere ajicõari, ado bajiro ñare yicami:

—To bajiro m_ua yit_uoĩaboajaquēne, Ëj_u David ñamasir'i, “Rotim_uorūgōr_uc_umi” yig_u, Dios ï cūrocure t_uoĩagū, ¿no yig_u Diore yig_uare bajiro, “y_u ñj_u” yimasiñujari ï? Esp'iritu Santo ï ejarēnose rāca ado bajiro ucamasiñumi:

⁴⁴ “Y_u ñj_uare ado bajiro yir_uc_umi Dios: ‘Y_u riojocacat_ua rujiya maji. M_ure ïaterāre, “Rojose yit_ujaya” ñare y_u yiro bero, rojose yimasibetiruarāma. To cōrone rotis_uor_uc_uja m_u’ yir_uc_umi Dios, y_u ñj_uare”, yucamasiñumi David.

45 To bajiri, “‘Rotimorũgõrũcumi’ yigũ, Dios ï cõarocũ, David ñamasir'i jãnami ñarũcumi” yiucamasire ti ñaboajaquẽne, ¿no yigũ ï ñjũre bajiro bajigutique? —Ïnare yicami Jesús.

46 To bajiro ñnare ï gotisere ajicõari, sīgũ ïre cãdimasigũ manicami. “Mani rẽtoro masigũ ñaami” yitũoĩacõari, “‘Ãnoama masimena ñaama’ yiromi” yirã, ïre sẽnĩã tũjacõacama ñna yuja.

23

“Rojose tãmorũarãja mũã”, fariseo masare Jesús ï yire queti

(Mr 12.38-40; Lc 11.37-54; 20.45-47)

¹ To ï yiro bero, masare, yũã ï buerãre quẽne, ado bajiro yũare yicami Jesús:

² —Dios ï rotimasire gotimasiorimasa, fariseo masa quẽne, Moisére Dios ï roticũmasirere buerẽtobucõari, “Ado bajiro yiroti ñaja manire”, yigotimasiorã ñaama. ³ To bajiri tire ñna gotimasiosere quẽnaro ajitirũnũña mũã. To

bajiboarine, ñna yirore bajiro yimena ñna ñajare, ñna yirore bajiro yibesa. ⁴ Dios ï rotimasirere buerẽtobucõari, ï rotimasire rẽtobũsaro yirotiama ñna. “Cojo vãme me

mani rotise ñajare, cãdijeomasimenama ñna” yimasirã ñaboarine, ñnare ïamaimenane, “Ñajediro yũã gotirẽtobuse riojo ñaja”, masare ñnare yicõã ñarũgũama. ⁵ Jediro ñna yisere, “Quẽnaro yirã ñaama” masa ñna yĩarũcũbũosere bojarã yama. Ñna riovecari siature, ñna ricari dũreature quẽne Dios

ocasãñarijataroriaca jacabũsarijatarori cũoama ñna, “Gãjerã manire ïacõari, quẽnaro rũcũbũoato ñna”

yirã. To yicõari sudiro gaja seayore, jacobusase seayore cutiaseri sãñaama ãna. “Quẽnaro yirã ãnaama ãna” masa ãna yĩarũcũbũosere bojarã yama. ⁶ Boserũmuri ñaro ãna barujiama, ñamasuri cũmurorire rujivariquẽnarũgũama ãna. Dios ocare bueriavirijure quẽne ñamasuri cũmurorire rujivariquẽnarũgũama. ⁷ To yicõari, jãjarã masa ãna rẽjarũgũrijaurire ejarũgũama. Masare ãna bocajama, rũcũbũose rãca ãnare ãna sẽnisere bojarũgũama. To yicõari, “gotimasiorimasũ” masa ãna yijama, ajivariquẽnarũgũama.

⁸ Mũarema, ãna yirore bajiro mũa yibetijare, quẽnarũaroja. “Gotimasiorimasũ” mũa rãcana mũare ãna yisere bojabetirũarãja mũa. Sĩgũne ñaja yũ, mũa jedirore gotimasiorimasũma. Mũama, cojoro cõrone ñarã ñaja mũa, yũre ajitirũnrãma. To bajiri gotimasiorimasũ gãmerã yimasimenaja mũa. ⁹ Õ vecajure ñagũ sĩgũne ñaami mani jacũ, Dios vãme cutigũ. To bajiri adi sitagũre, gãjire yũre ajitirũnũgũre, Diore mũa yirũcũbũorore bajiro yirã, “yũa jacũ” ãre yibeja mũa. ¹⁰ “Yũa mũa ñaja mũ” gãjerã mũare ãna yirũcũbũosere ãnare yirotoibeja. “Rotimũorũgõrũcũja mũ” yigũ, Dios ã cõacacũ, yũ sĩgũne ñaja mũa mũama. ¹¹ Sĩgũ yũre ajitirũnũgũ, ñamasugũ ã ñarũajama, gãjerã ãna bojasere masicõari, quẽnaro ãnare yiejarẽmogũ ñarũcũmi. ¹² Quẽnaro ãnare ãna yirũcũbũosere bojarãre, “Ñamasurã me ñato”, ãnare yirũcũmi Dios. No bojagũ, “Ñamasugũ me ñaja yũ” yicõari, quẽnaro gãjerãre yirẽmogũjũare, “Ñamasugũ ñato”, ãre yirũcũmi Dios —yũare yicami Jesús.

¹³ Fariseo masare, Dios ã rotimasire gotimasior-

imasare quēne yigu, ado bajiro goficami Jesús:

—Buto rojose tām̄oḡuārāja m̄ua. “Quēnaro yirā ñaja yua” yiboarine, rojorā ñaja m̄ua. Dios ĩ rotimasirere buerētobucōari, ñamasuse meḡare ajitirūncōari, gotimasiovadicaḡu m̄ua. To bajiro m̄ua yijama, “Ḥḡu Dios yarā quēnaro ĩ yirā ñabeticōato mani” yirāre bajiro yiñaja m̄ua. To yicōari, “Gājerā, Ḥḡu Dios yarā quēnaro ĩ yirā ñabeticōato ĩna” yirā yaja m̄ua. Dios yarā ĩna ñaruaboajaquēne, ĩnare matarā yaja m̄ua. To bajiri m̄ua quēne ĩ yarā ñabetiruarāja m̄ua —ĩnare yicami Jesús.

14 —Buto rojose tām̄oḡuārāja m̄ua, fariseo masa, Dios ĩ rotimasire gotimasiorimasa quēne. “Quēnaro yirā ñaja yua”, yit̄uoĩaboaja m̄ua. Manajua rijaveoriarā ya virire ēmarā ñaboarine, masa ĩna ĩaro rĳoroḡua, “‘Quēnaro yirā ñaama’ yĩlato” yirā, “Yoaro Diore sēnirā yaja”, yisocarūḡũboaja m̄ua. To bajiro m̄ua yise vaja, gājerā rojorā, rojose ĩna tām̄ose rētoro rojose tām̄oḡuārāja m̄ua —ĩnare yicami Jesús.

15 —Buto rojose tām̄oḡuārāja m̄ua. “Quēnaro yirā ñaja yua” yiboarine, m̄ua yirore bajiro yirā me ñaja m̄ua. “Manire bajiro ḡāji ĩ t̄uoĩajama, quēnaja” yit̄uoĩacōari, masare buto gotimasiocludiaja m̄ua. Sīgũ, “Ȳnare bajiro t̄uoĩato” m̄ua yigure, “Mani ajitirūn̄ro rētoro mani yere ajitirūn̄ato ĩ” yirā yaja m̄ua. To bajiro m̄ua yijama, “Butobusa rojose t̄uoĩato” yirā yaja m̄ua. To bajiri, m̄ua rētoḡusaro Dios ĩ bojabetire yicōari, “Rojose tām̄ot̄ujabetiriaroḡu var̄ucami ĩ quēne”, yirā yaja m̄ua —ĩnare yicami Jesús.

16-22 Quēna ado bajiro ĩnare goficami Jesús,

fariseo masare, Dios ï rotimasirere gotimasiori-
masare quêne:

—Buto rojose tãtũorũarãja mũa. Ìamena, gãjerã ìamenare tũa vanare bajiro bajirã ñaja mũa. No bojase mũa yirotere mũa yirũajama, “Yimasucõarũarãja yũa. Tire yũa yibetijama, Dios, rojose yũare yibogũmi” yirã, yirere ado bajiro gãjerãre gotimasiorũgũboaja mũa: “Cojojirema mani gotirote bajiro yirũamena ñari, ado bajirojũa mani gotijama, quẽnacõaroja”, yirũgũboaja mũa: “Mani gotirũgũrore bajiro yirã ñaboarine, Dios vãmere mani gotivasoajama, mani gotirote bajiro mani yibetiboajaquêne, rojose manire yibecũmi Dios”, yirũgũboaja mũa. To yicõari, ado bajiro gotimasiorẽmoaja: “Dios vãmere gotiterã, Diore yirũcũbũoriavi vãme rãca mani yijama, quẽnacõaroja. To bajiro yiterã, Diore yirũcũbũorã soemũoriajau vãme rãca mani yijama, quẽnacõaroja. Tire mani yitejama, õ vecajũ ãtũagaserojũ Dios ï ñaro vãme rãca mani yijama, quẽnacõaroja. To bajiboarine, Diore yirũcũbũoriaviaye oro vãme cõtise rãca, to yicõari, gaje vãme Diore rũcũbũorã soemũoriajau joere jesase vãme rãca mani yijama, mani gotirote bajirone yiroti ñaja”, yiboaja mũa. Tũoĩamasimena, ìamenare bajiro bajirã ñaja mũa. Ñajediro Dios ye ti ñajare, ï vãmerene gotirã yaja mũa —ĩnare yicami Jesús.

23 —Buto rojose tãtũorũarãja mũa. “Quẽnaro yirã ñaja yũa” yiboarine, rojorã ñaja mũa. Dios ï rotimasirere buerẽtobucõari, ñamasuse mejũare ajitirũnrãja mũa. To bajiro yirã ñari, bare sãvũorere,

an'is, menta, comino vāme cutire mojoroaca ti vaja cutiboajaquēne, Diore yirūcub̄oriavi moabosarimasare ĩsiaja m̄ua. To bajiro yirā ñaboarine, Dios ĩ rotimasire ñamasusejuarema ajitirūn̄mena ñaja m̄ua. Ado bajiro bajiaja ñamasuse: Quēnaro riojo yire, gājerāre ĩamaire, to yicōari, Diore maire quēne ñaja ñamasuse. Tire quēne yirūgūrona ñaja m̄ua. ²⁴ To bajiro yirā ñari, ado bajiro yirāre bajiro yaja m̄ua: “Beco rāca idirobe” yirā, oco m̄ua idirotire veorūgūaja m̄ua. To bajiro yirā ñaboarine, camello vāme cutigujarema jaigu ĩ ñaboajaquēne, rujane bayurāre bajiro yirūgūaja m̄ua. To bajiri, ĩamena, gājerā ĩamenare tūa vanare bajiro bajirā ñaja m̄ua. Dios ĩ rotimasire ñamasuse mere ajirūcub̄orā ñaboarine, ñamasusejuare yimena ñaja m̄ua —Īnare yicami Jesús.

²⁵ —Buto rojose tām̄oruarāja m̄ua. “Quēnaro yirā ñaja yua” yitūoĭaboarine, rojorā ñaja m̄ua. Idiriabaja, bare jeobariabaja joema coeriabajari ñaboarine, jubeajūama buto ŗeri cutibajarire bajiro bajiaja m̄ua. M̄ua ŗsuri bajisejuarema tūoĭabeaja m̄ua. To bajirā ñari, “Quēnaro yirā ñaja yua” yitūoĭaboarine, rojosere quēne tūoĭarā ñari, rojorā ñaja m̄ua. Īñorā ñari, “Īnare yitocōari, ĩna cūboasere ēmaruarāja”, yitūoĭarā ñaja m̄ua. ²⁶ “Rojorā ñaja mani” yimasimena ñari, ĩamenare bajiro bajirā ñaja m̄ua, fariseo masa. Rojasere tūoĭatujaya. To bajiro m̄ua yijama, Dios ĩ bojarore bajiro tūoĭarā ñari, quēnaro yirā ñaruarāja m̄ua.

²⁷ Buto rojose tām̄oruarāja m̄ua fariseo masa, Dios ĩ rotimasire gotimasiorimasa quēne. “Quēnaro yirā ñaja yua” yiboarine, m̄ua yirore

bajiro yirã me ñaja mña. Masa yujeriaviri botisene viariavirire bajiro bajiaja mña. Masa ñna ñaquēnariviri ñaboarine, jubeajuma rijariarã gōa quēnabetoja. ²⁸ To bajiro bajirã ñaja mña. “Quēnaro yirã ñaama” masa ñna yīlarã ñaboarine, mña t̄oīare cutisema rojorã ñaja. “Quēnaro yirã ñaama” masa mñare ñna yīasere bojat̄oīarã ñaboarine, rojose ñaro cōro t̄oīarã ñaja mña —ñnare yicami Jesús.

²⁹ Quēna ado bajiro ñnare gotirūtuacami Jesús:

—Buto rojose t̄am̄oḡnarãja mña. “Quēnaro yirã ñaja yña” yiḡoarine, mña yirore bajiro yirã me ñaja mña. Diore gotirētobosamasiriarãre ñna yujemasirij̄a joere quēnarij̄a quēnoaja mña, “Quēnarã ñamasiñuma” yirã. To yicōari, gājerã quēnaro yiriarãre quēne ñna yujerij̄a joere quēnase quēnorūgūaja mña. ³⁰ To yicōari, ado bajiro yirūgūaja mña: “Mani ñicua, Diore gotirētobosarimasare ñna s̄iarearo, ñnare s̄ia ejarēmobetiboriarãja mani”, yirūgūaja mña. ³¹ To bajiro mña yijama, “Quēnarã ñañuma” yirã me yaja mña. Ado bajiroj̄a yirã yaja: “Diore gotirētobosamasiriarãre mani ñicua ñna s̄iamasire quēnañuja ti” yirã yaja mña, mña ñicua rojose ñna yiriarore bajiro rojose yirã ñari. ³² Mña ñicua Diore gotirētobosarimasare ñna s̄ias̄ovadimasiriarore bajirone mña quēne ñna jānerabatia ñari, Diore gotirētobosarimasare s̄iajeocōaroti ñaja —ñnare yicami Jesús.

³³ —Vātia ūj̄a rojose ñ yirore bajirone rojose yijairã ñaja mña. Rojose t̄am̄ot̄ujabetiriaroj̄a mña varotire, no bajiro rudimasibetiruarãja. ³⁴ Mña jud'io masa vatoaj̄a Diore gotirētobosarãre, quēnaro

tuoĩarãre quẽne, Dios ocare gotimasiorãre quẽne cõarucija yu. Ìnare sĩaruarãja mua. Gãjerãrema yucútẽroju jajusĩaruarãja. Gãjerãrema, Dios ocare ìna bueriviriju ìnare jaruarãja. Gãjerãrema, ìna vati macari ñaro cõrone rojose ìnare yisuyaruarãja. ³⁵ To bajiro mua yiroti ti ñajare, ado bajiro yirucami Dios, mua ñicure, mua yarã jedirore yure ajitirũnũmenare: Abel ñamasir'ire mua ñicu ì sĩasũomasire, to yicõari Diore yirũcũbũoriavi jubeaju ñarijau soemũoriajau tũju Berequ'ias macure Zacar'iare ìna sĩatusamasirere, quẽnaro yirãre ìna sĩavadimasire ñajare, bũto rojose tãmuoruarãja mua, adirũmuri ñarã. ³⁶ Riojo mũare gotiaja yu. Mua ñicua ìna bajimasiriarore bajirone Diore mua ajitirũnũbeticõa ñajare, ìna sĩamasire vaja rojose ìnare ì yiroti rẽtobũsaro rojose mũare yirucami Dios, adirũmuri ñarãre —ìnare yicami Jesús.

*Jerusalén macanare ìna bajirotire Jesús ì tuoĩasũtiritire queti
(Lc 13.34-35)*

³⁷ Jerusalén macanare ìre ìna sĩarocarõ bero ìna bajirotire tuoĩacõari, ado bajiro yicami Jesús:

—Jerusalén macana, Diore gotirẽtobosamasiriarãre sĩamasiriarã jãnerabatia ñacõama ìna. Dios ì cõamasiriarãre, ì ocare gotimasiorimasare gũtane ìnare reasĩamasiriarã jãnerabatia ñaama. Cojoji me gãjaboco so querũju eñeroca so rĩare so juarẽorore bajiro ìnare yirũaboacaju yu, ìnare coderũ. To bajiro yu yirũaboajaquẽne, ìnajua yure bojabeticama. ³⁸ To bajiri jẽre, “Ìna ñarijũre codetũjacõaja

yu yuja”, yituoĩami Dios. ³⁹ Riojo gotiaja yu: “¡Rotimuoŕgõŕcumi’ yigũ, Dios ĩ cõar’i vadiami! ¡Quẽnase ĩre yivariquẽnato mani! ¡Diore rotibosagu ĩ ñajare, ĩre quẽnaro yato Dios!” yure ĩna yiroto rĩjoro, quẽna juaji yure ĩabetiruarãma ĩna —ĩnare yituoĩa ñagõcami Jesũs, Jerusalén macanare.

24

“Diore yirũcũbũoriavire jud’io masa me ñarã caguerocacõaruarãma”, Jesũs ĩyire queti

(Mr 13.1-2; Lc 21.5-6)

¹ Diore yirũcũbũoriavijũ ñacõari, budiacami Jesũs. ĩre emũcõari, ado bajiro ĩre yicajũ yua:

—Adi vire ĩaña mũ —ĩre yicajũ yua.

² To bajiro yua yirone, ado bajiro yuare yicami Jesũs:

—¿Adi vire quẽnaro ĩati mũa? Mũa ĩarivi ti bajiro tire riojo muare gotigũagũ yaja yu. Adi vi mũa ĩarivi ñaro cõrone cagueroca ecorũaroja. To bajiri adi viaye gajea gũta joere, gajea jesabeticõarũaroja —yuare yicami Jesũs.

“Macarũcũro ti jediroto rĩjoro ado bajiro bajirũaroja”, Jesũs ĩyire queti

(Mr 13.3-23; Lc 21.7-24; 17.22-24)

³ Tijũ bero, Olivo vãme cuti buro joejũ rujicami Jesũs. To ĩ rujirone, gãjerã ĩna mano ĩacõari, ado bajiro ĩre sẽnĩacajũ yua:

—¿Divato cagueroca ecoroti Diore yirũcũbũoriavi? ¿No bajiro ti bajisere ĩacõari, “Jesũs ejagũagũ yigũmi”, yimasirãti yua? ¿No bajiro ti bajiro ĩacõari, “Adi macarũcũro jediato yaja”, yimasirãti yua? —Jesũre yisẽnĩacajũ yua.

⁴ To bajiro yua yisere ajicōari, ado bajiro yuare cadicami Jesús:

—Roori ñaruarāja mua, “Socarāne, gājerā manire yitoroma” yirā. ⁵ Jājarā yitorā ñaruarāma, “Yune ñaja ‘Rotimorūgōrucami’ yigu, Dios ī cōagū” yirā. To bajiro ña yisocasere jājarā masa ñare ajisyaboaruarāma. ⁶ Mua tuana, to yicōari, gajeroana quēne gājerā rāca ña gāmerā siasere ajiruarāja mua. Tire ajicōari, güibetiruarāja mua. “Bajiruaroja” Dios ī yiriarore bajirone bajiruaroja. To bajiro ña gāmerā yīñaboajaquēne, adi macarucuro jediro me bajiruaroja. ⁷ Cojo sitana gaje sitana rāca gāmerā sīaruarāma. Cojo maca me ñioñaruaroja. To yicōari buto sita saberuaroja. ⁸ To bajiri, rojose tāmucosoruarāma masa. Ña tāmucose rētohusaro rojose tāmucoroana yirāma yuja.

⁹ Tirodori, gājerā, muare ñejecōari, isirearuarāma, gājerāre, “‘Rojorā ñaama’ yīlacōari, rojose ñare yato” yirā. To bajiri, gājerājua, rojose muare yigajanocōari, muare sīaruarāma. Yure ajitirūnarā mua ñajare, muare ñateruarāma adi macarucuroana jediro. ¹⁰ To bajicōari, jājarā yure ajitirūnarā, ajitirūnu tujaruarāma ña. To yicōari, yure ajitirūnarā, sīgūri, gāmerā ñateruarāma. Gājerā, ña rācanare ñatecōari, isirearuarāma ña. ¹¹ “Diore gotirētohosarimasa ñaja yua” yitorā, jājarā ñaruarāma. To bajiro ña yisocasere jājarā masa ñare ajisyaboaruarāma. ¹² Butobusa rojose rīne yirūtu vare ti ñajare, gāmerā maire quēne manibusacoaruaroja. ¹³ To bajiro ti bajiboajaquēne yure ajitirūnu

tujamenare, adi macarucuro ti jediroju, rojose tãmotujabetiriaroju ñna vaborotire ñnare yirẽtobosarucami Dios. ¹⁴ “Uju Dios yarã quẽnaro ñ yirona mna ñarujama, Jesúre ajitirũña” yire queti, adi macarucuro ñarã masa ñaro cõrone gotimasiojeo ecoruarãma. Ñna masijedicõaro berojũ adi macarucuro jediruroja.

¹⁵ Diore gotirẽtobosarimasũ Daniel ñamasir'i ado bajiro ucamasifũmi: “Adi macarucuro jedirirodo sigũ, ‘Diore rucubobeticõato ñna’ yigũ, Dios ñ bojabetire yirucami. Diore yirucuboriaviju ñ ñasere masiruarãja mna”, yucamasifũmi Daniel ñamasir'i. (Yũ, Mateo, adi papera Daniel ñ ucamasirere Jesús ñ gotisere yũucasere ñacõari, ajimasiña.) To bajiri Dios ñ bojabetire ñ yisere ñacõari, “Jerusalén maca ti jedirotirũmũ cõñaro bajiaja”, yimasiruarãja mna. ¹⁶ To bajiro bajirirũmũ Judea sitana gũtayucujũ guaro rudicoajaro ñna. ¹⁷ Sigũ ñ ya vi joeju jesaguma, rujiacõari, ñ ya vi jubeaju gajeyeũni ñasere juaátimabetirucami. ¹⁸ Gãji, veseju moañagũ, ñ ye sudire juagũ tudiatimabetirucami, rujarĩmarone yũ ejaroti ti ñajare. ¹⁹ Rõmia macũ sãñarã, ñjurã curã quẽne, rojose tãmoruarãma ñna, ñmatimabetica yirã. ²⁰ “Buto oco quedirirũmare, to yicõari, ususãjariarũmare bajibeticõato” yirã, Diore senicõa ñarũgũña. ²¹ To bajiro bajirirũmũri buto rojose tãmoruarãma masa. Adi macarucuro ñnasoriarũmũri masa rojose ñna tãmoadore rẽtoro tãmoruarãma ñna. Rojose ñna tãmoro bero, to bajise rojose tãmobetiruarãma yuja. ²² “Yoaro mebũsane rojose tãmoato masa” Dios

ĩ yibetijama, sĭgũ catirũyarocũ manibogũmi. “Yũ yarã ñaña mũa” ĩ yirere cũdiriarãre ĩamaigũ ñari, “Yoaro mebusane rojose tãmoato ĩna”, yirũcũmi Dios.

²³ To bajiro bajiñarirodorire, “Ānine ñaami ‘Rotimũorũgũrũcũmi’ yigũ, Dios ĩ cõar’i. Ejayumi” gãjerã ĩna yijama, ĩnare ajibeja mũa. To yicõari, gãjerãjũama, “Tone ñagũmi. Ejayuju” mũare ĩna yijaquẽne, ĩnare ajibeja mũa. ²⁴ Jãjarã yitorã ñarũarãma, “Yũne ñaja ‘Rotimũorũgũrũcũmi’ yigũ, Dios ĩ cõagũ” yirã, to yicõari, “Diore gotirẽtobosarimasa ñaja yũ” yirã. To bajiro yirã, ĩaĩañamani jairo yĩorũarãma, masare yitorã. To bajiro yirũarãma, “ ‘Yũ yarã ñaña mũa’ Dios ĩ yirere cũdirã quẽne, manijũare ajitirũnũato” yirã. ²⁵ Tire mũare yũ gotimasiosere quẽnaro tũoĩaña mũa. Ti bajiroto rĩjoro jediro mũare gotijeobũ yũ. ²⁶ To bajiri, “Yucũ manojũ ñagũmi, ‘Rotimũorũgũrũcũmi’ yigũ, Dios ĩ cõar’i” mũare ĩna yijama, ĩarã vabetirũarãja mũa. To yicõari, “Vi jubeajũ yayiorojũ ñagũmi, ‘Rotimũorũgũrũcũja mũ’ yigũ, Dios ĩ cõar’i” ĩna yijama, ĩnare ajitirũnũbetirũarãja mũa. ²⁷ Macarũcũro jediro bũjo ĩ yabesere masa ĩna ĩarore bajiro Dios ĩ roticõacacũ, yũ vadore yũre ĩare ñarũaroja. ²⁸ Rijar’i, ĩ boacũñarorema, yuca ejarãma ĩna —yũare yicami Jesús. ĩ

“Dios ĩ roticõacacũ tudiejarũcũja yũ”, Jesús ĩ yire queti

(Mr 13.24-37; Lc 21.25-33; 17.26-30, 34-36)

ĩ **24:28** “Yuca ejarãma, masũ boagũ ĩ ñarore” ĩ yijama, “Rojose yirãma, no bojarone ñacõarãma” yigũ yiyuju Jesús.

29 To yicōari, quēna ado bajiro yuare yicami Jesús:

—Tire rojose ĩna tãmno gajanorijaune, gaje vãme rojose bajiruaroja. Muiju ũmuaḡu asibetirucumi yuja. Namiagũ quēne busubetirucumi. Nnooa quēne vējacoaruarãma. To yicōari, õ vecayere nuḡobatorucumi Dios. 30 To bajiro ti bajiro ĩacōari, “Õ vecagũ Dios ĩ roticōagũ rujiadigũagũ yigumi”, yuare yiruãrãma masa. Yu rujiadire ĩacōari, güirã, otiruãrãma. Yu masise rãca, oco bueri vatoaju bũto yu busubatorujiadire ĩaruãrãma. 31 Õ vecaju trompeta jutise ocaruyuruaroja. To cōrone, “ Yu yarã ñaña’ Dios ĩ yirere cūdiriarãre juḡoaga soje, jũnaga soje, varuaga soje, gajecatua varuaga soje ñarã jedirore juarēoato” yigũ, ángel mesare cōarucuja yu. To yu yijare, yu yarã ñaro cōrone juarēoruãrãma ĩna —yuare yicami Jesús.

32 To yicōari, quēna ado bajiro yuare goticami Jesús:

—Gotimasiore queti muare gotigũ yaja yu. Higuera vãme cutiure tuoĩaña mu. Higuera vãme cutiũ gajecu bucuamujacōari, jũ mameaja. Tire ĩacōari, “Mojoroaca ruayaja cãma ti ejaroti”, yimasijaja mani, jud’io masa. 33 Muare yu gotisere bajiro bajisere ĩacōari, “Mojoroaca ruayaja Jesús ĩ vadiroti”, yimasiruãrãja mu. 34 Riojo muare gotijaja yu. Adirodo ñarã mu bajireajediroto rĩjoro, muare yu gotirore bajirone bajiruaroja ti. J 35 Adi macarucuro ñaro cōrone, to yicōari, õ vecaye

J 24:34 Griego masa ye rãca “esta raza” yiroma, judío mesare yiro yaja. To bajicōari, “esta generaci3n” ti yijama, adirodo ñarãre yiro yaja.

quēne jedicoaruroja. To bajiboarine, yu ocama, jedibeti m̄orūgōcōaruroja.

³⁶ “Ado cōrone ejarucami Jesús” yimasigū magūmi. Ángel mesa quēne, masimenama ĩna. Dios macu ñaboarine, “To cōro ejarucya yu”, yimasibeaja yu quēne. Yu jacu sīgūne masigūmi —yuare yicami Jesús.

³⁷ Quēna ado bajiro yuare gotirēmocami Jesús:

—Noé ñamasir'i ĩ ñariarodo masa ĩna bajiñamasiriarore bajiro bajiñararāma, Dios ĩ roticōacacu, yu tudiejarirūmure quēne. ³⁸ Adi macarucuro ti rujaroto rjoro, bare ba, idi, manajo cuti, yicōa ñamasiñujarā ĩna. Diore t̄oīari mene, “¿To bajiroado yatique?” yimenane, jairica cūmua quēnogajanocōari, Noé ĩ vasājaro ũnone to bajiro yicōa ñamasiñujarā ĩna. ³⁹ “To bajiroado yiroja” ĩna yimasibetone, ĩnare ruureacōamasiñuju Dios. To bajirone bajiruarāma masa, yu tudiejarirūmure quēne. ⁴⁰ Yu ejarirūmu juarā ũmua ĩna veseju moañaruarāma. To ĩna yīñarone, sīgū āmiecorucami. Gājima, āmiecobetirucami. ⁴¹ Rōmia juarā trigore vāiañaruarāma. To bajiri, sīgō āmiecorucocomo. Gajeoma, āmiecobetirucocomo.

⁴² To bajiro bajiroti ti ñajare, roori ñaruarāja m̄ua, “To cōrone tudiejarucami mani ũju” yare yimasimena ñari. ⁴³ Sīgū vi ũju, “Adi ñami juarudirimacu ejarucami” ĩ yimasijama, roori ñabogumi, ĩre matarū. ⁴⁴ To bajiri, “Dios ĩ roticōagū ĩ tudiejarotire mani masibetirīmarone tudiejaromi” yirā, roori ñarūgūruarāja m̄ua —yuare yicami Jesús.

“Ado bajiro bajigumi yu tudiejarotire roori

ñagũma”, Jesús ï yire queti
(Lc 12.41-48)

⁴⁵ Quēna ado bajiro yũare gotirēmocami Jesús:

—Ado bajiro bajirũcumi yũre quēnaro ajitirũnũ tũjabecũ, quēnaro tũoĩagũ: Ʋũ, gajerojũ ñagũacũ, ï varoto rĩjoro, “Yũ ya vianare yũre codebosaba” yigũ, ïre moabosarimasũre ï cũ var'ire bajiro bajigũ ñagũmi. ⁴⁶ Ʋũ, ï rotivariarore bajirone ï moayurere tudiejacõari, ï ãaejajama, quēnaro ïre yigũmi, ïre moabosarimasũre. ⁴⁷ Riojo mũare gotiaja yũ. Ʋũ ï bojarore bajirone ï yire ti ñajare, ï cũose jedirorene ïre ïatirũnũ rotigũmi. ⁴⁸⁻⁴⁹ Ado bajiro bajirũcumi yũre quēnaro ajitirũnũbecũma: Rojose yigũ ï ñajama, Ʋũ, ï vato bero, “Yoatojũ tudiejagũmi” yitũoĩagũ ñari, ï Ʋũ moabosarimasare rojose yigũmi. To yicõari, idimecũrũgũrãre baba cũticõari, ïna rãca idirũgũgũmi ï quēne. ⁵⁰ To ï yĩñarone, ï Ʋũ, tudiejagũmi. ⁵¹ Tudiejacõari, ï rotiri-arore bajiro ï yibetire ti ñajare, rojose ïre yigũmi. To bajiri “Quēnaro yirã ñaja yũ” yiboarine, ïna yirore bajiro yimena rojose ïna tãmũorore bajirone tãmũogũmi. Bũto rojose tãmũogũ ñari, guji põguẽ, oti, yigũmi —yũare yicami Jesús.

25

“Ado bajiro bajirũarãma Dios yarãma. To yicõari, ï yarã me ñarãma ado bajirojũ bajirũarãma”, Jesús ï yire queti

¹ Quēna ado bajiro yũare yicami Jesús:

—Ʋũ Dios yarã ñaronama, quēnaro ï yironama, to yicõari, ï yarã me ñaronajũama, ado bajiro bajirãre bajiro bajirũarãma: Mamarã rõmiri jũãmũcãrãco

ñarãma, mame manajo cutirocare ãre bocarã vana. To vana, ãna sãabusuore juaánama. ² Cojomocãrãco ñarãma quẽnaro tũoĩarã. To yicõari, cojomocãrãco quẽnaro tũoĩamena ñarãma. ³ Quẽnaro tũoĩamenama ãna sãabusuore juarã ñaboarine, uye ti jediro, ãna jiovasoaborotire juaámenama. ⁴ Quẽnaro tũoĩarãjũama, “Ti jediro jiorãsa mani” yirã, juaánama. ⁵ Manajo cutiroca ã ejatĩmabetijare, yoaro yubusaboa, cãnicoanama. ⁶ ãna cãniñarone, ñami gũdareco cõñaro cõro ocaruyuroja yuja: “Manajo cutiroca vadicoadiami yuja. ãre bocarã vayá”, yĩ ocaruyuroja. ⁷ Tire ajicõari, ãna sãabusuore sãarãma. ⁸ Cojomocãrãco ñarã quẽnaro tũoĩamenajũa, ado bajiro yirãma quẽnaro tũoĩarãjũare: “Yũa sãabusuore uye jedicoajũa ti. To bajiri mũa uye mojoroaca yũare ãsiña”, yiboarãma ãna. ⁹ To bajiro ãna yiboajaquẽne, ado bajiro cudirãma quẽnaro tũoĩarã: “ãsibeaja. Mũa masune uye ãsirimasa tũjũ vacõari, vaja yiaja. Mũare yũa ãsijama, manire tũjabetiboroja”, ãnare yirãma. ¹⁰ To bajiro ãna yisere ajicõari, uye vaja yirã vacoanama quẽnaro tũoĩamenajũa. ãna vato bero, manajo cutiroca ejagũmi yuja. Quẽnaro ñayuriarã rõmirima, ã ejarone, ã rãca sãjacoanama ãna, ã ãmosiaro ãarã. Sãjacõari, sojere tucõagũmi manajo cutirocajũa. ¹¹ Soje ã turiaro bero, ejaboarãma quẽnaro tũoĩamena. Sãjamasimenama. To bajiri, manajo cutirocare ado bajiro ãre yiboarãma: “Yũa uju, soje jãnaña maji”, ãre yiboarãma. ¹² To ãna yisere ajicõari, ado bajiro ãnare cudigũmi manajo cutiroca: “Riojo mũare gotiaja yũ. Yũ yarã me ñaja mũa. Mũare masibeaja yũ”, ãnare yigũmi manajo cutiroca —yũare yicami Jesús.

13 —To bajiri roori ñarũgũruarãja m̄ua, “To cõrone tudiejar̄uc̄mi” ȳure yimasimena ñari — ȳure yicami Jesús.

Moabosarimasa ñna bajirere Jesús ñ gotimasiore queti

(Lc 19.11-27)

14 Quẽna ado bajiro ȳure yicami Jesús:

—Quẽna ȳu tudiejaro, “Ñajediro ūju ñaja ȳu” yĩocõari, ȳu yarã ȳure ajitir̄un̄arã ñna yisere masicõari, moabosarimasa ūju ado bajiro ñ yiriarore bajiro bajir̄uaroja: Sĩgũ ñagũmi gaje sitaju varocu. Ñ varoto rĩjoro, ñre moabosarimasare jirẽogũmi. Ñnare jirẽocõari, ñ ye gãjoare ñnare bategũmi. “Ȳu manitoyej̄u adi gãjoa rãca vaja yicõari, m̄ua vaja yisere gãjerãre ñsirã, jaib̄usaro vaja s̄enima, ‘Jaib̄usaro gãjoa bujarãsa’ yirã”, ñnare yigũmi.

15 To bajiri, s̄igũre cinco mil ñaritiiri gãjoatiire ñre ñsigũmi. Gãjire, dos mil ñaritiiri ñsigũmi. To yicõari, gãjirema, mil ñaritiiri ñsigũmi. Ñnare ñsigajanocõari, vacoac̄mi. 16 Ūju ñ vato bero, cinco mil ñaritiiri ñsiecor'i, quẽna cinco mil ñaritiiri bujarẽmogũmi.

17 Gãji dos mil ñaritiiri ñsiecor'i, quẽna dos mil ñaritiiri bujarẽmogũmi. 18 Gãji, mil ñaritiiri ñsiecor'ima, ñ ñsiecoriario cõrone yujecũcõagũmi.

19 Yoatoju ūju tudiejagũmi quẽna. Tudiejacõari, “Gãjoa ñnare ȳu ñsicati rãca, çno bajiro ȳure yibosayujari ñna?” yis̄enĩar̄u, ñnare jigũmi quẽna.

20 Cinco mil ñaritiiri ñ ñsir'ire jis̄ogũmi. To ñ yigũ, ejacõari, ñre ñ ñsiriaro cõro t̄ogũmi. To yicõari, cinco mil ñ bujarẽmore ñre ñsigũmi. To yigũne, ado bajiro gotigũmi: “Cinco mil ñaritiiri ȳure ñsicaju m̄u. To bajiri quẽna gaje cinco mil ñaritiiri m̄ure

bujarēmobosabu yu”, ĩ ɯjɯre ĩre yigumi. ²¹ To ĩ yijare, ado bajiro ĩre ɯdigumi ĩ ɯjɯ: “Yure quēnaro moabosayuja mɯ. Yu roticatore bajirone yure ɯdiyuja mɯ. Mojoroaca mure yu ĩsicati rāca yu roticatore bajiro mɯ yire ti ñajare, ñamasuse yure yibosarɯɯɯja mɯ. Yu rāca variquēnaña”, ĩre yigumi. ²² To ĩ yiro bero, gāji, dos mil ñaritiiri ĩsiecor'i e jagumi. Ejacōari, ĩre ĩ ĩsiriaro cōro tɯogumi ĩ quēne. To yicōari, gaje dos mil ñaritiiri ĩ bujarēmomore ĩsigumi. To yigune, ado bajiro gotigumi: “Dos mil ñaritiiri yure ĩsicaju mɯ. To bajiri quēna gaje dos mil ñaritiiri mure bujarēmobosabu yu”, ĩ ɯjɯre ĩre yigumi. ²³ To ĩ yijare, ado bajiro ĩre ɯdigumi ĩ ɯjɯ: “Yure quēnaro moabosayuja mɯ. Yu roticatore bajirone yure ɯdiyuja mɯ. Mojoroaca mure yu ĩsicati rāca yu roticatore bajiro mɯ yire ti ñajare, ñamasuse yure yibosarɯɯɯja mɯ. Yu rāca variquēnaña”, ĩre yigumi.

²⁴⁻²⁵ ĩ bero ĩ ɯjɯre ĩogũ e jagumi mil ñaritiiri ĩsiecor'i: “Yu ɯjɯ, adine ñaja mɯ gājoa, yure mɯ ĩsicati. Tire yujecūcōacaju yu, mure güigu ñari, ‘Ti ɯorine yure tud'ijacagumi; bɯto roticōari ĩ bojarore bajiro yirere bojagu ñacami’ yitɯoĩagũ ñari”, ĩre yigumi. ²⁶ To bajiro ĩ yijare, ado bajiro ĩre ɯdigumi ĩ ɯjɯ: “Yu bojasere yitegu bajiyuja mɯ. Rojogu ñaja mɯ. ‘Tud'ijacagumi; bɯto roticōari ĩ bojarore bajiro yirere bojagu ñacami’ yure yitɯoĩagũ ñaboarine, quēnaro yure moabosabesuja mɯ. ²⁷ Gājoa mure yu ĩsicati rāca vaja yicōari, mɯ vaja yisere gājerāre ĩsicōari, jaibɯsaro vaja sēnibetiboarine, gājoa cūriavijua mɯ cūjama, jaibɯsaro yure bujarēmobosaboriaja mɯ”, ĩre yitud'igumi ĩ ɯjɯ. ²⁸ To bajiro ĩre yigajanocōari,

gãjerãre ado bajiro rotigumi: “Ãnire gãjoa yu ïsiboacatire ãmaña. Tire ãmacõari, diez mil ñaritiiri yure ïsigũjuare ïsiña”, ñnare yigumi ñna uju. ²⁹ To yicõari, ado bajise ñnare gotirẽmogumi: “No bojagu ñre yu ïsise rãca yu bojarore bajiro yigu, quẽnase bujarucami. Ñiejua ruyabetiruaroja ñre. No bojagu ñre yu ïsise rãca yu bojarore bajiro yibecurema, ñre yu ïsiboacatire ñre ãmarucuja yu, ‘Yu bojarore bajiro yimasibeami’ yigu. To yicõari, ñre yu ãmasere gãji yu bojarore bajiro yigujuare ïsirucuja yu. ³⁰ Ñni yure moabosarimasu ñie vaja magũre, rẽtiaroju ñre rocacõaña mu. Toju ñnacõari, buto rojose tãmuogũ ñari, guji põguẽ, oti, yirucumi”, yigumi ñna uju — yure yigoticami Jesús.

Adi macarucuro ñarãre, masare ï beserotire Jesús ï gotire queti

³¹ Ado bajiro yure goticami Jesús quẽna:

—Dios ï roticõacacu yu tudiejaru, yu rãca ejaruarãma ángel mesa. Ejacõari, masare rotigugũ, rucubũoriaju rujirucuja yu. ³² To bajicõari, “Adi macarucuroana masa ñajediro yu rĩjoroju ejaato” yigu, ángel mesare juaárotirucuja yu. To bajiro ñna yiejoro bero, yu yarãre, yu yarã mere quẽne ñamasicõari, ricati ñnare cũrucuja yu. Oveja coderimasu, ovejare ricati, cabrare ricati ï cũrore bajiro ñnare yirucuja yu. ³³ Yu yarãre yu riojojacatua cũrucuja. To yicõari, yu yarã mere yu gãsojacatua cũrucuja. ³⁴ To bajiri yu riojojacatuanare ado bajiro ñnare yirucuja yu: “Yu jacu quẽnaro ï yirã ñaja mu. To bajiri ï rãca ï ye quẽnasere bujaruarãja mu yuja. ‘To bajiro bajiruarãma’ muare yitũoĩacõari, quẽnobosacami,

adi macarucuro rujeogu. ³⁵ Yñ ñiorijaro, yñre bare ecacajñ mña. Yñ idiruarog, yñre iocajñ mña. Gajeroagñ mña masibecñ yñ ñaboajaquēne, quēnaro yñre bocaāmicajñ mña. ³⁶ Yñ sudi mano, yñre sudi sācajñ mña. Yñ rijaro, yñre ñarā ejacajñ mña. Tubiberiavi yñ ñaro, yñre ñarā ejacajñ mña”, yirñcñja yñ, yñ yarāre. ³⁷ To bajiro yñ yisere ajicōari, ado bajiro yñre sēñiñaruarāma ñna: “Yññañ, ¿Divato mñ ñiorijasere ñacōari, mñre bare ecacati yññ? ¿Divato mñ idiruarog mñre iocati yññ? ³⁸ ¿Divato gajeroagñ yññ masibecñ mñ ñaboajaquēne, quēnaro mñre bocaāmicati yññ? To yicōari, ¿divato mñ sudi mano, mñre sudi sācati yññ? ³⁹ To yicōari, ¿divato mñ tubibe ecoro, mñ rijarore quēne, mñre ñarā ejacati yññ?”, yñre yisēñiñaruarāma ñna. ⁴⁰ To bajiro ñna yisere ajicōari, ado bajiro ñnare cñdirucñja yñ: “Riojo mñare gotiaja yñ. Yñ yarāre, ‘Ñamasurā me ñaama’ ñnare yiboarine, quēnaro ñnare mña yijama, yñrene quēnaro yirā yicajñ mña”, ñnare yirñcñja yñ, yñ yarāre, yñ riojojacatuajññ ñnarāre.

⁴¹ To yicōari, yñ gñcojacaduajññ ñnarārema ado bajiro yirñcñja yñ: “Yñre cñmotadiya mña. ‘Rojose tñmñogñarāma’ Dios ñ yirā ñaja mña. ‘Jeame yatibetimejñ, rojose tñmñogñarāma vñtia, ñna aññ rāca’ Dios ñ yirñjeocatijññ vasa mña. ⁴² Yñ ñiorijaro yñre bare ecabeticajñ mña. Yñ idiruarog yñre iobeticajñ mña. ⁴³ Gajeroagñ mña masibecñ yñ ñajare, yñre bocaāmibeticajñ mña. Yñ sudi mano, yñre sudi sābeticajñ mña. Yñ rijaro quēne, tubiberiavi yñ ñaro quēne, yñre ñarā ejabeticajñ mña”, ñnare yirñcñja yñ, yñ gñcojacaduanare. ⁴⁴ To bajiro ñnare yñ yirone, ado bajiro yñre sēñiñaruarāma ñna: “¿Divato

m̄ ñiorijaro m̄re ecabeticati ȳa? ¿Divato m̄ idir̄naro, m̄re iobeticati ȳa? ¿Divato gajeroaḡm̄ ȳa masibec̄m̄ ñajare, m̄re bocām̄ibeticati ȳa? ¿M̄ sudi mano, m̄re sudi s̄abeticati ȳa? ¿Divato m̄ tubibe ecoro, m̄ rijarore qūene, m̄re ñar̄ eja-beticati ȳa?”, ȳre yis̄en̄īar̄ar̄ma ña. ⁴⁵ To bajiro ña yisere ajic̄ari, ado bajiro ñare c̄dir̄c̄ja ȳ: “Riojo m̄are gotiaja ȳ. Ñoa ȳ riojojacat̄ana ȳ yar̄re, ‘Ñamasur̄ me ñaama’ ñare yiboarine, qūenaro ñare m̄a yibetijama, ȳrene qūenaro yimena bajicaj̄m̄”, ñare yic̄dir̄c̄ja ȳ, ȳ ḡacojacet̄anare. ⁴⁶ To bajiro ñare yigajanoc̄ari, rojose ña t̄m̄ot̄jabetirotoju ñare reac̄ar̄c̄ja ȳ. To yic̄ari, ȳ yar̄j̄ama, qūenaro ña ñac̄a ñarotoju var̄ar̄ma —ȳare yicami Jesús.

26

“¿No bajiro yiḡm̄ ñaami yitoc̄ari, Jesúre ñre ñiar̄ti mani, ñre s̄ar̄ar̄?”, ña yire queti

(Mr 14.1-2; Lc 22.1-2; Jn 11.45-53)

¹ To bajiro gotigajanoc̄ari, ñ buerimasare ado bajiro ȳare yicami Jesús:

² —J̄ar̄m̄ berone ñaroado yaja Pascua boser̄m̄ ñas̄orir̄m̄. Tir̄m̄ne ȳre Dios ñ rotic̄acac̄re masare ñsiroc̄ar̄c̄mi s̄ḡ. To bajiri ȳre ñiac̄ari, yuc̄t̄eroju jajus̄ar̄ar̄ma ña —ȳare yicami Jesús.

³ Tir̄m̄ari paia ñj̄ ñamasuḡ Caifás v̄ame c̄tiḡ ya vij̄ r̄jac̄ari, t̄oñañañujar̄ buc̄r̄, paia ñjar̄ qūene:

⁴ —Jesúre s̄ar̄ar̄, ¿no bajiro yiḡm̄ ñaami yitoc̄ari, ñiarotir̄ti mani? ⁵ To bajiboarine,

boserũmu ñaro ãre mani sñajama, tire ãajũnisinicõari, manire rojose yiborãma masa —gãmerã yĩnagõñujarã ãna.

Jesús rujoare sutiquẽnasene rõmio so yuejeore queti

(Mr 14.3-9; Jn 12.1-8)

⁶ Betania vãme cuti macaju cãmi boacacũ, Simón vãme cutigu ya vijũ ñacaju yua, Jesurãca. ⁷ Ti vijũ Jesús ã barujirone, sigõ, gãta sotu alabastro vãme cuti rãca veariaru ãmiejacamo. Sutiquẽnase buto vaja cutise, nardo vãme cutise sãñaritu ñacaju tiru, so ãmiritu. To bajiri Jesús tuaca eja, ã rujoa joere ãre yuejeocamo so. ⁸ To bajiro so yisere ãcõari, jũnisinicaju yua ã buerimasa. To bajiri, ado bajiro gãmerã yicaju yua:

—¡Jairo gãjoa yireago yamo! ⁹ Tire ãsicõari, jairo gãjoa bujacõari, maioro bajirãre ejarẽmoroti ñaboaja ti —gãmerã yicaju yua.

¹⁰ To bajiro yua yisere ajicõari, ado bajiro yuare yicami Jesús:

—Sore gõjanabiobesa mua. Tire yuare so yuejeojama, quẽnaro yuare yigo yamo. ¹¹ Maioro bajirã mua rãca ñacõa ñarũgũruarãma, mua ejarẽmorona. Yuma, mua rãca ñacõa ñabetirucuja. ¹² Adio sutiquẽnase yuare so yuejeojama, yuare ãna yujeroto rĩjoro yuejeo rĩjoro cutigo yamo. ¹³ Riojo muare gotiaja yu. Yu bajiroti quẽnase quetire, adi macarucuroana jedirore gotibatoruarãma masa. To bajirone bajiruaroja sutiquẽnase yuare so yuejeose queti quẽne. So yuejeosere masiritimenane tire gotibatoruarãma —yuare yigoticami Jesús.

“Jesúre ñiatio” yigũ, ãre ãlaterã tũjũ Judas ã gotirudigũ vare queti

(Mr 14.10-11; Lc 22.3-6)

¹⁴ Jesús buerimasa juaãmo cõro, gũbo jua jẽnituarirãcũ ñacajũ yua. To bajiri yua rãcagũne Judas Iscariote vãme cãtigũ, paia ujarãre ñagõgũ varimi. ¹⁵ Ñna tũjũ ejacõari, ado bajiro ñnare sẽnĩñañuju ã:

—¿No cõro jairo yure vaja yirãda mũa, “Jesúre ñiatio” yigũ, mũare yũ gotijama? —Ñnare yisẽnĩñañuju.

To ã yisẽnĩñase ñajare, treinta ñaritiiri gãjoa ãre ãsiñujarã ñna. ¹⁶ To bajiro ñna gãmerã yiriario bero, “¿Dirĩmaro ãno Jesús ñnare ñnariotiguti yũ?”, yitũoĩacõa ññañuju ã.

Jesús ã batũsare queti

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua boserũmũ pan ũmato vauvase vũoyamani basũoriarũmũ ejacajũ ti. To bajiri Jesús buerimasa, ado bajiro ãre sẽnĩñacajũ yua:

—Pascua boserũmũ ñajare, mani barotire, ¿noju bare yua quẽnoyusere bojati mũa? —Ñre yisẽnĩñacajũ yua.

¹⁸ —Jerusalénju vasa mũa. Toju ejacõari, ado bajiro ãre yiba, vi ujure: “Manire gotimasiorimasũ ado bajiro mũre yicõami: ‘Mojeroaca ruyaja, Dios ã bojarore bajiro yũ yijeoroti. To bajiri, ã ya vijũ adi ñami Pascua boserũmũ ti ñajare, yũ buerimasare ũmato bagũ varũcũja’ mũre yicõami”, ãre yigotiba mũa —Ñnare yicami Jesús.

19 “To bajiro yiba m̄ua” Jesús ï yicatore bajirone yiyuma ña. To bajiri, Pascua boser̄um̄ yua barotire quēnoyuyuma ña.

20 Ti ñami ï buerimasa juaãmo cõro, gubo jua jēnitarir̄ac̄u ñarã barujiçaj̄u yua, Jesúr̄aca. 21 Yua bañarone, ado bajiro yuare yicami Jesús:

—Riojo m̄uare gotiaja yu. Sīgũ m̄ua r̄acagu, yure ïater̄are yure ïsirocaruc̄umi —yuare yicami Jesús.

22 To ï yisere ajicõari, buto sutiriticaj̄u yua. Tocār̄ac̄une sutiritir̄a ñari, ado bajiro ïre sēniñacaj̄u yua:

—¿Yu ūj̄u, yune ñabetiboati, m̄ure ïsirocaroc̄u? — ïre yisēniñacaj̄u yua.

23 To bajiro yua yisere ajicõari, ado bajiro yuare c̄adicami Jesús:

—Sīgũ, yu r̄aca yosebaḡu ñaami yure ïsirocaroc̄uma. 24 Dios oca masa ña ucamasire ti gotirore bajiro rojose t̄am̄uor̄uc̄aja yu, Dios ï roticõac̄u. To bajiroc̄u yu ñajare, yure ïater̄are yure ïsirocaruc̄umi. Yure ïgotiyirose suorine rojose t̄am̄uor̄uc̄aja yu. “Masare yir̄etobosaruc̄umi” Dios ï yimasire ti ñajare, bajir̄uc̄aja yu. To bajiboarine, yure gotiyiror'ij̄ama, rojose t̄am̄uor̄uc̄umi. Ruyubeticõaroc̄u ñaboayumi —yuare yicami Jesús.

25 To ï yirone, Judas, Jesúre ïsirocaroc̄u, soc̄une ado bajiro Jesúre ïre sēniñatocami:

—Gotimasiormasa, ¿yune ñabetiboati, m̄ure ïsirocaroc̄u? —ïre yisēniñacami.

To ï yirone, ado bajiro ïre c̄adicami Jesús:

—Riojo yaja m̄u —ïre yicami Jesús.

26 Yua bañarone, pan ãmicõari, “Quēnaja”, Diore ïre yicami Jesús. To yigajano, tire matocõari, ï

buerimasare yuare ĩsibatogune, ado bajiro yuare yicami:

—Bayu mna. Ti ñaja yu ruju rii —yuare yicami.

²⁷ Tire yua bagajanorone, idiriabaja amicōari, “Quēnaro yaja mñ”, Diore yicami quēna. To yicōari, tibaja yuare ĩsigune, ado bajiro yicami:

—Mna jediro adire idiya. ²⁸ Adi ñaja tirūmnaana “Rojose mani yirere masirioato” yirā, Diore rñcubnoraju joere ĩna yuejeoriarore bajiro bajise. Yucurema, yu ri’i ñaja. Ti sñorine, “Gajerodo to bajiro mñare yirucija yu” Dios ĩ yicūmasiriarore bajiro bajiruroja. To bajicōari, jājarā masa rojose ĩna yisere masiriocōari, tuditnoĭabetirucumi Dios. k ²⁹ Riojo mñare gotiaja yu. “Rotimnorġgōrucumi” yigñ, yu jacu yure ĩ cūroto rĭjoro, quēna juaji uye oco idibetirucija yu —yuare yicami Jesús.

“Jesúre masibeaja yu’ yirucija mñ”, Pedrore Jesús ĩyire queti

(Mr 14.26-31; Lc 22.31-34; Jn 13.36-38)

³⁰ To ĩ yiro bero, Diore rñcubnorā basacaju yua. Basagajano, Olivo vāme cñti buroju vacoacaju yuja. ³¹ To yua vatone, ado bajiro yuare yicami Jesús:

—Adi ñamine yure ajitirānu tñjacōari, vaveorñarāja mna jediro. Dios oca masa ĩna ucamasire to bajiro ti gotijare, to bajise mñare yaja yu. Ado bajiro gotiaja ti: “Oveja coderimasure bajiro bajigure sñarucija yu. To bajiri ĩ yarā ovejare bajiro bajirā rudibatecoarñarāma”, yigotiaja Dios

k **26:28** “Yu bojarore bajiro mna uijama, quēnaro mñare yirucija yu” masare Dios ĩ yicūmasire yiruro yaja pacto ti uijama.

oca masa ñna ucamasire, manire gotiro. ³² Yure mña vaveoboajaquêne, yure ñna sïaro bero, quëna tudicaticõari, Galilea sitajm mña vato, ymjua mña rïjoro ñatujarucuja —yure yicami Jesús.

³³ To ñ yisere ajicõari, ado bajiro ñre yicami Pedro:

—Ñnoa jediro, mure ñna vaveoboajaquêne, mure vaveobetirucuja yma —Jesure ñre yicami.

³⁴ To ñ yisere ajicõari, ado bajiro ñre cudicami Jesús:

—Riojo mure gotiaja ym. Adi ñami busiyujua gãjabocm ñ ñagõroto rïjoro, idiaji, “Jesure masibeaja; ñ rãcagm me ñaja ym”, yisocarucuja m —Pedrore ñre yicami.

³⁵ To bajiro ñ yisere ajicõari, ado bajiro cudicami Pedro:

—Mm rãca yure ñna sïarujajaquêne, “Jesurãcagm me ñaja ym”, yisocabetirucuja ym —Jesure yicami Pedro.

To bajiro Pedro ñ yisere ajicõari, yma quêne to bajiro yijedicõacajm.

Getseman'i vãme cutojm Jesús ñ jacure ñ sënigũ vare queti

(Mr 14.32-42; Lc 22.39-46)

³⁶ To yma yiro bero, Getseman'i vãme cutojm yure ñmato vacami Jesús. Tojm ejacõari, ado bajiro yure goticami Jesús:

—Õjm Diore sëñigucm yaja ym. To ym vatoye, ado rujicõañna mña maji —yure yicami.

³⁷ To yi vacune, Pedrore, to yicõari, Zebedeo rïare jmarãjurene ji vacami Jesús. To yi vacune, buto tnoïasutiriticami yuja. ³⁸ To bajiro bajigune, ado bajiro yiyuju Jesús, ñ rãca variarãre:

—Buto t̄oõas̄utiritiaja ȳu. S̄utiriosene ȳure s̄iaro yaja. Adone ȳure yuñaña maji. Ȳu c̄anibetore bajirone c̄anibeja m̄ua quēne, Diore s̄eniñarã —Inare yiyuju Jesús.

³⁹ To yic̄õari, to soj̄uab̄usa var̄ẽmoñuju Jesús. Va, sita t̄ucuroj̄u murocac̄uc̄õari, Diore s̄eniñuju Ì:

—Cac̄u, ȳure Ìna s̄iarotire matamasiaja m̄u. To bajiboarine, m̄u bojarore bajirone bajiato —Diore yiyuju.

⁴⁰ To yigajano, Pedro mesa Ìna c̄anitoyene Ìna t̄uj̄u ejayuju. Ìnare yujioc̄õari, ado bajise Pedrore Ìre yiyuju Jesús:

—¿No yirã cojo hora c̄õro c̄anibetib̄usarãne, ȳure yuñabetimasuc̄õati m̄ua? ⁴¹ Ȳu c̄anibetore bajirone c̄anibesa m̄ua quēne. To bajic̄õari, Diore s̄eniña, “V̄ãtia ẽj̄u Satanás Ì yirotisere yic̄õari, Dios Ì bojabetire yirobe” yirã. Quēnaro m̄uare masiaja ȳu. “Dios Ì bojasere yir̄uc̄aja” yirã ñaboarine, cojojirema rojose us̄ari cutirã ñari, Dios Ì bojabetij̄uare yirũgũaja m̄ua —Pedro mesare Ìnare yiyuju Jesús.

⁴² To yic̄õari, gãme vac̄u, ado bajiro Diore s̄eniñuju Jesús:

—Cac̄u, ȳure Ìna s̄iaroti matamasiaja m̄u. To bajiboarine, m̄u bojarore bajirone bajiato —Diore yis̄eniñuju.

⁴³ To yigajano vac̄une, c̄aniariarãre Ìnare ejayuju quēna. Buto v̄h̄jaejarã ñari, c̄aniñujarã Ìna. ⁴⁴ To bajiri r̄ijoro Ìnare Ì yiriarore bajirone Ìnare yic̄õa, Diore s̄enigũ vacoasuju quēna. To ejac̄õari, r̄ijoro Diore Ì s̄eniriarore bajirone Ìre s̄eniñuju quēna.

⁴⁵ Diore s̄enigũ var̄'i, tudiejac̄õari ȳuare yujiocami:

—¿No yirã cãni manicõati mũa maji? Ado cõrone Dios ï roticõacacũre rojose yirãre yũre ïsirocarocũ vadicoagũmi yuja. ⁴⁶ To bajiri yujiya mũa. Ìre bocarã vajaro. Yũre ïsirocarocũ vadiami yuja — yũare yicami Jesús.

Jesúre ïna ñiare queti

(Mr 14.43-50; Lc 22.47-53; Jn 18.2-11)

⁴⁷ To bajiro Jesús yũare ï yiñarirĩmarone, Judas Iscariote vãme cõtigu, yũa rãcagũne, vadicami yuja. Jãjarã ï rãca vadicama jariaseri cũorã, gãjerã yucãjuriri cũorã. Bũcũrã, paia ujarã quẽne ïna cõariarã ñacama ïna. ⁴⁸ Jẽre ado bajiro goti vadiruyuyumi Judas, ï rãca vanare, “ Ìne ñaami Jesús’ yĩamasiato ïna” yigũ:

—Jesúre sênicõari, ïre usurucũja yũ. To yũ yirone, ïre ñiama mũa — ïnare yi vadiruyuyumi.

⁴⁹ To bajiro yir’i ñari, Jesús rĩjorojũa ejacõari, ado bajiro ïre yicami Judas:

—Gotimasiorimasũ, ¿ñati mũ? — ïre yigũne, usu-cami.

⁵⁰ To ï yirone, ado bajiro yicami Jesús:

—“To bajiro yirãsa mani” ïnare mũ ùmato yivadiriarore bajiro yiya mũ — ïre yicami Jesús.

To ï yirone, ïre ñiacama Judas rãca vadiriarã.

⁵¹ To ïna yirone, sīgũ Jesúrãcagũ, ï jariase yoveaãmicõari, paia uju ñamasugũre moabosarimasũre gãmoro jatarocacõacami. ⁵² To ï yisere ïacõari, ado bajiro ïre yicami Jesús:

—Mũ jariasere tudisuacõaña quẽna. “Jariase rãca gãmerã quẽarãma, tiase rãcane sĩaecorũarãma”, yimasiaja mani. ⁵³ Ado cõrone yũ jacure yũ sênijama, setenta y dos mil ñarã ángel mesare

cõamasicõagũmi. ¿Tire masibeati mũ? ⁵⁴ To bajiboarine, ñnare ñre yũ sēnijama, Dios oca masa ñna ucamasire, “To bajiro bajirũaroja” ñna yimasiriarore bajiro bajibetiboroja. To bajiri tire ñre sēnibeaja yũ —Ñre yicami Jesús.

⁵⁵ To yicõari, ñre ñnarã ejarãjũare ado bajiro yicami Jesús:

—¿No yirã gajeyeũni juarudirimasũre ñnarã vanare bajiro jariaseri rãca, yucũjuriri rãca yũre ñnarã vadiati mũa? Tocãrãcarũmũne Diore yirũcũbũoriavijũ mũa ñnaro mũare gotimasio rujirũgũmũ yũ. To yũ bajiboajaquẽne yũre ñiabetirũgũmũ mũa maji. ⁵⁶ Diore gotirẽtobosarimasa, ado bajiro yũre mũa yiro tirene ucamasiñuma. To bajiri to bajirone yũre yaja mũa —Ñnare yicami Jesús, ñre ñnarã ejarãre.

Jesũre ñna ñnasere ñacõari, ũmarudijedicoacajũ yũa.

“Mũ ye sũorine rojose tãmũorũcũja mũ”, jud'io masa ñjarã, Jesũre ñna yire queti

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesũre ñnacõari, paia mũ ñnamasugũ Caifãs vãme cutigũ tũju ñre ãmiasujarã. Toju rẽjacõari, ñnañujarã Dios ñ rotimasire gotimasiorimasa, to yicõari, bũcũrã quẽne. ⁵⁸ Jesũre ñna ãmivato, sõjũ yayiĩasũyayuju Pedro. Ñnare yayiĩasũyacõari, paia mũ ñnamasugũ ya vi, ta biberiasãniro rẽtosãjacoasuju. Sãjacõari, Diore yirũcũbũoriavi coderimasa rãca rujiyuju ñ. “No bajiro Jesũre ñna yigajano vato ñagũsa” yigũ, toju bocaĩarujiyuju.

⁵⁹ Paia ñjarã, to yicõari, gãjerã ñjarã, ñna jediro, Jesũre sãrũayujarã. To bajiro yirã ñari, “Rojose

masu yigũ ñaami Jesús” yisocarõnare macañujarã ñna. ⁶⁰ Jãjarã masa socarãne ñna gotiboajaquẽne, to bajiro ñna yisere ajicõari, “To bajiro ñ yire ñajare, ñre sãaroti ñaja”, yimasibesujarã ñna maji.

To bajiboarine, jmarã ejayujarã ñna. ⁶¹ Ejacõari, ado bajiro socarãne gotiyujarã:

—“Diore yirũcũbũoriavire caguerocamasiaja yũ. To yicõari, idiarũmũ tũsatirũmũne bũajeocõamasiaja”, yicami ãni —yiyujarã ñna.

⁶² To ñna yirone, paia mũjũ ñamasugũ, vũmũrũgũcõari ado bajiro Jesúre yiyuju:

—To bajiro mũre ñna yi ocasãsere, ¿no bajiro yati mũ? ¿cũdibeati mũ? —Jesúre ñre yiboayuju.

⁶³ To ñ yiboajaquẽne, cojo vãme cũdibeticõañuju. Ñ cũdibetire ñacõari, ado bajiro Jesúre yiyuju paia mũjũ ñamasugũ:

—Quẽnaro riojo yũare cũdiya mũ. Mũ socajama, rojose mũre yirũcũmi Dios. ¿“Rotimũorũgõrũcũmi” yigũ, Dios ñ cõar'ine, Dios macũne ñati mũ? —Jesúre ñre yisẽniãañuju paia mũjũ ñamasugũ.

⁶⁴ To bajiro ñ yisere ajicõari, ado bajiro ñre cũdiyuju Jesús:

—Mũ yirore bajirone bajiaja. Ñne ñaja yũ. To bajiri, Dios ñ roticõacacũ ñari, yoaro mene ñ rio-jojacatũa rujicõari, masare beseguagũ oco bueri vatoaja yũ rujiadire ñarũarãja mũa, —paia mũjũ ñamasugũre yiyuju Jesús.

⁶⁵ To bajiro Jesús ñ yisere ajitegũ ñari, ñ sudire tũavoyuju paia mũjũ ñamasugũ. To yigũne, ado bajiro ñ rãcanare yiyuju:

—¡To bajiro ĩ ñagõjama, Diore rãcũbũobecũ yami! ¡“Diore bajiro bajigũ ñaja yũ” yigũ yami! No yirã gãjerã, “Rojose yigũ ñaami” yironare macarēmomenaja mani yuja. Mũa quēne, Diore rãcũbũobecũ ĩ yisere ajaaja mũa. ⁶⁶ To bajiro ĩ yisere ajicõari, ¿no bajiro ĩre yiroti ñati? —ĩ rãcanare yiyuju paia mũjũ ñamasugũ.

To bajiro ĩ yisere ajicõari, ado bajiro ĩre cũdiyujarã:

—Rojose masu yicõami. ĩre sãacõaroti ñaja —yicũdiyujarã.

⁶⁷ To yicõari, Jesús riogare gooco eoreatuyujarã ĩna. To yicõari, ĩ cajere siabibecõari, ĩre jayujarã.

⁶⁸ To yicõari,

—“ ‘Rotimũorũgõrũcũmi’ yigũ, Dios ĩ cõagũ ñaja yũ” mũ yijama, mũ masise rãca, “Ĩ, yũre jami”, yũare yiya —Jesúre yitud'iyujarã.

“Jesúre masibeaja yũ”, Pedro ĩyire queti

(Mr 14.66-72; Lc 22.56-62; Jn 18.15-18, 25-27)

⁶⁹ Vi jubeajũ Jesúre rojose ĩna yiñarone, macajũjũa rujicõañuju Pedro. Sígõ paia mũjũ ñamasugũre moabosarimaso, Pedro tũ ejacõari, ado bajiro ĩre yiyuju:

—Jesús, Galilea sitagũ rãca vacudirũgũgũne ñagũja mũ quēne —ĩre yiyuju so.

⁷⁰ To bajiro so yisere ajicõari, masa jediro ĩna ajiro rĩjorojũa ado bajiro yiyuju Pedro:

—“Riõjo yaja mũ”, mũre yimasibeaja yũ —sore yiyuju Pedro.

⁷¹ To bajiro sore yicũdicõa, ta biberiasãniro sãjariasoje tũ vasuju Pedro. To ĩ vatone, gajeo ĩre ĩacõari, ado bajiro yiyuju:

—Ñani, Jesús Nazaret macagũ rãca vacudigu ñaami
—yiyuju, gãjerãre gotigo.

⁷² To bajiro ñnare so yisere ajicõari, ado bajiro
yiyuju Pedro:

—Ïre masibeaja yũ. Socũ me yaja yũ. Dios quẽne
yũre ajigũmi —ñnare yiyuju Pedro.

⁷³ To ï yigotiriaro bero yoatobũsa, to ñnarã ado
bajiro Pedrore gotiyujarã:

—Riojo yaja yũa. Jesũrãca vacudirũgũgũne ñaja
mũ. Ñna ñagõsere bajirone ñagõaja mũ —Pedrore ïre
yiyujarã ñna.

⁷⁴ —Ïre masibeaja yũ. Socũ me yaja. Dios yũre
ajigũmi —ñnare yiyuju Pedro.

To bajiro ï yigajanorirĩmarone, gãjabocũ
ñagõcõañuju yuja. ⁷⁵ Ï ñagõsere ajicõari, Jesús ado
bajise ïre ï gotirere masibũjayuju Pedro yuja:
“Gãjabocũ ï ñagõroto rĩjoro, idiaji, ‘Jesũre masibeaja
yũ’ yirũcũja mũ” ïre ï yirere masibũjayuju. Tire
masibũjacõari, vacoasuju. Vacõari, bũto otiyuju.

27

Pilato tũju Jesũre ñna ãmiejare queti (Mr 15.1; Lc 23.1-2; Jn 18.28-32)

¹ Busuro bero, bũcurã, paia mũjarã quẽne, ñna
jediro tudirẽjañujarã ñna. To bajicõari, “Ado ba-
jiro mani yijama, Jesũre sũarũarãma”, yitũoĩañujarã
ñna. ² To bajiro yirã ñnari, Jesús ãmorire siacõari
ïre ãmiasujarã ñna, Pilato vãme cutigũ ya vijũ vana.
Jud'io masa mũjũ ñamasugũ, romano masũ ñañuju
Pilato. To bajiri ï ya vijũ Jesũre ãmiejayujarã.

*Judas ĩ masune ĩ sĭayayire queti
(Hch 1.18)*

³ Judas, Jesúre ĩsirocacacũ, “Jesúre sĭaroti ñaja” ĩna yisere ajicõari, “Rojose yibũ yũ”, yitũoĭa sutiritiyuju. To bajigũ ñari, bũcũrã, paia ujarã quẽne, Diore yirũcũbũoriavijũ ñarãre, ĩnare ejacõari, gãjoatiiri treinta ñaritiiri ĩre ĩna ĩsiboarere ĩnare tũocõañuju. ⁴ Gãjoatiirire ĩnare ĩsigũne, ado bajiro ĩnare yiyuju ĩ:

—Rojose yibũ yũ. Ñie rojose yibecũrene mũare ĩsirocacõañuja yũ —ĩnare yiyuju.

To bajiro ĩ yiboajaquẽne, ado bajiro ĩre cũdiyujarã ĩna:

—To bajiro yũare mũ yiboajaquẽne, no yibeaja yũarema. Mũre bajiroja —Judare ĩre yiyujarã ĩna.

⁵ To ĩna yisere ajicõari, ti vijũ gãjoatiiri ĩ ĩsiecoboarere reabateyuju Judas. To yi, gajano vacũne, yucũjũ mũjacõari, ti rũjũ misimare siatucõari, ĩ ãmũare quẽne siatu, quediroyo rijacoasuju.

⁶ Diore yirũcũbũoriavijũ gãjoatiiri Judas ĩ re-abaterere juarẽoñujarã ĩna, paia ujarã. Tire juarẽocõari, ado bajiro yiyujarã:

—Adi gãjoa mani vaja yise suorine sĭgũre sĭaroana yaja. To bajiri Diore yirũcũbũoriavi boarijauřire quẽnorũarã, vaja yiroti gãjoa sãriajure sãbetiroti ñaroja —yiyujarã ĩna.

⁷ To bajiro yitũoĭacõari, “Riri sotari vearimasũ sitare vaja yito mani. Ti sita ñarũaroja gajeroanare bajirearãre mani yujeroti sita”, yitũoĭañujarã ĩna yuja. ⁸ To bajiri ti sita vaja yirũarã, “Jesúre sĭato mani” yirã, Judare ĩna ĩsiboare rãca ĩna vaja yire ñari, adirũmũri quẽne, Ri'i Vese vãme

cuticōa ñaja. ⁹⁻¹⁰ To bajiro ñna yijama, tirãmujũ Diore gotirẽtobosarimasũ Jerem'ias ñamasir'i ñ ucamasiriarore bajirone bajiyuju. Ado bajiro ucamasiñuju ñ: “ ‘Ado cõro vaja cutiami sīgũ ãmũ’ yitũoĩarã ñari, ñre ñsir'ire treinta gãjoatiiri ñna vaja yiboarere juacõari, riri sotũri vearimasũ sitare vaja yirũarãma ñna, Israel ñamasir'i jãnerabatia. To bajiro ñna yijama, Dios ñ bojarore bajiro yirã yirũarãma”, yucamasiñuju Jerem'ias ñamasir'i.

Jesũre Pilato ñ sãnĩare queti
(Mr 15.2-5; Lc 23.3-5; Jn 18.33-38)

¹¹ Ti sitana ujũ ñamasugũ, romano masũ ñaũuju Pilato vãme cutigũ. To bajiri ñ tujũ Jesũre ãmiasujarã ñna. ñre ñna ãmiejaro ñacõari, ado bajiro sãnĩañuju Pilato:

—¿Mũne ñati jud'io masa ujũ? —Jesũre yiyuju Pilato.

To bajiro ñ yisere ajicõari, ado bajiro ñre cãdiyuju Jesũs:

—Mũ yirore bajirone bajaiaja yũ —ñre yiyuju.

¹² To bajiro Jesũs ñ yisere ajicõari, bũcũrã, paia ujarã quẽne, “Rojose yigũ ñaami Jesũs” Pilatore ñre ñna yi ocasãboajaquẽne, ñnare ñagõcũdibesuju Jesũs.

¹³ To bajiro Jesũre ñna yi ocasãsere ajicõari, Jesũre tudisãnĩañuju Pilato:

—¿To bajiro mũre ñna yisere ajibeati mũ? — Jesũre yiyuju Pilato.

¹⁴ To bajiro ñre ñ yisãnĩãboajaquẽne, ñre cãdibeticõañuju Jesũs. ñ cãdibetire ñacõari, no yimasibesuju Pilato, ñre bajiro bajigure ñabetirũgũr'i ñari.

*“Jesúre s̄aroti ñaja”, ña yire queti
(Mr 15.6-20; Lc 23.13-25; Jn 18.38–19.16)*

¹⁵ Tocārāca cūma, Pascua boserūm jud'io masa ña quēnojama, sīgū, tubibe ecor'ire ña burotigūre ñnare bubosarūgūñuju Pilato. ¹⁶ Tubiberiavijū ñañuju sīgū, masa jediro ña masigū Barrabás vāme cūtigū. ¹⁷ To bajiri ī yirūgūriarore bajiro yigū, masa ña rējarore ĩacōari, ado bajiro ñnare sēniñañuju Pilato:

—¿Ñimūjūare yū busere bojati mūa? ¿Jesús Barrabás vāme cūtigūjūare bugutique yū? ĩre yū bubetijama, ¿“ ‘Rotimūorūgōrūcūmi’ yigū, Dios ī cōar'i ñaami Jesús” masa ña yigūjūare bugutique yū? —ñnare yisēniñañuju Pilato.

¹⁸ “Jesúre ĩajūnisinirā ñari, yūre ĩsima” yitūoĭagū, to bajiro yiyuju Pilato, Jesúre burū.

¹⁹ Oca ña ñagōquēnorijūjū ī rujiro, ī manajo ĩre queti cōañuju: “Rojose ĩre yibesa. Ñie rojose yigū me ñagūmi. To bajiro ī yiecoroto rĭjoro gūiose cājiriamū yū”, ĩre yicōañuju, so manajūre.

²⁰ Bucārā, paia ūjarā quēne ado bajiro tijū rējarāre masare, “Ado bajiro yiya”, ñnare yirotiyujarā ña:

—“Barrabájūare bucōari, Jesújūare s̄arotiya mū”, ĩre yiya mūa —ñnare yirotiyujarā ña.

²¹ Quēna ado bajiro tudisēniñañuju Pilato:

—¿Ñimūjūare yū busere bojati mūa? —ñnare yisēniñañuju.

To bajiro ī yisere ajicōari, ado bajiro ĩre cūdiyujarā ña:

—Barrabájūare mū busere bojaja yūa — yiyujarā ña, Pilatore.

22 To ñna yisere ajicōari, ado bajiro ñnare sēniñañuju Pilato:

—To yijama, ¿no bajiro yiguti yu Jesúre, “ ‘Rotimurōgōrucija mu’ yigu, Dios ĩ cōar'i ñnaami” masa ñna yiguarema? —ñnare yisēniñañuju.

To ĩ yirone, ñna ñnaro cōrone ado bajiro ñre avasācūdiyujarā:

—¡Yucátēroju ñre jajusīaroticōaña mu! —ñre yiasasā cūdiyujarā ñna.

23 To ñna yijare, ado bajiro ñnare sēniñañuju Pilato:

—¿Ñie rojose ĩ yire suorī ñre sīarotiguti yu? —ñnare yiyuju Pilato.

To ĩ yiboajaquēne, quēna butobusa tudiavasāñujarā ñna:

—¡Yucátēroju ñre jajusīaroticōaña! —yiasasāñujarā ñna.

24 To bajiro ñna yijare, no yimasibetiboacu, ado bajiro tuōiñañuju Pilato: “No bajiro yicōari, ñre bu-masibecija yu. ñna bojarore bajiro yu yibetijama, avasātujabeticōari, rojose yijacarāma ñna”, yitūōiñañuju. To bajiro tuōiacōari, oco juarotiyuju ĩ. To yicōari, ado bajiro ñnare gotiyuju:

—Mna ĩaro rījoroju yu āmorire coeñoaja yu, “Ñni rojose yibecure sīaruabeaja yuma” yigu. To bajiri mna masune mna sīarotijama, quēnacōaroja. To bajiro mna yijama, mne suorī cūtiruarāja mna —ñnare yiyuju ĩ.

25 To ĩ yisere ajicōari, masa ñnadediro ñre cūdiyujarā:

—Yua masiaja. ¡Yua, yua rīa quēne suorī cūtiruarāja, ñre yua sīarotijama! —ñre yicūdiyujarā ñna.

²⁶ To bajiro ñna yijare, Barrabáre bucōañuju Pilato. Jesújuarema, ñ surarare ñsiñuju, “Ñre bajecōari, yucútēroju ñre jajusĩato ñna” yigu.

²⁷ To bajiri ñna ya vijua Jesúre ãmiejayujarã surara mesa. Ñre ãmiejacōari, ñna jediro ñre gãnibiarũgũñujarã. ²⁸ To yicōari, “Ujũre bajigu ñato” yirã, ado bajiro Jesúre yiyujarã: Jesús ñ sudi sãñasere vejecōari, ujarã ñna sãñarito ùnore, sũarivujorore ñre sãñujarã. ²⁹ To yicōari, ñ rũjoa joere jotabedo ñna suariabedone ñre jeoyujarã. To yicōari, riojojacatuaga ãmore, yucú, uju ñ cœoricœure ñre ñsiñujarã. To bajiro ñre yicōari, ñ rĩjorojuã gũsomuniari tuetucōari, ado bajiro ñre yiajatud'iyujarã:

—Jud'io masa ujuure mure quēnarotiaja yua yuja
—Jesúre yiyujarã ñna.

³⁰ To yirãne, gooco ñre eoreatuyujarã ñna. To yicōari, ñ cœoricœure êmacōari, ñ rũjoare jayujarã ñna. ³¹ To bajiro ñre yigajanocōari, ujarã ñna sãñarito ùnore ñna sãriarore ñre veayujarã ñna quēna. To yicōari, ñ sudijua ñre sãñujarã quēna. Ñre sudi sãgajanocōari, yucútēroju jajusĩaroana ñre ãmiasujarã.

Yucútēroju Jesúre ñna jajusĩare queti
(Mr 15.21-32; Lc 23.26-43; Jn 19.17-27)

³² Ñre ãmivanane, sĩgũ Cirene vãme cuti sitagu, Simón vãme cutigure bocacama ñna. Ñre bocacōari, “Jesús ñ gaja vatijãire ñre gajabosaya”, ñre yi vacama ñna.

³³ To yi vanane, Gólgota vãme cuti buroju eja-cama ñna. “Rũjoco Buro” yire ùni ñacaju “Gólgota” yire. ³⁴ Toju eja-cōari, uye ocore, sũese rãca vœocōari

Jesúre ìre iocama ìna. “Ìre jũnise jũni ruyubeticõato” yirà, yiboacama. Tire idiĩaboa yicõacami Jesús.

³⁵ Yucátẽroju Jesúsre ìre jajutugajanocõari, “Ñimujua ì sudire ì ujarò ìarãsa mani” yirà, gũtarine reacũa ajeñacama. ³⁶ To yiajegajanocõari, ìre code rujicama ìna.

³⁷ Jesús ì tuyaritẽrojure ì rujoa vecare ucaturiaju tuyacaju. “Ado bajiro ì yise sũorine jaju ecoami” yĩoriju ñacaju. Ado bajise goticaju: “Ãni ñaami Jesús, jud'io masa uju”, yigoticaju ti.

³⁸ Jesúrãca juarã, jaju ecocama. Gajeyeũni juarudirimasa ñacama ìna. Sĩgũre ì riojojacatua, gãjire ì gãcojacatua ìnare jajutucama ìna. ³⁹⁻⁴⁰ Masa rẽtoana, ìna rujoarire yure, yure yicama, “Jaju ecor'ire ìre ìateaja” yirà. To yicõari, ado bajiro ìre ajatud'icama ìna:

—Ado bajiro yiboacaju mu: “Diore yirũcũboriavire caguerocamasiaja yu. To yicõari, idiarũmu tusatirũmune buajeocõamasiaja”, yiboacaju mu. To bajiri “Dios macu ñaja yu” mu yisocabetijama, mu yimasise rãca mu masune yucátẽrojure rujicoaya —ìre yiajatud'icama ìna.

⁴¹ Bũcũrã, paia ujarã, Dios ì rotimasire gotimasiõrimasa quẽne, to bajirone Jesúsre yiajatud'i ñacama ìna. Ado bajiro yicama:

⁴² —Gãjerãrema catiogũ ñaboarine, ì masu rojose ì tãmuõserema yirẽtomasibeami —yiajatud'icama. —Israel ñamasir'i jãnerabatia uju ñaami. To bajiri yucátẽrojure rujicoadiato. To bajiro ì bajiro ìacõari, “Ìne ñaami”, yimasiruarãja —yiajatud'icama.

⁴³ —“Dios macu ñaja yu. Yure ejarẽmorũcũmi”,

yirũgũmi. To bajiri ã macũne ã ñajama, ãre ãamaigũ ñari, ãre yirẽtobosato Dios —yiajatud'icama ãna.

⁴⁴ Juarã Jesurãca yucãtẽroju jaju ecoriarã quẽne, to bajirone Jesure yitud'icama.

Jesús ã usutadire queti

(Mr 15.33-41; Lc 23.44-49; Jn 19.28-30; He 10.20)

⁴⁵ Umurecaji ñarone, rẽtiacoacaju yuja. Idia hora rẽtiacaju. ⁴⁶ To cõro ti rẽtiatusatone, ado bajiro tutuaro avasãcami Jesús:

—El'i, El'i, ¿lema sabactani? —yivasãcami. “Dios, yu jacũ, ¿no yigu yure cãmotadiati mu?” yire ũni ñacaju ti, ã avasãcati.

⁴⁷ Sĩgũri toju ñarã ã avasãsere ajicõari, ado bajiro yicama ãna:

—Diore gotirẽtobosarimasu El'ias ñamasir'ire jigũ yami ã —yicama ãna.

⁴⁸ To bajiro Jesús ã yivasãrone, sĩgũ, Jesús tu ũmaejacõari, uye oco jiarere ñiabiãõari, yucũ gajaju siatucõari, Jesús rise tãjure ñumotuboacami. ⁴⁹ To bajiro ã yiboajaquẽne, ado bajiro yicama gãjerãjuã:

—Yibesa mu. Tone bajicõato. Rojose ã tãmuosere yirẽtobosagu El'ias ñamasir'i ã ejasere ãarãsa mani —yicama ãna.

⁵⁰ Tutuaro avasãtusa, usutadicoacami yuja.

⁵¹ Tirĩmarone Diore yirãcũbũoriavi yotoria gasero vorujijedicoasuju ti. “Dios ã ñarisõa vãme cuti sõare sãjamasibeama masa” yirã, ãna yotoria gasero ñacaju. To yicõari, sita sabecaju. Gãta quẽne caguevẽjacoacaju. ⁵² To bajicõari, masare yujeriaviri quẽne jãnacuasuja. To bajicõari jãjarã rijariarã Diore ajitũrũnũriarã tudicaticoasuma. ⁵³ Tudicaticõari, ti virire

budicoasuma. Budiacõari, Jesús ï tudicatiro bero, Jerusalénjũ Dios ï beseria maca ñamasuri macajũre ñna vacudisere ñacama jãjarã masa.

⁵⁴ Jesús yucátẽrojũ ï tuyarore, codeñacama surara, ñna uju rãca. To bajiñarã, sita sabesere, gajeye güiose bajisere ñacõari, bũto güicama ñna. To bajiri ado bajiro yicama:

—Socabesumi. Dios macũne ñaboayumi ñni — yicama ñna.

⁵⁵ Galilea sitajũ Jesúre suyavadicana rõmiri jãjarã sõjũ ñarũgõcama. ñna ñacama ñre ejarẽmorũgũcana.

⁵⁶ ñna rãca ñacamo Mar'ia Magdalena. Gajeo Mar'ia vãme cõtigo quẽne ñacamo. Sone ñacamo Santiago, to yicõari, José jaco. Zebedeo ñamasicacũ rĩa jaco quẽne ñacamo.

Jesúre ñna yujere queti

(Mr 15.42-47; Lc 23.50-56; Jn 19.38-42)

⁵⁷ Rãioroto rĩjoro José vãme cõtigu, Arimatea macagũ Jesús rujũre ñagũ ejayuju. Gãjoa jaigũ ñacami. To bajicõari, Jesúre ajitirãnũrũgũcacũ ñacami. ⁵⁸ To ï bajiro bero, Jesús rujũre ñmirũ, Pilatore sãnigũ vasuju. ñre ï sãnirore bajirone ñre cãdiyuju Pilato. ⁵⁹ To bajiro ï yir'i ñari, Jesús rujũre rujioagũ vasuju. ñre rujiocõari, sudijãiri botiquẽnarijãirine ñre gũmañuju. ⁶⁰ To yigajanocõari, masa yujeriavi gũtavi mame ï quẽnorotiriavijũ ï rujũre cũñuju. To yicõari, ti vi sojere gũtane tũnuo bibecũ, vacoasuju. ⁶¹ To bajiro ï yĩñaro ñañariarãjũne masa yujeriavi rĩjorojũa, Mar'ia Magdalena, gajeo Mar'ia quẽne, rujicõañujarã ñna.

Jesúre, ñna yujeriavire ñna codere queti

⁶² Gajerãmũ ñañuju ususãjariarãmũ. Tirãmune paia ɱjarã, fariseo masa quêne, Pilatore ñagõrã vasujarã ñna. ⁶³ Ì tũ ejacõari, ado bajiro ñre yiyujarã ñna:

—Yua ɱju, ajiya. Socarimasũ ì yisocacatire masibɱjabũ yua. “Idiarãmũ tusatirãmune quêna tudicatirɱcɱja yũ”, yisocacami, ì sãacoroto rĩjoro. ⁶⁴ To bajiri ì rujurire ñna yujeriavi soje tũre surarare coderoticõaña, “Ì buerimasa ì rujurire ãmirudiroma” yigũ. Ì rujurire ñna ãmijama, “Rijar'i ñaboarine, quêna tudicaticoami”, yisocarɱarãma ñna. Ì rijaroto rĩjoro, “Ì rotimũorũgõrotire yigũ, Dios ì cõacacũ, jud'io masa ɱju ñaja yũ” ì yisocacati ti ñajare, quênabeaja. To bajiri, “Tudicaticoami” ñna yisocajama, quênabetimasucõarũaroja —Pilatore yiyujarã ñna.

⁶⁵ To ñna yisere ajicõari, ado bajiro cãdiyuju Pilato:

—Mũare yũ ñsicanarene coderotiya mũa —Ñnare yicãdiyuju Pilato.

⁶⁶ To ì yisere ajicõari, Jesús rujurire ñna yujeriavire coderotiyujarã ñna. To yicõari, gũta sojere quênaro bibequênoñujarã ñna, “Ì rujurire ãmirã ñna jãñajama, ñamasirãsa mani” yirã.

28

Jesús ì tudicature queti

(Mr 16.1-8; Lc 24.1-12; Jn 20.1-10)

¹ Ususãjariarãmũ ti jediro, quêna moasũoriarãmũ ti busumɱjado, Mar'ia Magdalena, gajeo Mar'ia quêne, Jesús rujurire ñna yujeriavire ñarã vacama

ĩna. ² To ĩna vatone, bũto sita sabeyuju. To ti bajirone, sĭgũ ángel rujiejayuju. Rujiejacõari, Jesúre ĩna yujeriavire gũtane ĩna bibeboariare jãnañuju. To yicõari, tia joene rujiyuju. ³ Bũjo ĩ yabesere bajiro yaayuju ĩ. ĩ sudi quẽne bũto botiquẽnañuju. ⁴ ĩre ĩacõari, gũirã nanañujarã ti vire coderimasa. Nanacõari, rijavẽjarãre bajiro bajireacũcoasujarã. ⁵ To ĩna bajirone, ángel ado bajiro rõmiajuare gotiyuju:

—Gũibesa mũa. Jesús yucátẽroju ĩna jajusĩar'ire mũa macasere masiaja yũ. ⁶ Maami adojuare. ĩ goticatore bajirone tudicaticoami. ĩre ĩna yujeriajũre ĩarã vayá. ⁷ Tire ĩacõari, guaro ĩ buerimasare ado bajiro ĩnare gotiaya: “Quẽna tudicaticoasumi Jesús. To yicõari, mani rĩjoro Galilea sitaju varocu ñañuju. Toju ĩre tudiĩaruarãja mani”, ĩnare yigotiaya mũa. Adire mũare gotigu bajibu yũ —ĩnare yiyuju ángel.

⁸ To ĩ yisere ajicõari, Jesús rujũri ĩna yujeboariaviju budianane, gũitũoĩaboarine, variquẽnase rãca ũmacoayuma ĩna, Jesús buerimasare yũare gotirã vana. ⁹ ĩna ũmavadone ĩnare sēniĩacānamua ruyuyuju Jesús. “¿Ñati mũa?” ĩ yisere ajicõari, ĩre yirũcũbuorã, ĩ rĩjoroju muqueacõari, ĩ gũborire ñiañujarã ĩna. ¹⁰ To bajiro ĩre ĩna yirone, ado bajiro yiyuju ĩ:

—Gũibesa mũa. Yũ yarã yũ buecanare ado bajiro ĩnare gotiaya: “Galilea sitaju vajaro. Toju ĩre ĩaruarãja mani”, ĩnare yiba —rõmiare ĩnare yiyuju Jesús.

“Ado bajiro bajibu ti”, surara ĩna yigotire queti

11 Rõmia ãna gotirã vato ãnone, surara quẽne, Jesús rujãrre ãna yujeriavire codeboariarã sãgãri, macajã tudicoasujarã ãna. Tudiejacõari, paia ãjarãre gotiyujarã, ãna ãare ãnaro cõrone. 12 Ti quetire ajicõari, bũcãrã rãca ãnagõrã vasujarã paia ãjarã. “To bajiro bajire ti ãnjare, ado bajiro yirũarãja mani” yimasirũarã bajiyujarã ãna. To bajiri, sãgãre bajiro tũoãcõari, Jesúre ãna yujeriavire codeboariarãre jairo gãjoa ãsiñujarã ãna. 13 To yicõari, ado bajiro ãnare socarotiyujarã ãna:

—“Ñami yãa cãnitoye, ã ãnboar'i buerimasane Jesús rujãrre ãmirudicoasuma ãna”, yigotibatoya mãa —masare yiyujarã bũcãrã, paia ãjarã quẽne. 14 —Ëjã Pilato ti quetire ajicõari, mũare ã jũnisinijama, mũare ãnagõbosarũarãja yãa, “Rojose ãnare yibesa” yirã. Yãare cãdicõarũcãmĩ —ãnare yiyujarã.

15 To bajiro ãna yijare, gãjoare boca juacõari, ãnare ãna rotiriarore bajirone socase queti goticudiyujarã ãna, Jesúre ãna yujeriavire codeboariarã. To bajiri adirãmãri quẽne, “Tudicatibesuju Jesús. ã ãnboar'i buerimasane, ã rujãrre ãmirudiyujarã ãna” yire quetire goticõa ãnarũgũama jud'io masa.

*“Masa jedirore yã ocare gotimasiocudirũarãja mãa”, ã buerãre Jesús ã yire queti
(Mr 16.14-18; Lc 24.36-49; Jn 20.19-23)*

16 Jesús ã tudicatisere, rõmia ãna gotisere ajicõari, Galilea sitajã vacajã yãa, ã buerã, juaãmo cõro, gũbo coja jẽnituarirãcũ ãnarã. “Ti buro joejã yãre ãarũarãja mãa” yãare ã yicatojã vacajã yãa. 17 Tojã ejacõari, Jesúre ãacajã yãa. ãre ãacõari, ãre rũcũbũocajã yãa. Sãgãri, “ã me ãnaami”, yitũoãcama ãna, bajirãjãma.

18 To bajiro yña yirone, ado bajiro yñare yicami Jesús:

—Adi macarucurojũre, to yicõari, õ vecajũre quẽne, “Rotigu ñarucija mũ”, yũre yicũmi yũ jacũ, Dios. 19 To bajiri mũare quẽne masa jedirore yũ ocare mũare goticudirotiaja, “Yũre ajitirũnũato” yigu. To yicõari, yũre ajitirũnrãre ñacõari, yũ jacũ vãme, yũ vãme, to yicõari Esp'iritu Santo vãme rãca oco rãca ñare bautizaba mũa. 20 To yicõari, “Jediro yũ rotisere cãdiato” yirã, ñare gotimasioma. Yũre mũa ñabetiboajaquẽne, cojorũmũ ruyabeto mũa rãca ñarũgũrucija yũ, mũare ejarẽmogũ. To bajiro bajicõa ñarucija yũ, adi macarucuro ti jedirojũ — yñare yicami Jesús.

To cõrone ñaja.

clxx

Dios oca gotirituti
New Testament in Barasana-Eduria
(CO:bsn:Barasana-Eduria)

copyright © 2010 Wycliffe Bible Translators, Inc.

Language: Barasana-Eduria

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Barasana-Eduria

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

b6661d38-f021-5259-8010-5dec5b9ba28d